

SAN LUCAS

Jaayhu'i'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi iich ajt ne-jhuüiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuiñ ixti mabaad ycocixiiy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocixiiy, je' ajcxy huidibi capxhuäcxy Jesús y'ayuc ytiy'ajt. ³ Hich nañ jadu'n ti nyajciyöyich ti nyajtecyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycocixiiy. Paady ycixpi iich nhuinma'ñ pidägy co iich miich nyajnijayihua'ñ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuühuipy yajxon je tiy'ajt, jadu'n nej miich ti m'ixpicy.

Tüg ángel nigapxy co Juan el Bautista ypi'c'adañ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tüg judío teedy hue' anajty yxii Zacarías. Je' anajty semandumb miid Abías y'ajugytijc y'amigügtijc. Je Zacarías ypijcy miid Aarón y'ocniix, hue' je' anajty yxii Elisabet. ⁶ Dios y'ijxyp ñejhuüiyb co je' anajty ajcxy ytuädgyjäyity nimetz. Je' ajcxy ycuydumyb tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyhiñ nimetz. ⁸ Chi tügtecy Zacarías miid y'ajugy y'amigüg yteedy'ájticy anajty ma Dios ytijc. ⁹ Jadu'n nej teedy ajcxy ycostumbre miidity, chi ñigooti tung je Zacarías mina ypoomjogipy jiiby ma yi Huindzin Dios ytijc. ¹⁰ Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹ co

ñayquëx'ici Huindzin Dios y'ángel tüg ytinäy a'oy'amy ma je poomjocac. ¹² Co Zacarías ijxy je ángel, chi ooy chigiiy. ¹³ Chi je ángel nimaay Zacarías:

—Ca' mdzigïy, ti Dios midooy yi mjuydácin mnucx-tácin. Yi mdöxyijc Elisabet ypaadipy tüg ung yëydijcpi, e mxiiimöhuipy Juan. ¹⁴ Mjotcujc'adip mxondägip miich etz mdöxyijc, nañ may yi jäy yjotcugihuiipy co anajty m'ung ti ypi'c'aty. ¹⁵ Chi yi m'ung ycömay'ida'ñ ma Dios. Ni ca' ügipy vino ni jocni. Ma ca'ni anajty yma'xung'aty ymiid'adipy yi Dios yjihui'ñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycogapxy'aty ma yi jäy ajcxy huinmic jotmic miid Dios yjihui'ñ ymic'ajt, tim jadu'n nej Elías jecy'ajty ycogapxy'ajty huinmic jotmic miid Dios yjihui'ñ ymic'ajt. Je' m'ung yajjothuimbidipy je ungdeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxcöbicy yi Dios, jigix ajcxy paadipy oyjot oyhuinma'ñ. Nañ m'ung ñimähuipy je jäy ajcxy huen nayñi'ixiiyigixy miid yHuindzin Dios ycixpi.

¹⁸ Chi Zacarías nimay je ángel:

—¿Nej jada iich nejhuñhuipy peni janch huidibi xyajnimaybich? Ti nmijjähiiyñich, cham ndöxyijcich nañ ti ymijjähiiyñi.

¹⁹ Chi je ángel y'adzooy:

—iich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhuí'mipy uum, ni ca' m'ocjájtnip nej mgápxipy, miid co ca' mmibicy jada iich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuíjxcixy Zacarías, ooy anajty ajcxy tzachhuinmaaygixy ti co chachhuäcxipy jiiby ma Dios ytijc. ²² Co Zacarías ypidzimy, chi ca' anajty

y'occapxni. Chi je jäy ajcxy huinjihuiy co ti anajty icy tijaty jii by ma Dios ytijc. Hue' je' yjacmiydacy a'ixiy'amy, e oyhui'miy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihuiy co ti anajty y'ung tziimigy ciy gy. Chi yüch'ijty migoox po', e ymíañ: “Jadu'n yi Huindzin Dios ti ytuñ miid iich jadachambi tiempo, ti xyjäy mechich ti yajquëgy iich ndzöydu'n ma yi mayjäy ajcxy.”

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzimigy, chi Dios quejxy je' y'ángel Gabriel jim Galilea naaxjot ma je cajp huidi anajty yxii Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ miid tüg yëydijc huidi yxii José. José hue' anajty David y'ap y'oc. Je töxy'anäg hue' anajty yxii jity María. ²⁸ Co je ángel ytigiyy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt miid miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigiyy miid je' y'ayuc, chi huinmay ooy miid jada copxpócxin nej co yjadú'ñity.

³⁰ Chi je ángel ymíañ:

—María, ca' mdzigiy, miich Dios ti xy'ijxtiy.

³¹ Jadachambi, m'ungdzimigip, myajpi'c'adipy tüg mang, huidibi mximöhuipy JESUS. ³² Je Jesús mij y'idipy, hue' je' yajtjipy Dios tzajpjotypi y'ung. Chi je Huindzin Dios möhuiyb je ané'min huidi yi' ymij'ap ymijteedy David ymiid anajty. ³³ Je Jesús ané'mip huinixii ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaay:

—¿Nej jada co yjadú'nity? Hich ca'ni nyëdyjc miid tzinäy.

³⁵ Chi je ángel y'adzooy:

—Je Dios yjihu'i'ñ ymic'ajt minip ma miich, je Dios tza-jpjtopyi ymic'ájtin xyajnídujttáhuip, je oyjäybi jäy huidi pi'c'adam, hue' yajtíjpy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäyiyñi. Cham midudujc po'bi maabi y'ung tziimígy je huidibi jäy ytijpy ca' y'ung'ixaani, ³⁷ com miidi Dios ca'ni ti chípity.

³⁸ Chi María yminañ:

—Jotcuyc nguydunipyich yi Huindzin Dios chójcin, huen jadu'n tuñyii jadyii ma ich jadu'n nej miich m'ayuc xymöyich.

Chi je ángel ñicxni.

María y'oy cogapxiy Elisabet

³⁹ Huin'it xi María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigiyy ma Zacarías ytijc, e capxpocxy Elisabet. ⁴¹ Chi jadu'n yjaty co Elisabet midoohui María ycapxpócxin, chi jihu'iy co y'ung yüxcy ma yjot. E chi je Elisabet ooy yjotcugiy miid je Dios yjihu'i'ñ ymic'ajt. ⁴² Chi yminañ janch mic:

—Cömay miich ma tüg'óciy töxyjäydiy, e cömay y'ida'ñ m'ung huidibi pi'c'adamb. ⁴³ ¿Nej ich jada co jadu'n ti n'ahuägíy co nHuindzinich ytaj miñ xycó'ixiyich? ⁴⁴ Co ti nmidooyich yi mgapxpócxin, ti ich n'ung yüxcy ma ich njot co chachjotcújcity. ⁴⁵ Jotcuyc'adip pinjaty ti ymibicy, co cuyduñ y'ida'ñ je ayuc miid je Huindzin Dios ycixpi. ⁴⁶ Chi María yminañ: Ooy mij n'ojadatyich yi Huindzin Dios.

⁴⁷ Ooy nxondägyich miid Dios ycixpi, ich nnihuambi nyajtzoocpi,

- 48 co yi' ti xyñi'ijxcidägyich, co ñich ayoobi xytumbi'adyíijich. Jadachambi etz jacnicxp xii tiempo, tüg'óciy jäy ajcxy oy mina'nip co jotcuyc'ájtpech.
- 49 Yi Dios tügpajc mijip, tiibi tun miid ñich, ooy yi' yxii ymíjity.
- 50 Dios ypa'ayooyb hueñypínity huidibi huindzigíiyip jadachambi etz jacnicxni xii tiempo.
- 51 Dios ti ooy tuñ mijpi huinma'ñ, ti jñibicy pinjaty amij agix nayjihuiyip ma yjot yhuinma'ñ.
- 52 Dios ti yajpidzimy yi mijpi rey ma y'ane'my, ti mij'ajt móy ayoobidijc.
- 53 Pinjaty ayuu'ijtp anajty ymooy ti miid yjotcuyc'adip, etz yi comeñyjäydijc ajcxy ti ixmach ca' ni ti.
- 54 Dios ti pubety yi Israel jäy, yi' ajcxy ytumbi, miid co anajty ti pa'ayogoty je' ajcxy,
- 55 jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb miid je' ajcxy huinixii.
- 56 Chi María tugiig po' jim y'ijty miid Elisabet, chi yhuimbijtni ma ytijc.

Juan el Bautista co ypi'c'ajty

57 Co je Elisabet oy yajhuaad'ajtni xii tiempo, chi yajpi'c'ajty tüg ymang. 58 Chi ayuc midooy ajcxy je ymijijn ymidijc etz y'ajugy y'amigüg jadu'n nej Dios may'ajt ti tuñ miid Elisabet. Chi ajcxy ooy yjotcugiy miid je' ycixpi. 59 Chi jadu'n yajty conductujc xii je ymijijn ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'c'anäg. Chi ajcxy yajxii'ada'ñyii anajty jadu'n nej yteedy yxii Zacarías. 60 Chi ytaj yminañ: —Ca' xii'adiiyb Zacarías, hue' yi' huen xii'adyii Juan.

61 Chi je' ymigügtijc ajcxy yminañ:

—¿Na'amy? Ni tüg miich m'amigüg jadu'n ca' xíjity.

⁶² Chi ajcxy y'amidoohui je' yteedy jadu'n a'ixiy'amy, nej yi' yajxii'ada'nyii. ⁶³ Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihuiy huinmaay. ⁶⁴ Chi mic'amy Zacarías y'ahuac ahua'cxy e ytoodz yungiiy, chi oy ycapxiy e jäymejch cömay yi Dios. ⁶⁵ Chi tüg'óciy ymijün ymidijc ooy chigiiy. Chi ajcxy nimiydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. ⁶⁶ Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinma'ñ, chi ñayñimáayigixy:

—¿Ti jada' ytunamyb jada pi'c'anäg?

Com je Huindzin Dios je' miid y'ity.

Je Zacarías y'iy

⁶⁷ Chi je ungedeedy Zacarías miid je Dios yjihui'ñ ymic'ajt Dios y'ayuc najtzcapxiyi yminañ:

⁶⁸ Cömay yi Israel jäy yHuindzin Dios, co ti ni'ijxcidägy, ti cohua'ñ yi' ñaax ycajp,

⁶⁹ Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxy.

⁷⁰ Com Dios jadu'n yminañ jecy'ajty miid yi' y'ayuc najtzcapxiyb huidibi huätzjäyip;

⁷¹ je' xyñihuänaanim ma iich ajt nmidzip, ñañ xypubedaanim xypudigihuaanim ca'ydi xycigähuiyim huidibi ca' xy'ixaanim xychogaanim.

⁷² Jaydëbi pa'ayoohuipy iich ajt nmij'ap nmijteedy, etz jäymedziyb jadu'n nej ayuc ahuaniiy miid je' ajcxy.

⁷³ Jadu'n nej Dios janch huinijot y'ayuc ahuaniiy miid iich ajt nmij'ap nmijteedy Abraham jecy'ajty huidi anajty xymöhuaanim.

- 74 Co nihuätzictuutim ma nmidzip, huin'it jaydëbi miyaaxim n'ojadajtim ca' ma tzig'i'ñ jihui'ñ,
- 75 miid huätzhuinma'ñ etz tudägy huinma'ñ ma yi' yhuinduuduu jabom jabom ixti mibaad ndzinaayim.
- 76 Miich ma'xung, jäy hue' myajtijip mijpi Dios y'ayucnajtzcaxiiybi. Miich ñicxip cogapxy, nicx yajni'ixi jäy miid Huindzin Dios ycixpi.
- 77 Yajni'ixi' yi cajpjäy jadu'n nej huaad ajcxy y'alma paadipy nihuáanin yajnīdzocin, etz jadu'n nej huaad ajcxy ypocy huinmecxiiyb.
- 78 Jadu'n nej Dios iich ajt ti xypa'ayoohuim co ti xyñi'ijxcidaacim etz xymooyim tiicxin jájin huidibi tzomb tzajpjoty,
- 79 jaydëbi yajmōhuipy jäy ajcxy Dios ytiy'ajt huidibi ajcxy tzinaayb agootztuum etz o'c jījp'am, jigix ajcxy xytūmooyim ma je tudägypi tü'aa.
- 80 Je pi'c'anäg yeeg yjodijy huinmic jotmic miid yi Dios yjihui'ñ ymic'ajt. Chi chinaay adügtuum ma ca' pin, ixti cooni xii tiempo paty mina ñicxipy cogapxy ma Israeljäy ajcxy.

2

Jesús yma'xung'ajty

¹ Huin'it xii Augusto César pidacy y'ané'min huen tüg'óciy jäy nicxy necypejttaaygixy. ² Je jayjip'atypi padrón hue' je'yaj'oyiiy Cirenio huidibi anajty gobernador'ajtp jim Siria ñaaxjot. ³ Chi jäy ajcxy nidüg'óciy ñicxtay yajcojayiiybi nidüg nidüg ma yci'mgajp. ⁴ Chi José chooñ jim Galilea naaxjot ma je cajp huidi yxii Nazaret, ñicxy ajcxy jim Judea naaxjot ma je David ycajp, huidi yxii Belén. Yi José ñicxy jim Belén com ymij'ap'ajtpy ymijteedy'ajtpy je David. ⁵ Chi José yajcojayiiy padrónjoty

míid María, je töxyjäy huidibi anajty ymiid capxytuñ, huidi anajty ung tziim'ijtp. ⁶ Chi jadu'n yjajty co ajcxy anajty yjímity Belén, chi oyhuaad'aty co María paadipy y'ung. ⁷ Chi yma'xung'ajty je unngoob, e chi nibe'ñ nímüxy míid ymotz, e chi agögüy ma iyujc pëcxí'ñ, co ca' anajty ti paady jättac.

Je ángeles ajcxy etz je cöbixycuend'ajtpi ajcxy

⁸ Chi míhuington je cajp anajty jäy ycöbixycuend'aty. Hue' anajty ajcxy yhuin'iñaayb huintzuumnajxyp je' ycöbixy ajcxy. ⁹ Chi Huindzin Dios tüg y'ánel ñigídaaci je' ajcxy, e yi Huindzin Dios y'oy'ájtín y'adixcoody jühuidity ma je' anajty ajcxy ymijc, chi ajcxy ooy chigüy. ¹⁰ Huin'it je ánel ymíañ:

—Ca' mdzigüygixy, cham íich miich nyajnimaaügixy oybi ayuc huidibi yajjotcugühuipy tüg'óciy naax cajp. ¹¹ Míid miich ajcxy ycixpi ti ypi'c'aty cham ma je David ycajp tüg jäy huidibi miich ajcxy xyñihuánaam xycohuánaam ma ajcxy mmidzip. Hue' je' je CRISTO, je Huindzin Dios. ¹² Yi' je' ijxpéjtíp huidi míid m'ijxcabipy. Mbáadipy ajcxy je ung ma'xung ñimóchity míid ymotz, ycöcnäy ma iyujc pëcxí'ñ.

¹³ Chi janch mic'amy ñayguëxíci míid je ánel may yi tzajpjoty chínaaybi, chach Dios ojadájticy ymíañangixy:

¹⁴ ¡Ooy ycömáyity ooy ymíjity yi Dios tzajpjoty, ji naax-huiñ jotcujc'ajt míid jäy ajcxy ycixpi huidibi Dios yjäygidacpy!

¹⁵ Jadu'n yjajty co je ánel ajcxy ñicxtay tzajpjoty, chi je cöbixy cuend'ajtpi ajcxy ñayñimayi:

—Tzoc jámim jim Belén, jaydebí n'íjxim ti ti ytunyíi ti yjadyíi huidibi nHuindzin'ájtím Dios ti xyajnimáayim.

¹⁶ Chi ajcxy ñicxy jottigoy, chi oy pátcixy María, José etz je ung ma'xung y'agögüyity ma je iyujc pëcxí'ñ. ¹⁷ Co

ajcxy ijxy je María etz je ung ma'xung, huin'it ajcxy nigapxtay nimiydactay jadu'n nej je ángel ajcxy ñimayi miid je pi'c'anäg ycixpi. ¹⁸ Tüg'óciy jäy huidi midou ooy jihuiy huinmay jadu'n nej je cöbixycuend'ajtpi ajcxy yminañ. ¹⁹ Chi María mido'mbijctay, e yajhui'my ma yjot yhuinma'ñ. ²⁰ Chi yhuimbijty je cöbixycuend'ajtpi ajcxy cömay jäymeck ajcxy yi Dios, etz ooy alabanza ajcxy iij miid Dios ycixpi miid tüg'óciy jadu'n nej anajty ti íjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxígy ma Dios ytijc

²¹ Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxiimoy JESUS, jadu'n nej je ángel anajty jayijp ti yminañ ca'ni anajty chimígyii yciyígyii.

²² Co je xii oypaatni mina je María anajty yhuätzpidzimaamni, jadu'n nej Moisés ycötújcin je jécyip yminañ. Chi ajcxy miidnicxy je ung ma'xung jim Jerusalén capxquëxígaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy unngoob yéydijcpi huidi ma'xung'ajtp, abicy yhuí'mipy miid je Huindzin Dios ycixpi.

²⁴ José etz María oy yéjccixy huindzigi'ñ jadu'n nej Huindzin Dios ñecy yminañ co jébi yecy metzc jam muuxy o pajctza'm muuxy.

²⁵ Jim Jerusalén anajty chinäy tüg jäy huidi anajty yxii Simeón, tudägyjäy je', etz ooy Dios jäymeck. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e miid je' anajty Dios yjihui'ñ ymic'ajt. ²⁶ Dios yjihui'ñ ymic'ajt ti anajty yajnejhuíyii co ca' chojc öga'ñ, jayijpni oc'ixipy je Huindzin Dios yCristo. ²⁷ Je Dios yjihui'ñ ymic'ajt yajmin yajmejtzi Simeón yhuinma'ñ

huen nicxy ma Dios ytijc; huin'it Jesús ytaj yteedy ymiidnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios miibijctzoy miid je' ycixpi, chi yminañ:

²⁹ Jadachambi capxcix jotcujc, Huindzin Dios, miid iich miich mdumbi, com ti mguyduñ jadu'n nej ti xyñimäyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huidibi ti mni'ixiy ma tüg'óciy jäy ajcxy yhuinduu.

³² Jada ung ma'xung ytiy'ajt yegip ma yi jäy ajcxy huidi ca' yjudiojäyity. Jadu'n yi' nipaady nej tüg jün huidi codiicxp je jäy. Cömay y'idipy yi Israel jäy miid yi' ycixpi.

³³ José etz Jesús ytaj ooy jihuiy huinmaay jadu'n nej Simeón ñigapxy je pi'c ma'xung. ³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jäy yjothuinma'ñ yaj'oyihuipy miid yi Dios etz nañ jadu'n may Israel jäy yjothuinma'ñ ca' yaj'oyihuipy miid yi Dios. Yi' je' tüg ijxpejt co ca' jäy y'ixa'niiyb choga'niiyb, e jadu'n tüg'óciy yajnejhuihuipy nej ajcxy nidüg nidüg yjothuinma'ñ miidity. E miich m'idipy jotmaymiid jadu'n nejihuüy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjäy huidibi anajty yxi Ana, Dios je' anajty y'ayucnajtzcaxiibi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypicy e jeyi huixtujc jimijt chinay miid yña'y, mada'px midaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xiim tzuum jopy ayuu anajty ycapxtägy. ³⁸ Chi Ana nimiñ José etz María jiiby ma Dios

ytijc, e quipxy miid ajcxy huingapxtacy je Huindzin Dios. Chi je Ana nimiydacy je pi'c Jesús miid tüg'óciy jäy jim Jerusalén huidi anajty ajcxy jijp'ijxp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñícxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy miid huijy'ajt cujc'ajt, etz ymiid je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungedeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiyy jim Jerusalén jadu'n anajty ajcxy costumbre miidity co xii paady. ⁴³ Co je xii ñaxtäy, chi ajcxy huimbíjtcixni, e Jesús yhui'miyy je' jim Jerusalén. Ca' José etz ytaj nejhuiyy ajcxy co ti anajty yhui'miy. ⁴⁴ Hue' ajcxy anajty tijy je' ymiñ axaam miid ymigügtijc. Co tüg xii yöyixni, chi ajcxy ixtay je' y'ung ma y'amigügtijc ajcxy, etz huidi miid ñay'ixy'adyii ñaymigüg'adyii. ⁴⁵ Co ca' ajcxy y'ung paady, chi yhuimbíjtcixni jim Jerusalén ung ixtaaybi.

⁴⁶ Chi jadu'n yajty codugiig xii oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuidäy etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiyy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz iich yam tzachjottigooyb nay'adzigiyiich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnehuiygixy co copity n'ida'ñich ma nDéedyich ytung?

⁵⁰ Chi ajcxy ca' huinjihuiyi Jesús y'ayuc huidibi ycapxy.

⁵¹ Chi Jesús miid nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhui'mday ma yjot yhuinma'ñ tüg'óciy nej ytunyii yjadyii. ⁵² Chi Jesús ixpijc'adiitzp anajty ooy, etz yeegy yjáygojy huijycujc. E yi Dios etz jáy ajcxy ooy anajty jáygidaccixy.

3

Juan el Bautista y'ayuccapxhuäcxy mijtigüduum

¹ Ma anajty je Tiberio César yjimijjtoty, mimajmox jimijt anajty maabi y'ane'mtigüy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisanas anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmiid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtigüduum. ³ Chi Juan choñ ñicxy ma tüg'óciy cajp mihuingon je Jordán mijnií, capxhuijy je jáy ajcxy, co huen jothuimbijttaaygixy etz huen niibejtcixy jigix ajcxy ypocy yajhuinmeecxip. ⁴ Jada jadu'n tuni jajtí nej je ayucnajtzcaxxiybi Isaías anajty ti cojaay:

Jim mijtigüduum yajmidooy tüg jáy mina'ñ: “Yaj'oyiigix yi Dios ytü'aa, tim jadu'n nej jáy ajcxy yaj'oyiigixy yi jibic tü'aa co tüg rey mina'ñ.” Yajtíyigixy yi tü'aa huidibi ooy y'adijy y'a'och.

⁵ Tüg'óciy anii ahuoc huen joyiidyäy, tüg'óciy tungop huen nañ jadu'n joyiidyäy. Tüg'óciy nii'aa tü'aa huidibi tijmin tijxijp huen tiidyäy. Yi tü'aa huidibi ca' quipxyjátýty huen quipxyjaty tiidyäy.

⁶ Tüg'óciy yi jäy ajcxy ixipy ñejhuñhipy nej Dios yega'ñ je nihuambi cohuambi.

⁷ Chi Juan ogy ajcxy je jäy pinjaty anajty miimb niibejtpi, yminañ:

—¡Miich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quëg ma yi ayo'n huidibi Dios yquexaamy? ⁸ Túngix oybi, jothuimbíjtcix, ca' ajcxy minaangixy miñ xyipy: “Abraham iich ajcxy n'ap'ajtpy ndeedy'ajtpy”. Iich miich ajcxy nimaayb co Dios ixti jëbi yi' yaj'ung'adyii yaj'anäg'adyii Abraham jada tzaa ca'ydí miich ajcxy. ⁹ Dios ni'ixí y'ity jaydëbi yajcödígoyipy jäy ajcxy y'alma huidibi jibic-huinma'ñ miid. Tim jadu'n nipaady nej jäy ni'ixí y'ity miid jacha co pujxíga'ñ tüg quipy huidi ca' oy ytiim'aty, etz yajnögtähua'ñ.

¹⁰ Chi je mayjäy ajcxy y'amidooy je Juan:

—¿Ti iich ajcxy jëbi nduñ?

¹¹ Chi je Juan y'adzooy, yminañ:

—Pinjaty yhuit miid metz, jaydëbi möy pin ca' miidity ni tüg. Etz pinjaty caagy miid nañ jadu'n möhuipy pinjaty ca' miidity.

¹² Chi miñ jadyii yajcogüejtpi co anajty ñiibedaangixy, yminañ ajcxy:

—¿Ti huaad iich ajcxy nduñ (jígix Dios xymijotcujc'adipyich)?

¹³ Chi Juan y'adzooy:

—Ca' ñigí anaxy myajcogüety jadu'n nej je cötújcín y'ane'my.

¹⁴ Chi soldado ajcxy yminañ:

—¿Ti ñich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapíjciy, ni mganñhuambedipy ajcxy. Nañ jadu'n mijotcujc'ájtciy nej myajmujuuygixy.

¹⁵ Je mayjäy yjijp'ijxyp anajty ajcxy ooy, etz ooy jihuiñy huiñmaay nejhuñhuaangixy pen yi Juan je' anajty Cristo.

¹⁶ Chi Juan nimay ajcxy nidüg'óciy:

—Ñich janch nyajñibéjtypich jäy miid ñi. Miimb je' axaam huidibi jacmij ca'ydi ñich, ca' huaad yi' ycighuin ngejich. Je' miich ajcxy xyajñibedipy miidi Dios yjihui'ñ ymic'ajt etz miidi jñin. ¹⁷ Je Cristo ni'ixi' y'ity co oybi möhua'ñ je jäy huidibi ajcxy oyhuinma'ñ miid, etz ymöhuaamy tzaachypi je jäy ajcxy huidibi jibic-huinma'ñ miid, tzaachypi huidibi nicamina ycixipy. Tim jadu'n nipaady nej tüg jäy ni'ixi' y'ity co ymoc-huimboja'n, e chi je oybi mocpajc pidäga'ñ ma che'x, etz je mocjaam ninögñhua'ñ, e caminaxii ycapidza'ñ je jñin.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' ogy je rey Herodes, co y'uch Felipe ytöxyjic Herodías miid tzinaayi, etz jacjaydiiybi jibic-huinma'ñ tiibi Herodes anajty tuñ. ²⁰ Chi je rey Herodes niği pocytuñ co Juan pidacy pujxtigoty.

Je Jesús ñiibejtin

²¹⁻²² Chi jadu'n yjajty co jadu'n tüg'óciy jäy ñiibejttay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihui'ñ ymic'ajt yminajcy ma Jesús ycöduu miid ñinixc jadu'n nej muuxy ñinixc. Nañ jadu'n yajmidoy tüg ayuc choñ tzajpjoty yminañ:

—Miich n'ung'ajtpy, ooy ñich miich ndzocy ooy njihuñy, ooy njotcújcidyich miid miich.

*Jesús ymij'*ap ymijteedy

²³ Jesús hue' anajty yjimijt oy ni iipxmajc co ytungtigiyy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham,

je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij nii, chi je Dios yjihui'ñ ymic'ajt yajnicxi mijtig'itudum. ² Jesús y'ijty huixchigui'px xiï jim mijtig'itudum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xiï ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' miidpejty Jesús ma tüg cop janch cixpi, chi tüg jaxigy yajni'ixiy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—İich miich möhuipy tüg'óciy mic'ájtın ané'mın etz oy'ájtın, com İich ngi'am y'ity tüg'óciy, e

nmöhuibich hueñyimpñity. ⁷ Pen xyhuingoxtinaaybich xy'ojadajtpich miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuägtuutcich miich mujcu', com jadu'n jaybéty y'ity: “Co yi Huindzin miich mDios mhuingoxtinähuiipy m'ojadadipy, etz yi' je' tüg pajc myajmij'adipy.”

⁹ Chi je mujcu' miidnicxy Jesús jim Jerusalén, chi miid pejty ma Dios ytijc coduu, e nimay:

—Pen Dios miich xy'ung'ajtp cödijpnax naaxcíxy, ¹⁰ com jaybety jadu'n y'ity ma Dios ñecy co quexipy Dios yi' y'ángeles ajcxy e xycuend'adipy. ¹¹ Cigíxy ajcxy xyhuidziy, ca'ydi mdzaachiy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' mjot'ixipy mhuinma'ñ'ixipy yi mHuindzin Dios.

¹³ Co je mujcu' yajcijxy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicxy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymiiñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty miidity pocxxiduum. Chi ytinaay'ahuüy, chi ytigiyy necycapxpi. ¹⁷ Chi ajcxy mooy je necy huidibi je Dios y'ayucnajtzcaxiiybi Isaías yjaay. Chi ciyhuäcxy je necy, paty jiiy tüg it ma anajty yjaybétyity jadu'n:

¹⁸ Je Huindzin Dios yjihui'ñ ymic'ajt xymiid'ajtpich, co xyajniibicyich co nyajnimähuibich ayoobitijc je

oybi ayuc. Ti xyquexyich co nyajjotcugihuibich je jäy ajcxy huidi jotmay ymiid, etz nhuin-méecxibich huidibi ajcxy pujxtigótyip, nañ jadu'n ajcxy je huidibi huiintzip nyajhuindixcigibich, e nbidägibich ahuätztuum huidibi yajtzaachytumb.

¹⁹ Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'n miid je jäy ajcxy ycixpi.

²⁰ Chi jada' Jesús abidijty je ñecy, yajcidihiy je tungmiidpi, huin'it y'ixtacy. Chi tüg'óciy mayjäy jiiby ma naymujctac ooy ajcxy huindixy je Jesús. ²¹ Chi Jesús yminandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús mina'n, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús yminaañ:

—Ca' yjécyity miich ajcxy xyajnimähuibich jada ayuc: “Tzoydumbi naychoyihuii ci'm. Tüg'óciy jadu'n nej iich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacmíañ:

—Janch iich miich ajcxy nnimäy co ni tüg jäy huidibi Dios y'ayucnajtzcaxiib ca' jäy ajcxy cöbicy ma yci'mgajp. ²⁵ Janch iich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugüg jimijt jatudujc po', co oy yuu miin ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjäy püd z pa'm

míidity ya Israel jecy'ajty co je Dios y'ayucnajtzcaxiíybi Eliseo chinay. Chi ni tüg jäy huin'it catzoocy, jëyi tügpajc choocy pa'mjäy huidibi anajty yxií Naamán huidi tzoon Siria naaxjot.

²⁸ Huin'it tüg'óciy jäy huidi anajty jiiby ma naymujctac ooy yjotma'tcoty co jadayaab ayuc ajcxy midooy. ²⁹ Chi je mayjäy ajcxy nibidígy Jesús etz jajpidzimy ma je cajp. Chi ajcxy jajnicxy jim ma je tzaahuingueetz, co je cajp copcíxy anajty jajpaady, e jim anajty cödijpnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty míid jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy jaj'ixpijcy pocxxiíduum. ³² Huinmay ooy ajcxy jadu'n nej je' jaj'ixpicy. Ñayñimáayigixy co je Jesús jaj'ixpicy nejihuíy mijtung mij'ané'min míidity.

³³ Jiiby ma je naymujctac jiiby anajty tüg yëydijc huidibi míid tüg ca'oybi, chi je ca'oybi mic yaaxqueecy yminañ:

³⁴ —Ixmajtzcich ajcxy, ¿ti mdunamy míid ñich ajcxy Jesús je nazaretpi? ¿Nej ti mmiñ co xyajhuindigoyáanigixyich? ñich miich n'ijxcapy co miich je' je Huätzpi Dios.

³⁵ Chi Jesús je ca'oybi ogy, nimay:

—Amon, pidzim ma yi jäy.

Chi je ca'oybi najtztijíy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶ Tüg'óciy jäy jim ooy ajcxy ñay'adzigíyí miñ xyipy yjanayñimáayigixy:

—¿Ti ayuc jada' yi'? Co míid y'ané'min etz mic'ajt ane'my ca'oybi etz jajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymïd töxyjäybi

³⁸ Chi Jesús ypidïgy choñ ma naymujctac, ytiğiyy ma Simón ytïjc. Jadu'n anajty Simón ymïd töxyjäybi mic ytoyii. Chi ajcxy cohuanïy Jesús miïd je' ycixpi. ³⁹ Chi Jesús yhuindacy ma je' yhuinduu, ix'ojoy je toyii, e jadu'ñi ñajxy. Chi je' mic'amy ypidïgy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmiïdpi ma Jesús. Chi Jesús cïnixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuiy, ymina'ñ:

—Mich je' Dios xy'ung'ajtp.

Chi Jesús niği ix'ojoy, ca' anajty yajhuäcxipy nicxy yjac-capxy, com ti anajty nejhuiyigixy co yi' je' je Cristo.

Jesús y'ayuccapxhuäcxy jim Galilea

⁴² Co yxiimiyy, chi choñ Jesús, ñicxy mijtigïduum. Ooy jäy yja'ixtäyii, chi ajcxy oy paatcixy, yajhuäcxipy ajcxy ooy, ca' anajty oc'ixmadzáangixni. ⁴³ Chi Jesús yminañ:

—Ooy jada chachcopícyity co canaag agajp iich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'nybi

¹ Tügtecy jadu'n yajti, jim anajty Jesús ma je Genesaret mejypa', co jäy ñimiini janch ñay'adijïy ñay'agodïyigixy, tzach'amidohuaangixy Dios y'ayuc. ² Chi yi' ijxpaty mejtz barco jahueengi mejypa'áy. Je acxmajtzpidïjc ti

anajty ypidzímǵixy ma je barco, jím anajty y'acxxuumy pújccixy. ³ Chi Jesús yajtigiyiïy tüg barco huïdi Simón anajty je'ajtpy. Chi may'ajt pijctzoy co huen yajjihuaǵy hueeni yi barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjáy ajcxy. ⁴ Co ycapxymaayi, chi Jesús Simón ñimay:

—Ñicx pidäg m'acxmadzi'ñ mejyjoty, jaydëbi májtcixipy acx.

⁵ Chi Simón y'adzooy:

—Huindzin, ti iich ajcxy ooy njatuñ tüg tzuum, ni ti ti ngapáatcixyich. Per miid miich m'ayuc ycixpi yi acxmadzi'ñ nbidäǵibich mejyjoty.

⁶ Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycaciich miid je may acx ycixpi. ⁷ Chi Pedro yemi ymigügtijc huïdi anajty jím ma je jadüǵpi barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiiñ je barco miid may acx ycixpi. ⁸ Co Simón Pedro ijxy jadu'n, chi ycojxtinaay'ahuïiy ma Jesús yhuinduu, ñimay:

—Huinhuäctúutcich, Huindzin, com iich pocyjáy iich.

⁹ Com Pedro janch tzigiiyb anajty, etz nañ tzigiiyb tüg'óciy huïdi anajty miid ti ytuñ, co anajty ooy may acx tzachyajnibéjtcixy. ¹⁰ Nañ jadu'n tzigiiyb anajty je Jacobo etz Juan je Zebedeo ymang ajcxy huïdibi Simón anajty ti pubety. Chi Jesús ñimay Simón:

—Ca' mdzigïy, jadachambi etz jacnicxni xii tiempo mdunipy jäymadziï.

¹¹ Co je barco yajmeypidzimy, chi ajcxy y'ixmajch tüg'óciy, chi ajcxy panicy Jesús.

Jesús yajtzögy tüg jáy nibützpa'mmiidpi

¹² Chi jadu'n yjajtí co anajty Jesús yjí'mity ma tüg cajt, co ñimiini tüg yéydjic ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, ñimay:

—Huindzin, pen mdzojcpy jébi xyajtzögibich.

¹³ Chi Jesús yci' najtzxajíy ñidoon, ñimay:

—Ndzojcpyich, hui'm huádz.

Chi mic'amy je jäy choocy. ¹⁴ Chi Jesús ane'my, ñimay:

—Ca' ni pin myajnimähuipy, nicx janchtiy nayguëxígiib ma teedy, jaydëbi möhuipy Dios huindzigi'ñ, jadu'n nej Moisés ycötújcin je jécyip y'ane'my, miid yi' ycixpi co ti mhuätzpidzimy, jaydëbi jäy ajcxy nejhuíhuipy co ti mdzögy.

¹⁵ Je capxy'ayuc ñigi y'oc-huäcx'adiitzni, e janch mayjäy y'ocnimújcin, jim pin ayuc midohuaam, e jim huidi tzögaam. ¹⁶ Jesús ycögueecpy anajty je mayjäy, ñicxy anajty mijtiği'duum Dios ojadajtpi.

Jesús yajtzögy tüg jäy cixuxypi tecyxuxypi

¹⁷ Tüg teci yjajtí, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty anajty ti choon Jerusalén. E Jesús ymiid anajty Huindzin Dios ymic'ajt co jäy yajtzögipy. ¹⁸ Chi nijëjity jäy yajja'ty cijx'am tüg pa'mjäy yéydjicpi huidi ca' anajty yci' ytecy yücxy. Chi ajcxy ixtaay ma yajtiçtiği'huipy pidäga'ñ anajty ajcxy je pa'mjäy ma Jesús yhuinduu. ¹⁹ Com ca' anajty ni ma tiği'iydac miid co je tijc anajty ooy y'újtzity miid mayjäy. Chi ajcxy miidpejty tijc nigíxy, chi ajcxy tijc yajcöhuach, e chi ajcxy cödiyñajxy cijx'am je pa'mjäy ma Jesús yhuinduu. ²⁰ Co Jesús ijxy jadu'n nej je' ajcxy ymiibicy, chi ñimay:

—Yëydijc, yajmeecxp mbocy.

²¹ Chi je' ajcxy huidi yaj'ixpijcpy Dios ñecy etz je judío xpicityjc huidi naydíjigixp fariseojäy huinmaygoty, ñayñimáayigixy: “Jada Jesús ooy ycapxtigoy miid Dios. Ni pin yëydijc huaad ca' ti pocymeecky. Tügpaic nHuindzin'ájtım Dios huidi pocyhuinmeecxp.”

²² Jesús ñejhuiy je' ajcxy yjot yhuinma'ñ, paady ajcxy nimay:

—¿Ti mdzachhuinmaayb ajcxy ma mjot mhuinma'ñ?

²³ ¿Ti jactzip co minaanım co ti mbocy yajmeecxy o minaanım: “Pidğ etz nicxni”? ²⁴ Jaydëbi miich ajcxy mnejhuihuipy co iich je' je jäy huidi tzoon tzajpjoty, nmıdich ané'mın etz mic'ajt ya naaxhuiñ jëbi jäy nbo-cyhuinmeecxyich, paady cham nnimäyich yi pa'mjäy: “Pidğ etz yajpidğ mmaabejt, nicx ma mdijc.”

²⁵ Chi mic'amy je pa'mjäy ytinayıgy ma je jäy ajcxy yhuinduu, etz yajpidğy je' ymaabejt ma anajty ycögnäy. Chi ñicxni ma ytıjc, chi ooy cömay jäymejch Dios.

²⁶ Huin'it nidüg'öciy je mayjäy ooy ajcxy jıhuiy, e chi ajcxy ooy cömay etz jäymejch Dios. Chi ajcxy ooy chigıygıxy, ymınaangıxy:

—Cham janchtiy n'ıjxim mijhuinma'ñ.

Jesús huodzoñ je Levı

²⁷ Co jadu'n ytunı yjajti, chi Jesús jim choñ, chi ijxy tüg yajcogüejtpı huidi anajty yxıı Levı. Levı jim anajty iñäy ma yajcogüejttac. Chi Jesús nimay je Levı:

—Pajaamgich.

²⁸ Chi je Levı ixmajztay huidi anajty ytuumyb etz padzoñ je Jesús.

²⁹ Chi Levı mayjäy yajcay yaj'uucy ma ytıjc, cham may yajcogüejtpı ajcxy etz jacjadyıı jäy huidi iñäayb ma yi mesa miid Jesús etz yi' ydiscıpulos ajcxy. ³⁰ Chi je' ajcxy

SAN LUCAS 5:31 24 SAN LUCAS 5:39

huidibi yaj'ixpijcp Dios ñecy etz je ixpicytijc huidi nay-díjigixp fariseojäy tzachni'ameechycápxcixy ni'ojiiygixy je Jesús ydiscípulos ajcxy, yminaangixy:

—¿Na'amy co mgaaygixy m'uuccixy miid yajcogüejtpi etz miid pocyjäy ajcxy?

³¹ Chi Jesús yminañ:

—Ca' yajmayjaty tzoydumbi huidibi ca' ajcxy ypiyüi, jëyi huidi ajcxy píjcp. ³² Ca' ñich ti nmiñich ma je jäy ajcxy huidibi ca' pocy miidüty. ñich ti nmiñich miid yi pocyjäy ycxipi co huen jothuimbijttaaygixy ma Dios.

Yaj'amidooy ajcxy Jesús ti co jäy ajcxy y'ayunas'ájtciy

³³ Chi je mayjäy ajcxy Jesús nimay:

—Nej co yi' (Juan) ydiscípulos ajcxy janam jadozc jaygay y'íjtciy etz ycapxtáccixy, nañ jadu'n je fariseojäy ydiscípulos ajcxy janam jadozc jaygay y'íjtciy. Chi miich mdiscípulos ajcxy ca' ajcxy jaygay y'íjtciy, caaby uucp ajcxy jabom jabom.

³⁴ Chi Jesús yminañ:

—¿Nej jëbi yaj'ayuu'aty jäy ajcxy huidi yajpatpi ma je píjcpí yajnixiiduñ, pen quipxyi yam yajpaady miid je huidibi píjcp? ³⁵ Minamb je xii je tiempo mina je píjcpí yajtzoniyb, huin'it janchtiy ajcxy jëbi y'ayuu'ájtciy.

³⁶ Nañ jadu'n ajcxy yajnimay tüg jihuimbit ayuc:

—Ni pin ca' huaad agiyüy tuc-huit miid jemyhuit, canaan jëyi yciidziip yi jemybi, nañ jadu'n je tucpi ca' oy yhui'mañ miid je jemyhuit agiyi'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yciidziip je tucpi cochac, chi y'ixyojctähuiipy je vino etz je cochac ñitigoydähuiipy. ³⁸ Pidägipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty

ügy vino tiibi yjejni, co jadu'n ymina'n co jac oy je tiibi yjejni.

6

Je discípulos ajcxy yajmújccixy trigo cojc pocxxiiduum

¹ Chi jadu'n yjajti tüg pocxxiiduum co Jesús oy ñaxy ma tüg trigo cam, e yí' ydiscípulos ajcxy oy anajty yajminájccixy trigo tiim, chí ajcxy níxajztüdy, e chi ajcxy jíicxy. ² Chi nidügti fariseojäy yminañ:

—¿Ti co ajcxy jadu'n mduñdigooy co mdúngxixy huidi ca' ñigodúcyity ajcxy mdunipy pocxin xiiduum?

³ Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñyi? ¿Nej ca' mnejhuiiygixy ti David ytuun co anajty yuubögyii etz nañ co ymigügtijc anajty yuubögyii? ⁴ David ytigiiy ma Dios ytijc, chí conigy je tzajcaagy huidibi anajty jiiby ma Dios yhuinduu, chí caay, nañ jadu'n moy je ymigügtijc ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Íich je' je jäy huidibi tzoon tzajpjoty, jébi nnimäyich je jäy ajcxy ti jébi huaad ytúngxixy sábado xii.

Je yéydijc huidibi anajty yci' tídzip

⁶ Chi jadügtecy yjajti tüg pocxxiiduum, co Jesús ytigiiy ma tüg naymujctac, chí jäy yaj'ixpijcy. Jiiby anajty tüg yéydijc huidi y'a'oygi' anajty tídzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögam pocxxiiduum, e je' ajcxy anajty miid ycixpi xihua'n. ⁸ Jesús ñejhuiiyb je' anajty ajcxy yjot yhuinma'n. Chi Jesús nimay je yéydijc huidibi anajty yci' tídzip:

—Pidíg, tinayíg mayjäy'agujc.

Chi je' ytinaay'igy. ⁹ Chi Jesús ymínañ:

—Nyaj'amidohuaamybich miich ajcxy tüg ayuc. ¿Nej Dios ñecy ymína'ñ, jébi oybi nduunim pocxxi'duum o jébi jibicpi nduunim, nyajtzoocim jáy o nyajtigooyim jáy yjugy'ajt?

¹⁰ Chi Jesús ajcxy huindicxpejtay nidüg'óciy, chi nimay je pa'mjáy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huídi yaj'ixpijcp Dios ñecy etz je ixpicytjic huídi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discipulos ajcxy

¹² Jadu'n yjajti huin'it xii Jesús ñicxy mjtig'íduum Dios ojadjtpi. Tüg tzuum ooy Dios mibijctzooy. ¹³ Co yxiimiy, chi Jesús huoomiñ yi' ydiscipulos ajcxy. Chi huin'ijxy je majmetzpi, etz yxiimoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huídi yxiimoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huídi jáy ytijpy Zelote; Judas, Jacobo y'uch; etz Judas Iscariote huídibi ñañ jadu'n Jesús c'íyejc ma ymidzip.

Jesús yaj'ixpicy mayjáy

¹⁷ Chi Jesús miid'idacy je discipulos ajcxy, chi oy yhuäcxipy ma tüg ajoy miid ydiscipulos ajcxy etz mayjáy huídi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjáy co amidoo'idáani Jesús y'ayuc etz ñañ chögaangixy je pa'm huídi ajcxy ymiid. ¹⁸ Cham je huídi anajty ayo'n tzachpaatp miid ca'oybi, ñañ tzoocp je' anajty ajcxy.

¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymiid mic'ajt co jäy tüg'óciy yajtzög.

Je jotcujc'ajt etz je cajotcujc'ajt

²⁰ Chi Jesús huindicxpejtay je mayjäy huidi ajcxy ixpigaam yi' y'ayuc, e ymíñañ:

—Jotcujc miich ajcxy ayoobtjic, com miich ajcxy cham xypaat Dios y'ané'min.

²¹ Jotcujc miich ajcxy huidi cham yuubó'cip, co mgüxiib miich ajcxy. Jotcujc miich ajcxy huidi cham jotmay miid, co ypáadip xii tiempo mina mxondáaccixipy.

²² Jotcujc miich ajcxy mina anajty jäy ca' xy'ixaangixy, co pin xy'ixtjicixipy, e co jäy ajcxy jibic xyñigapxa'ñ xyñixiga'ñ miid iich ycixpi, je jäy huidi tzoon tzajpjoty.

²³ Mxondäg miich ajcxy huin'it xii, etz mjotcugiiygixip, com ooy chachmíjjity huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' isaangixy je huidi anajty Dios y'ayucnajtzcaxiipy.

²⁴ Miich ayoob ajcxy comeñyjäy, com ca' ti jotcujc'ájtin mjacpadaangixy huin'it xii (co Dios tiydunip je naaxhuiñyjäy).

²⁵ Miich ayoob ajcxy huidi cham oc'agujc'ajtp ocjotcujc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajnigapxipy myajnimiydägipy, com jadu'n jecy'ajty miich ajcxy mmij'ap mmijteedy nimay je jäy ajcxy co ooy y'oyjäy huidi ajcxy anajty najtzcaxiib ayuc huidibi ca' ytiy yjanchity.

Nej huaad nmigüg ndzójcm

²⁷ Chi Jesús yjacmíñañ:

—Miich ajcxy huidi cham amido'ijtp iich n'ayuc, iich miich ajcxy nimaayb: Tzójccix mmidzip, mi'oyjäy'ájtciix huidijaty ca' xy'ixaangixy. ²⁸ Migapx je jäy ajcxy miid

oyjot oyhuinma'ñ huidi ajcxy jibic xyñigapxp xyñi'ojiiyb. Mibijctzoogixy yi Dios miid je' ajcxy ycixpi huidibi xyñigapxp xyñi'ojiiyb. ²⁹ Pen ji pin xycojxy ma yi mhuinjijp, mo' jadüg adu'm'amy ahuin hueñ coxy. Pen ji pin xypigaani yi mjocxhuit, jactimmo' mnijen huen yajnicx. ³⁰ Pin xypijctzohuip tijaty, mo'. Pin xypijcip huidi miich mjë'ajtpy, ca' mbijctzohuipy jadüg'oc. ³¹ Nej mdzocy tunipy jäy miid miich ajcxy, nañ jadu'n miich ajcxy mdunipy miid yi' ajcxy.

³² Pen miich ajcxy jëyi mdzojccixpy pinjaty xychojccixp, ¿ti oyjäy'ajtín jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³ Pen mdumyb oybi huidijaty mmiid ooy mnaymigüg'adyii. ¿Ti oyjäy'ajtín jada' miich ajcxy m'ocpáadip? Nañ jadu'n je pocyjäy ajcxy tuñ oybi miid ymigügtijc. ³⁴ Pen myejcpijctzou miid je jäy huidibi miich ajcxy mjijp'ijxpy co nañ jadu'n xymöhuipy tigatii, ¿ti oyjäy'ajtín miich ajcxy mdumyb? Nañ jadu'n yi jibic jäydijc jayejcpí tijaty pijctzoy co nañ jadu'n jijp'ijxcixy co ymöhuipy tigatii. ³⁵ Miich ajcxy, tzójccix mmidzip, mi'oyjäy'ajtcix mmidzip, yajpijctzoogix tijaty, e ca' ni ti mjijp'ijxcixipy co ajcxy jac mij mbaadip. Jadu'n miich ajcxy mij mbaadip oy'ajtín e mnaydijiiyb ajcxy je mijpi Dios y'ung. Com Dios pa'ayoodaayb tüg'óciy yi jäy ajcxy huidibi ca' ti jäygidägy, etz huidi jibicjäy. ³⁶ Miich ajcxy pa'ayoo migügtijc ajcxy, jadu'n nej mDios Teedy tzajpjo-typi ypa'ayooy huenytimpíñity.

Ca' mmigüg ni ti myaj'ix'ixipy myajpa'ixipy

³⁷ Ca' mmigüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigüg mbocy'ixipy, e huin'it ca' pin xypocy'ixipy. Huinmecx mmigüg, e huin'it nañ jadu'n Dios myajhuinmeecxip. ³⁸ Mo' mmigüg etz

huin'it miich ajcxy Dios xymöhuipy quipxy ooy tijtäch etz janch yajxon y'újtzity cödinaayb. Com yi quipxi'n tiibi myajquipxiy, nañ yi' miid xyquipxhuimbidipy.

³⁹ Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi hu-
jtzyöyñi? ¿Nej ca' mdijy nimetz yjutcögägixipy? ⁴⁰ Ca' ji
ni tüg ixpijcpí huidi nigí ixpícyip ca'ydi yhuindzin, pen ji
pin huädz yjadim'ixpicy najtzpadihuipy yhuindzin.

⁴¹ ¿Na'amy co mic'amy mbocy'ixy mmigüg co hueeni
ytundigoy, e miich jac mij ooy mdundigoy, e ca'
mjihui'nybicy? Tim jadu'n nipaady nej jihuüy ti m'ixy
pi'cpüx ma mmigüg yhuin, e ma miich mgi'mhuiin jac
jiiby mij quipy, e ca' m'ixy je quipy ma mgi'mhuiin.

⁴² Ca' huaad mnimähuipy mmigüg: “Nayyegü miñich
püx n'ocyajpidzim maabi mhuiin”, e miich ca' m'ijxy mij
quipy ma mgi'mhuiin. Jibicjäy miich. Jayijp miich mya-
jhuädzip mjot mhuiinma'n, huin'it jëbi mmigüg m'ihuüjip
mgapxhuüjip, jadu'n nipaady nej jihuüy ti myajpidzimy
je quipy maabi mhuiin, jachuädz m'ijxigipy e chi jëbi yi
pi'cpüx myajpidzimy maabi mmigüg yhuin.

Je quipy je ytiim, yi' miid ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca'
jibicjäy huidi oy tuum, tim jadu'n nipaady nej tüg quipy.
Ca' ji yi' oyguipy huidi jibic tiim'ajt, nañ jadu'n ni ca'
yjibicquipyity huidi oy tiim'ajtp. ⁴⁴ Com ni je' quipy
yaj'ijxcapj miid ytiim ycixpi. Ca' pin higuery tiim tucy ma
quipy apymiidpi. Nañ ni pin ca' uvas cha'm piy ma aadz
apymiidpi. ⁴⁵ Je jäy oyjäybi ma yjot yhuinma'n yajpidzimy
oybi. Je jibicjäybi ma yjot yhuinma'n yajpidzimy jibicpi.
Huidibi yhuinmaayb jotjoty huinma'nyjoty yi' ycapxyp.

Je mejtnajxpi poch y'ijx

⁴⁶ Chi Jesús yjacmínañ:

—¿Nej co nigo mínaangixy: “Huindzin, Huindzin”, ni ca' ajcxy mdúngixy huidi nyajnímaaygixpy? ⁴⁷ Tüg'óciy jáy huidi xyñimimbich etz xymidoohui ñich n'ayuc etz cuyduñ, ñich nyajni'ixíhuipy pin je' ymidügnax. ⁴⁸ Quipxyíyb tüg yéydíjc huídibi ytíjccoyp ma tzaa nícxy, chi nidajíy ooy cíicy, chi pídagy poch'íjx tzaa nígíxy, co mijní ycomy nímíñ je tíjc, míd tüg'óciy ymíjaa jayajpídíga'ñ je tíjc, e ni ca' jadu'ñyi jayyücx, com tzaagíxy anajty ypojtztzooñity. ⁴⁹ Yi jáy huidi mídoob ñich n'ayuc e ca' cuyduñ, mídquipxíy jadu'n yi' nej tüg yéydíjc co tí ytíjccoyp. Ni ca' poch cíicy ypojtztzooñity, jéyi naaxhuingíxy nidajíy hueeni. Co je mijní ymíñ míd ymíjaa, chi jajpídígy je tíjc, chi oy yhuindígoydáy.

7

Jesús yajtzögy tüg mijtungmíidpi Romano ytumbi

¹ Co Jesús ycapxtaay ymíydactaay míd je mayjáy huidi anajty jím amído'íjtp, chi ytígiy jím Capernaum. ² Jím anajty tüg Capítán tüg ytumbi hue' anajty píjcip, janch tím ögaaníp anajty, e je soldado huindzin ooy anajty tzocy je ytumbi. ³ Co je capítán ayuc mídooy jadu'n nej Jesús ytuñ, chi quejxy judío mijjáydíjc, huen nícxy minuucxtaaccixy Jesús co je' ymíniy ma ytíjc yajtzögíyib je' ytumbi. ⁴⁻⁵ Chi je mijjáydíjc ajcxy ymíñ ma Jesús, chi ajcxy cohuaníy ooy, píjctzou may'ajt, nímay:

—Jadayaabi capítán ymíhuaad co mbubedípy, com jajmíj'ajtpy ñich ajcxy ngajp, tí coyp ñich ajt naymujctac.

⁶ Chi Jesús nícxy míd je' ajcxy. Co ajcxy míhuingooñ je tíjc, chi je capítán quejxy ymígüg huen nícxy jíjpcobadíy Jesús, nímahuípy:

—Huindzin, ca' nej mnayjihuiyii, ca' iich mihuaadity co mdigihuiipy ma iich ndijc. ⁷ E paady ca' iich njot ti mictuñ co iich miich ci'm n'icx n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n iich nmüidich soldados ajcxy huidi ajcxy xycapxcöbijcpich. Nimäyich tüg: “N'icx”, e n'icxp; nimäyich jadüg: “Min”, e mimb; nimäyich ndumbi: “Tun jada”, e ytumyb.

⁹ Co Jesús midoy nej je capitán yminañ, chi jihuiiy ooy, chi ni'ijxhuimbijty nimay ajcxy huidi pamiinip:

—iich miich yim nimaaygixyp co ca' nbaadyich Israel jäy huidibi xymib'ijcpich jadu'n nej jadayaab agatz jäy.

¹⁰ Co ajcxy je quexyöybi yhuimb'ijtcixni ma je tijc, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tiibi anajty y'ögy

¹¹ Chi jadu'n yjajty huin'it xii co Jesús anajty ñicxy ma tüg cajp huidi anajty yxii Nañ. Müid anajty ñicxy jadyii ydiscípulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jäy ajcxy, ñicxy anajty ajcxy tüg öcpi yajnaaxtigiiygixy, huidi anajty ungdaj tügpajc y'ung'ajtpy. Hue' je' anajty co'ögy je töxyjäy, e müid anajty ñicxy maycajpyäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi cinyñicxp. Chi Jesús yminañ:

—Yëydijc, iich miich yam nimaayb, pidäg.

¹⁵ Chi je yëydijc inayigy huidi anajty ti y'ögy, e ytigiiy miydaacp. Chi Jesús yajc'idigiiyñi je' ytaj. ¹⁶ Chi ajcxy nidüg'óciy ooy ñay'adzigygoti, e Dios jäymejch cömay, yminaangixy:

—Tüg mijpi Dios tiy'ajtmütpi cham yajpatp ma iich ajt. Nañ jadu'n ajcxy yminaangixy:

—Ti Dios ni'ijxcidägy yi yñaax ycajp.

¹⁷Ooy Jesús yajcömay ma tüg'óciy Judea naaxjot, etz ma tüg'óciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy huidi anajty Juan je Bautista yaj'ixpijcpy nimiydactay jadu'n nej miid ytuni yjajti Jesús. Chi Juan huooy metz yi' ydiscípulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huidi anajty miinaam, o pen n'ahuíjxpy ajcxy huingbi. ²⁰ Chi je Juan yquejxyöybi miin ma Jesús nimay:

—Yi Juan je Bautista iich ajcxy ti xyquéxyich ma miich amidohua'n pen miich je' je Cristo huidi minaamb, o ¿n'ahuíjxpiich ajcxy huingbi?

²¹ Tim huin'ítiy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miid ma yjot yhuinma'n. ²² Chi Jesús je Juan yquejxyöybi nimaayi:

—Nícx nimaaygix je Juan jadu'n nej ti m'íjxcixy ti mmidoogixy, co yi huintzpi ti yhuindicxígy, yi tecyma'tpi ti yöyígy, yi nibützpa'mmiidpi ti chögy, je cönatpi ti ymidohuicxixy, je öcpi ajcxy ti yjugypijcy, e ngapx-huäcxyich oybi ayuc ma ayoohtjc. ²³ Jotcujc yi' ajcxy huidi ca' huinma'ñtyigooygixy miid iich ycixpi.

²⁴ Co je Juan yquexyöybi yhuimbijttay, chi Jesús nimiydaccoty je Juan ma je mayjäy ajcxy, yminañ:

—Co ajcxy ti m'oy mijtigíduum, ¿ti ti m'íjxcixy? ¿Nej ti m'íjxcixy tüg jäy ametz jotmetz, jadu'n nejhuíy tüg nähuaax huidi pojmiimb pojxijp? ²⁵ Chi jada', ¿ti oy ti

m'íjxcixy? ¿Tüg yëydijc huidi miid oy y huit yxöxyity? Yi jäy ajcxy oy yxojxypí huidi agujc jotcujc tzinaaygixp hue' ajcxy yajpaady ma yi rey ytijc. ²⁶ ¿Ti ajcxy ti m'ixy jim mijtigíduum? ¿Tüg jäy huidi Dios ytiy'ajt miid? Janch ti m'íjxcixy tüg Dios ytiy'ajtmíidpi, etz jacnīgi ymíjity je' ca'ydi Dios y'ayucnajtzcaxiiby huidi jecy'ajty tzinay. ²⁷ Je' jada je jäy huidi Dios ñigapxyp ma ñecy ma Dios jadu'n yminañ:

Cham nguejxyich ñich nguexyöybi jayijp ma miich, je' yaj'oyíhuip je jäy ajcxy yjot yhuinma'ñ miid ñich ycixp, tim jadu'n nipaady nej jihuüy jäy tü'aa yaj'oyiy co rey ymina'ñ yjada'ñ.

²⁸ ñich miich ajcxy yam nimaayb co huidijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxiiby huídibi jacnīgi ymí jity ca'ydi Juan, je Bautista. Chi jada' je jac mutzpi huidi jiiby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yacogüejtpidijc ajcxy huidi anajty ñiibéjtcixy ma Juan, chi ajcxy minañ co Dios ytudägyity. ³⁰ E je fariseos ajcxy etz je escribas ajcxy huidi anajty ca' ñiibéjtcixy ma Juan, ca' ajcxy mijpidacy huidi anajty Dios ytunamy miid je' ajcxy ycixpi. ³¹ Chi je Huindzin Jesús yminañ:

—¿Ti miid nyajquipxíhuibich jadyaabi jäy huidi tzinayb ma jadachambi tiempo? ¿Huidi miid nya-tügíhuibich? ³² Jadu'n nej pi'ctijc huidi ajcxy iyíiyb ma jäy yjuygixy ytooccixy. Mijhuan mijjihuiygyxy ymígügtijc: “Ti njayaxüxich flauta e ni ca' ti m'éjtzcixy; ti nja'íhuí ajcxy iy jotmaymiidpi, e ca' ti myaaxcixy.” ³³ Chi Juan je Bautista ymiiñ, e je' ca' anajty cay, ni ca' vino ügy, chi miich ajcxy minaangixy co Juan ymiid ca'oybi. ³⁴ Chi ñich, je jäy huidi tzoon tzajpjoty, nmiñich, chi

caaybich uucpich, e miich ajcxy minaangixy: “Ijxcix, cha tüg yëydijc janch cax janch vino uucp, huidi migüg'ajtpy yajcuëjtpidijc etz pocyjäydijc.” ³⁵ Je tiy'ajt ji je' ñiguëxigy ma je pinjaty nigapxp nimiydaacp tiy'ajt.

Jesús ma Simón je fariseojäy ytijc

³⁶ Chi tüg fariseojäy may'ajt pijctzoy, co Jesús anajty miid ycaya'ñ. Chi Jesús ytiigiyy ma je fariseojäy ytijc, chi ññay'ahuüyy ma mesa. ³⁷ Chi jim anajty tüg töxyjäy huidibi anajty jibic tzinaayb jibic jugy'ajtp ma je jimbi cajp. Co je' nejhuiyy jiiyby Jesús ma fariseojäy ytijc ññay ma mesa, chi mimiññ tüg quig aceite huidibi ooy oy xuugy, chi midigiyy tigoty. ³⁸ Chi ypiquetz'ahuüy ma Jesús ytecy ymijc, e chi yajxooci Jesús ytecy miid huinnii e yajpöt miid ycöhuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huidibi anajty ti huoy Jesús, chi jot'ajti yminañ:

—Co ixypy jada Jesús y'ocjëjity Dios ytiy'ajtmiiðpi, y'ijxajpy ixypy pin jäy nejpy jäy yi töxyjäy huidibi niidoonip co yi' yjibictzinäy yjibicjugy'aty.

⁴⁰ Chi Jesús yminañ:

—Simón, cham iich tüg ayuc nmiiðidyich huidi nyajnimähuamy.

Chi je' y'adzooy:

—Yajnimaaaygich, Huindzin.

⁴¹ Chi Jesús yminañ:

—Tüg comeeñjyay ymiid anajty metz jäy huidi ti ñu-ucxy. Tüg jäy anuucxy migoox migo'px denario meeñ, e je jadügpí anuucxy huixchigui'px majc. ⁴² Com je' ajcxy ca' anajty miidity ti miid cuedip, chi je comeeñjyay huinmecxy nimetz. Miich ocñimaaygich, ¿je metzpi jäy huidi nuucxy, huidibi je' nigí chojpy?

⁴³ Chi Simón y'adzooy:

—Hue' n'a'ixiyyich je t̃ibi huinmecxy jac'anaxy.

Chi Jesús yminañ:

—Ti mdiygapxy.

⁴⁴ Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadayaabi töxyjäyi? Co ndigiyyich ma mdiyc, ca' miich nii xymooyich co ndecy nbújibich. Jadayaaabi töxyjäy iich ndecy ti xypújip miid yhuinni, e ti xyméexyich ndecy miid ycöhuay. ⁴⁵ Ca' iich miich ti xychücx. Jada töxyjäy jadu'n nej ti ytijc tigiy, xychücxtyyb iich ndecy. ⁴⁶ Iich miich ca' aceite mbidägy ma iich ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷ Paady iich miich nyajnimäy co jada töxyjäy huinmecxi yi' ymaybocy, co t̃ibi oyhuinma'ñ yajtuñ cixyjot huinjot. Pinjaty hueeni ypocy yajhuinmecxi, hueeni yi' chójcin yajniquëxgy.

⁴⁸ Chi Jesús je töxyjäy nimay:

—Ti miich mbocy yajhuinmecxtäy.

⁴⁹ Pinjaty anajty ñaayb ma je mesa ñayñimáayigixy miñ xyipy:

—¿Pin jäy jada jada' co nañ yhuinmecxiy jäy ypocy?

⁵⁰ Chi Jesús nimay je töxyjäy:

—Ti m'alma ñdzögy co ti xymibicyich. Nicx jotcujc.

8

*Töxyjäy*dijc huidibi anajty Jesús pubejtj

¹ Co jadu'n yjajt̃i, chi Jesús ñicxy ma tüg'óciy je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscípulos ajcxy miid ñicxy. ²⁻³ Etz nañ ymiidnicx nijējity töxyjäydijc huidi anajty Jesús ti yajtzögy huidi ca'oybi anajty ymiid etz jac tijaty pa'm. Hue' je' ajcxy anajty je María je töxyjäy huidi anajty xijjip Magdalena, je huidibi Jesús yajpidzimi huixtujc

ca'oybi ma je'; etz Juana, je huidibi ñāy anajty xiijip Chuza, e je Chuza hue' je' je rey Herodes ytungmiidpi; etz Susana, etz jacjadyii ajcxy huidi anajty ajcxy pubejt Jesús miid tijaty anajty ajcxy ymiid.

Je niipi y'ijxpejt

⁴ Co mayjäy ooy ñayyöymujc ma Jesús yhuinduu huidi tzoon ma tüg tüg cajp, chi Jesús nimay je mayjäy ajcxy:

⁵ —Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tñm huijpi. Co je trigo tñm huijy, chi nijējity ypajc oy ycäy mijtügujc, chi je jäy ajcxy yajhuägpejty, e huidi ca' yajhuägpejty, chi joon piihuigy.

⁶ Chi nijējity trigo pajc oycäy ma tzaa ñicx. Co ymujxy chi je' ytiich, je' co anajty naax ca' yxoogity. ⁷ Chi nijējity trigo pajc oycäy ma apyot, chi ymujxy quipxy miid apy'ung, chi y'ujtz'o'tcay. ⁸ Chi nijējity trigo pajc oycäy ma je naax oybi huinnätzucj, chi ymujxy, chi yeectzooñ, ytiim'ajty oyjaty, tüg trigo pajc migo'px oyco'ity.

Co Jesús je miydägiñ yajmay chi yjactimcapxcoty, yminañ:

—Pñ midohuamb jada ayuc, huen midooy.

*Nej yhuimb*idzimy je niipi y'ijxpejt

⁹ Chi je discipulos ajcxy y'amidooy:

—¿Nej jada jadu'mbi jihuimbit ayuc yhuimbidzimy?

¹⁰ Chi Jesús yminañ:

—Miich ajcxy jaydēbi mnejhuñhuipy huidi Dios ñigapxpy ñimiydacpy coyüch'amy ma y'ané'min ycötújcin. Jacjadyiibi jäy jihuimbit'amy nyajnimayich, jaydēbi pinjaty huidi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbidzimy: Je trigo pajc Dios je' y'ayuc. ¹² Je trigo pajc tiibi tügujc ycäy, je' je' jadu'n nej jäy huidi midoob Dios y'ayuc, chi mic'amy ñiminyi je ca'oybi, e piibidzimdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajnidzögyii. ¹³ Je trigopajc huidi cähui ma tzaajot, je' yi' ajcxy huidi je ayuc midoob, chi cöbicy jotcujc, chi je' ca' ytictztigäy, tzojccíxy y'ocmibicy, co agapxiyb paaty chi ixmajtzní. ¹⁴ Je trigo pajc huidi ti cähui apy'agujc, je' je' ajcxy huidibi midoob, chi co ñicxni jäydigooyñi Dios y'ayuc miid jotcujc'ájtín tzaaayín etz jugy'ájtín etz comeen'ájtín, e chi ca' Dios y'ayuc yhuí'my ma yjot yhuinma'ñ. ¹⁵ Je trigo pajc huidi cähui ma oyñaax huinnätzcujc, je' ajcxy huidi oy etz tudägy yjot yhuinma'ñ miidíty. Chi je Dios y'ayuc midohuí'my, e oñdägy'amy Dios y'ayuc ymayíy ma yjot yhuinma'ñ.

Je lámpara ñi'ijxpejt

¹⁶ Co jäy ajcxy jündicxi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätcí'py, hue' janchtiy pidaaccixy ma jündicxpejt, co pin ytigíy jébi ixty je jün. ¹⁷ Ca' ni pin ayüch tunípy e nicxy ycayajnejhuíy, ca' ni pin ti tunípy ameech e nicxy ycaniquëxígy. ¹⁸ Paady miich ajcxy midoogix yajxon co pin tijaty miid, jacyajmöhuiþ yi'. Pin ti camíid, yajpiþipy je' huidi anajty yjamiid.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tiba'y, miich ajcxy xyjamiþapxam.

²¹ Chi Jesús yminañ:

—Yi jäy ajcxy huidibi Dios ayuc midoohuiipy etz cuy-duunip, yi' iich ndaj'ájtypich etz n'uch'ájtypich.

Jesús yajxemy je poj etz je nii co anajty chachpidígy

²² Chi tüg teczy yjajti Jesús ytiígy ma tüg barco miid ydiscípulos ajcxy, chi Jesús ymíñañ:

—Tzoc jim'amy ñinaxy nájxim.

Chi ajcxy chooñ. ²³ Chi ñiigujc anajty níxcixy co Jesús ymi'ögy. Chi tüg mic poj miñ ma je mejy. Chi je barco ñii yajtiígyíyí, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyücxycy ajcxy nimaaygixy:

—¡Huindzin! ¡Huindzin! Cham ajt n'ocquiniim.

Co Jesús oy ymäyhuijy, chi jipcogapxiy je poj etz je mejy co anajty chachmijjétpety ma barco. Chi je poj yhuäcxijptay, y'amoonday. ²⁵ Chi Jesús ymíñañ:

—¿Ma miich ajcxy je mmibíjcin?

Chi ajcxy yjanchchigiygoty janch yhuinmay ajcxy ñayñimáayigixy miñ xyipy:

—Pin yëydijc jada jada' co je poj etz nii jiguexy, etz yajhuäcxipy, etz ycapxycöbigyii.

Je Gadarajäy huidibi anajty ca'oybi miid

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mijlaguunba'. ²⁷ Co Jesús ñiibidzimy, chi jipcobadiy tüg yëydijc huidi anajty ti choñ ma je Gadara cajp. Je' anajty ymiid ca'oybi, ti anajty yjejni maabi ypadyii. Ca' je' anajty huit yajtuñ, nañ ni ca' anajty chinäy ma ytijc, öcpijut anajty yajtzinähuiyb. ²⁸ Co je' ixpaty Jesús, chi yaaxqueecy, e ycoxtinay'ahuíy ma Jesús yhuinduu, ymíñañ janch mic:

—¿Ti iich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachytúñich.

²⁹ Jadu'n minañ com co anajty Jesús ixquexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymigügtijc ymiid'adyii miid cadena. Janch ypojtpy cadena, chi ca'oybi anajty yajnicxyii mijtigüduum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi yminañ:

—Hich nxii Legión (hue' yhuimbizimy nimay).

Jadu'n minañ com nimay anajty ca'oybi ti ytigüygixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjüxcixy ma je ujtzjot. Chi je ca'oybi may'ajt pijctzoy co huen yajtigüyihuipy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytigüiy ma je may'idzim. Huin'it je may'idzim ñayña-jtzjibibiyaayi ajcxy ma tüg ahuoc, chi oy ajcxy ycädäy niijoty, chi y'ögtay.

³⁴ Chi je idzim cuend'ajtpi ajcxy co ixu jadu'n nej ti yjadyii miid ajcxy y'idzim, chi ajcxy yqueecy, oy nimiyaaccixy cajpjoty etz majaty tundac. ³⁵ Chi mayjäy ajcxy chooñ oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjäy ajcxy paty je yëydijc, tiibi anajty ca'oybi ñibidzimyii ycöbidzimyii, iñay ma Jesús yhuinduu, huit miid etz huijy quejy, chi ooy je jäy ajcxy chigüiy. ³⁶ Chi pinjaty ajcxy ijx miid miydacy jadu'n nej y' choocy, je jäy huidi anajty ca'oybi miid. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigüygixy. Chi Jesús ytigüiyñi barcojoty yhuimbijtni. ³⁸ Chi je jäy tiibi anajty ca'oybi ñibidzimyii ycöbidzimyii pijctzoy may'ajt co miid'idan Jesús. Chi Jesús miid capxycijxy, nimay:

³⁹ —Nihuimbit mdijc, etz nimiydäg jada mijpi tung huidibi Dios ti tuñ miid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ miid je' ycixpi.

Je Jairo ñix etz je töxyjäy huidibi Jesús yhuitpa' nïdoni

⁴⁰ Jadu'n yjajtì co Jesús yhuimbijty co chooñ Galilea, chi je jäy ajcxy cöbijcy Jesús janch agujc jotcujc, com nidüg'óciy anajty ooy jijp'ljxcixy. ⁴¹ Chi tüg yëydijc huidi anajty yxii Jairo huidibi anajty mijtungmiid ma judíojäy ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymiid anajty tügpaic ñix, hue' anajty yjimijt majmetz, janch tim ögaanip anajty. Co Jesús ñicxy miid je', chi janch mayjäy anajty chach'adijïyii chach'agodïyii.

⁴³ Chi tüg töxyjäy huidi anajty yxii ybo', ca' anajty y'oc-huäcxipni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzoydumbi ajcxy, etz ni pin anajty ycayajtzögyii. ⁴⁴ Chi je töxyjäy nimijhuägy je Jesús, chi nïdoni yhuitpä. Janch mic mic je yxii ybo' oy yhuäcxipy.

⁴⁵ Chi Jesús yminañ:

—¿Pin xyñidoñ iich nhuit?

Chi ajcxy y'adzooy co ca' pin. Chi Pedro etz tüg'óciy miid je' yminañ:

—Huindzin, jäy ti xy'adijïy ti xy'abodïy etz miich mina'ñ: “¿Pin ti xyñidoñich?”

⁴⁶ Chi Jesús yminañ:

—Nidügti ti xyñidoñich. Nnejhuüybich co miid nmic'ájtich ti nyajtzögyich pinjaty.

⁴⁷ Co je töxyjäy jihuiy co ca' coyüch yhui'ma'ñ, chi nimiiñ janch tziyuuyb. Chi yhuindacy ma Jesús yhuinduu,

chi capxpídzimiy mayjáy'agujc ti ycixpi anajty co ti ni-dooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjáy:

—Töxyjáy, ti mdzögy co ti xymibicyich, nicx jotcujc.

⁴⁹ Yam Jesús anajty ycapxpy, co ymiin tüg jáy huidi anajty ti choon ma Jairo ytijc; je Jairo nihuindzin'ajtp anajty je judiojáy naymujctac, chi nimaayi:

—Ti y'ögy miich mniix, ca' mjac'amayïy nigi yi Huindzin Jesús.

⁵⁰ Co Jesús jadu'n midooy, chi yminañ:

—Ca' mdzigïy, mibijcich janchtiy, etz tzögip yi mniix.

⁵¹ Co Jesús ytigïiy ma je tijc, chi ca' a'ixiyy nicxy ytigïy hueñypinity miid je'. Jëyi Pedro, Jacobo, Juan etz je töxy'anäg ytaj yteedy ytigïy miid Jesús. ⁵² Chi tüg'óciy je mayjáy ajcxy janch yaaxp, janch ñé'mgixy miid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³ Chi niñoob ajcxy nixiicy com ti anajty nejhuïyigixy co ti y'ögni. ⁵⁴ Chi Jesús majch je töxy'anäg ma yci', chi migapxy mic, yminañ:

—Töxy'anäg pidïg.

⁵⁵ Chi je' yjugypijcy, e mic'amy ypidïgy. Chi Jesús yminañ co huen yajcaaygixy yaj'uuccixy. ⁵⁶ Chi ytaj yteedy ajcxy ooy chigïy yjihuiy. Chi Jesús nimay co ca' huaad pinjaty miidmiydägipy jadu'n nej ti ytuñyii yjadyii.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújcín co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n

nej Dios y'ane'my, etz yajtzooccixy pa'mjáy. ³ Chi Jesús yminañ:

—Ca' ni ti tü'amgixpi mminícxcixy; ni mgaminícxip mdajc, ni mmorral, ni mgaagy, ni meeñ, e ni mgaminícxcixipy ajcxy metz mhuit. ⁴ Huen tím huidi tijc ma anajty mdigüygixy, jim ajcxy huí'mgixipy, e jim ajcxy nayyöyhuäcxiiyb. ⁵ Hueñyama'amyity ma ca' jäy xycöb'jccixy, co ajcxy mbidzím'gixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jäy ajcxy.

⁶ Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzooccixy pa'mjáy hueñytimma'amyity.

Co Juan el Bautista y'ögy

⁷ Je rey Herodes co nejhuiiy jadu'n nej Jesús anajty mijhuinma'ñ tuñ, chi ooy anajty tzachnejhuñhua'ñ pin je' anajty. Com nijëjity jäy anajty yminaangixy co ti Juan jugypicy. ⁸ Chi jacnaagity yminaangixy co Elías ti ñayguéxgyii, e jacnaagity yminaangixy co tüg Dios y'ayucnajtzcaxiiybi je' ti yjugypicy huidi jecy'ajty octzinaybi. ⁹ Chi Herodes yminañ:

—ñich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi ñich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmiidmiydactay ajcxy Jesús tüg'óciy tiibi anajty túngixy. Chi ac jëyi ydiscípulos miid'ajty Jesús mijtigüduum huingon ma tüg cajp huidi yxii Betsaida.

¹¹ Co je mayjäy ajcxy nejhuüiy, chi ajcxy panícxy Jesús. Chi Jesús je mayjäy cöbijctay etz yajmüidmiydacy ajcxy Dios y'ayuc ytiy'ajt nej ané'min cötújcín müidity. Jesús nañ yajtzöcpy anajty huidijaty yajtzoyíhuaam.

¹² Co oy chu'íyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycijxni müid jadayaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaaygixy jättac etz jim ajcxy paadipy caayin uucin. Com hue' jada it ma íich ajt yam nyajpaatim mijtigüduum.

¹³ Chi Jesús yminañ:

—Mooygix miich yi' ajcxy ycaayin y'uucin.

Chi je' ajcxy y'adzooy:

—Jëyi íich ajcxy nmüidityich migoox tzajcaagy e mejtz acx, nigo co ca' íich ajcxy njuy caayin uucin müid jadayaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús conëgy je migooxpi tzajcaagy, etz je metzpi acx, chi ypa't'ijxy tzajpcíxy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäcxixy ma tüg'óciy mayjäy. ¹⁷ Chi ajcxy ycaayin cüxyi, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸ Chi jadu'n yjajti co Jesús anajty ycapxtägy ahuingujc müid je' ydiscípulos ajcxy, chi Jesús je' ajcxy y'amidoy:

—¿Pín íich jäy xytijy?

¹⁹ Chi ajcxy y'adzooy:

—Nijëjity jäy xytijy co miich je Juan je Bautista; nijëjity yminaangixy co miich je' Dios y'ayucnajtzcaxhiybi huidi jecy'ajty tzinay e ti yjugypicy.

²⁰ Chi Jesús yminañ:

—¿Miich ajcxy, pin iich miich ajcxy xytijcixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹ Chi Jesús pidacy ané'min etz cötújcín co ca' ajcxy ni pin yajnimähuip co yi' je' Cristo. ²² Chi Jesús yminañ:

—Ooy ycopícyity co iich, je jäy huidi tzoon tza-jpjoy, canaag nax ayo'n nbáadibich, ca' xymijpidägibich je mijjäydijc, je teedy tungmiidpi, etz je' ajcxy huidi yaj'ixpicy Dios ñecy, e co n'ögip njugypigípyich codugiig xñ.

²³ Chi Jesús nimay ajcxy nidüg'óciy:

—Pen ji pin xypanícxa'ñich, huen jäydigoydäy yci'm tzójcín etz huen xypanícxyich jabom jabom, oy nej ytimyjadípy ytimy'ayoohuipy, tím nipaady nej jihuüy ti cabígy mgruudz jabom jabom etz pajamgich. ²⁴ Huen pinjäy huídibi ca' yega'ñ yi yjugy'ájtín ma yi o'cín miid iich ycixpi, hue' je' yajtigoyamy yi' yjugy'ájtín. E huen pinjäy huídibi yegamy yjugy'ájtín ma yi o'cín miid iich ycixpi hue' je' ypadamy yi jugy'ájtín. ²⁵ ¿Ti tüg jäy ypatpy, pen ti paady tüg'óciy cohuit'ájtín comeen'ájtín ya naaxhuiñ e nayyajtigoyii, etz ca' y'alma yajnidzögy?

²⁶ Yi jäy ajcxy pinjaty xymidzöydúnibich n'ayuc, iich je' je jäy huidi tzoon tzajpjoty, nañ nmidzöyduniyibich je' ajcxy co anajty nhuimbityich ya naaxhuiñ, miid iich n'ané'min etz nmic'ajtich etz nDéedyich y'ane'm'ajt, etz ymic'ajt, etz miid je ángeles ajcxy ymic'ajt huídibi huádz yjot yhuinma'ñ. ²⁷ Janch iich miich ajcxy nimäy co ji jäy

ma miich ajcxy huidibi ixipy Dios y'ané'min jayijp ca'ni anajty y'ögy.

Jesús yajtigach je ñinïcx

²⁸ Chi miductujc xiibi maabi anajty jada ayuc jadu'n capxy, Jesús huodzooñ Pedro, Juan etz Jacobo, chi miid'ajtpy jim ma tüg copjijp Dios mibijctzoob. ²⁹ Yam anajty Dios ooy mibijctzoy, co Jesús yhuiniyjijp oytigach, e je yhuit yajty janch poob janch adiicxp. ³⁰ Chi metz jäy ñayguëxici, miidgapxy miidmiydägy Jesús, Moisés je' anajty etz Elías. ³¹ Huidi ajcxy naygëxici janch jühuidityi anajty ajcxy je tücxin jájin miidity, nigapxcixy nimiyaaccixy je o'cin huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijicixy, ijxy ajcxy Jesús y'adiicxin y'ajajin, etz ñañ jadu'n ijxy ajcxy je nimetzpi jäy ajcxy huidi anajty Jesús miidmiydäcxy. ³³ Jadu'n yajty co yi jäy ajcxy puyöyduutni Jesús. Chi Pedro Jesús nimay:

—Huindzin, jotcujc ñich ajt ya. Tzoc tugüg tijc yaj'oyiim, tüg miich mjëdiiby, jadüg Moisés jëdiiby, etz jadüg yi Elías jëdiiby.

Pedro ca' anajty nejhuiy ti ycapxy. ³⁴ Yam niigi anajty ycapxy co joc ñaaxcidacy huidi yajniidigoy je' ajcxy. Chi ajcxy ooy chigiïy co oy joc yajniidigoydáayigixy. ³⁵ Chi tüg ayuc yajmidooy ma je joc yminañ:

—Ñich jada n'ung'ajtpy, ooy ndzocyich njihuiyich. Amido'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhui'my, chi ajcxy ñañ jadu'n amoñ. Hui'nit xi ni ca' ajcxy miydacy miid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi miid

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijpcobadiyii. ³⁸ Chi nidügti jäy ycapxy janch mic, yminañ:

—Huindzin tun may'ajt ix ñich n'ung, yi' ñich tügpajc n'ung'ajtpy. ³⁹ Huen mináajity ca'oybi ymachyii, chi timetiini yaaxquëgy yajyachyii yajquidyii, etz yajpidzimy oy yhuin'opy y'aa'opy e adzaach y'ixmachyii. ⁴⁰ Ti ñich may'ajt nbijctzooyich ma yi mdiscipulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús yminañ:

—¡Miich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! ¿Naag xii ñich njac'idipy ma miich ajcxy nmimecxtújccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ooy je ca'oybi, e yajtzoocy je yeeg'anäg, chi yteedy yajc'idigiiyñi. ⁴³ Chi tüg'óciy je mayjäy ajcxy ooy chigiiy miid je mijhuinma'ñ huidi Dios ytuun.

*Jesús capxp*idzimy jadüg'oc co y'öga'ñ

Jesús ydiscipulos ajcxy ooy jihuiiygixy huinmaaygixy co Jesús jadu'n yminañ:

⁴⁴ —Miich ajcxy yajxon mido'mbijccix jada ayuc. ñich je' je jäy huidi tzoon tzajpjoty, hue' nyajcïyega'ñich ma pocyjäydijc ajcxy yci'am.

⁴⁵ Je' ydiscipulos ajcxy ni ca' anajty huinjhuuiiygixy, tzigiiyb anajty ajcxy, paady ca' ajcxy jaty nej yaj'amidóogixipy.

*¿P*in je' nīgi jacmijip?

⁴⁶ Chi Jesús ydiscipulos ajcxy ytigiiy huinmay'ahuidijtp, nejhuñhuaangixy pin je' jacmij'idam. ⁴⁷ Jesús nejhuñy je'

ajcxy yjot yhuinma'n̄ huidi nayyajmiidmiydáacip ajcxy, chi tüg pi'c'anäg huijtzïgy, ypidacy ma ymïjc. ⁴⁸ Chi Jesús yminañ:

—Pïnjaty xycöbïjcpïch jadu'n nej jada pi'c'anäg xycöbicyich miid ïch nxïi ycïxpi, ïch yi' anajty ti xycöbicyich; je huidibi ïch xycöbïjcpïch, cöbïgiib je huidi ti xyquexyich ya naaxhuiñ. Yi' huidibi jacmútzïp ma miich ajcxy, yi' je' jacmïjpi.

Pïn ïch ajt ca'p xymïjotma'tim, je' ajt xymïjnicxpejtim

⁴⁹ Chi Juan yminañ:

—Huindzin, ti ïch ajcxy n'ïjxcïxy co tüg jäy ti yajpidzïmy ca'oybi miid miich mxïi miich mmïc'ajt. Ti ïch ajcxy yi' nyaj'ojyich com ca' yi' ïch ajt xypahuidïjtim.

⁵⁰ Chi Jesús yminañ:

—Ca' myaj'ójcïxy yi'; pïnjaty ca' xymidzip'ajtim, ïch ajt yi' nmïid.

Jesús jïjpcogapxïy Jacobo etz Juan

⁵¹ Jadu'n yjajti co tiempo yhuingonï mina Jesús ñïcxïp tzajpjoty, chi yhuinma'n̄ pidacy co nicxa'n̄ jim Jerusalén.

⁵² Chi Jesús quejxy cogapxy jayïjp jättac pïjctzoobi. Chi je cogapxy'ajtpï ñïcxy ytigiy ma je samaritano jäy ajcxy ycajp, jättac pïjctzoobi. ⁵³ Chi je' samaritano jäy ajcxy ca' yega'n̄ jättac, com ñejhuiiygïxyp co Jesús etz ymïgügtïjc ñïcxy anajty ajcxy jim Jerusalén. ⁵⁴ Co jadu'n Jesús ymïgüg ajcxy nejhuiiy co je samaritano jäy ca' jättac yega'n̄, chi Jacobo etz Juan nimay Jesús:

—Huindzin, ¿nej m'a'ixïiyb ïch ajcxy n'ocni'ane'mdïyich huen jin cäy huidibi tzomb tzajpjoty, jïgix yi' samaritano jäy ajcxy ycïjxtähuïpy jadu'n nej je profeta Elías ytuuñ jecy'ajty?

⁵⁵ Chi Jesús y'ïjxhuimbïjty, ojy Jacobo etz Juan, nimay:

—Miich ajcxy ca' mnejhuiiygixy ti jot ti huinma'ñ miich ajcxy miid. ⁵⁶ Hich, je jäy huidi tzoon tzajpjoty, ca' ti nmíñich ya naaxhuiñ co jäy yjugy'ajt miñ nyajtigooyich, hue' jánchtíy ti nmiñich co jäy yjugy'ajt nyajtzóogibich.

Chi ajcxy ñicxni huingbi cajp jättacp.

Je pinjaty anajty Jesús panicxam

⁵⁷ Jadu'n yjajti co anajty ñicxcixy ma tüg tü'aa, chi tüg jäy Jesús nimay:

—Huindzin, ich miich nbanicxaamy oy tim ma'amy miich mnicxy.

⁵⁸ Chi Jesús y'adzooy:

—Yi huaax ymiid yi' ajcxy yjut, etz yi joon ajcxy ymiid ajcxy ype'ñ, ich je jäy huidi tzoon tzajpjoty ca' nmídidyich ma nmähuibich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ich ndeedy n'ocyajnaaxtigíhuipy.

⁶⁰ Chi Jesús yminañ:

—Jëbi yajnaaxtigíhuipy huidibi ca' xypanicxa'ñich. Nicx miich capxhuäcxi Dios y'ayuc y'ané'min.

⁶¹ Chi jadüg jäy yminañ:

—Huindzin, nbanicxamy yam. Tun may'ajt ocnajtzmadziygich nicxy n'ocmiidcapxycíxyich njuugy nmigügich huidi jim ma ich ndijc.

⁶² Chi Jesús yminañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadu'n nipaady nejihuiy tüg jäy ti ytigíy naaxjidzjitzpi miid arado, e ca' huaad y'ijxhuimbity com co huinduum arado nicxíhuipy.

10

Jesús quejxhuäcxy je nidugi'pxmajcpi

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxgy cogapxy metz metz ma tüg tüg cajp majaty ñicxa'ñ. ² Chi Jesús nimay yi' ajcxy:

—Janch je cosecha ooy ti yhuindiiy, yi midumbi janchtiiy hueeni. Chojcxy co nbijctzóohuim ma nHuindzin Dios co huen quexy ytumbidijc ma yi cosecha.

³ Ñicxcix, ñich miich ajcxy nguejxpy jadu'n nej cöbixy y'ung yhuidity pa'uc agujc. ⁴ Ca' mminicxcixy mbijty, ni mxäcxuomy, ni mgg, e ni pin ca' mgapxpóxcixipy

tü'am. ⁵ Co ajcxy mdigihuiipy huenytimtitijcity, jayijp ajcxy minángixipy: “Ji jotcujc'ájtín ma jada tijc.”

⁶ Pen yung naxy je' ajcxy yajpaady, miich ajcxy je mgapxpocxin jotcujc'ajt myegipy ma je' ajcxy; pen ca' ajcxy yjadúnity, naadigi'adip huidi anajty ti mgápccixy.

⁷ Nañ hui'mgix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjin jaydijc.

⁸ Huenytimyhuidi cájpity ma anajty mdigiigyixy, pen je jäy ajcxy xycöbijcp, caaygix uuccix huidi anajty jäy ajcxy xymooyb. ⁹ Yajtzóoccix yuujäy pa'mjäy huidijaty jim ma je' ajcxy yajpaady, etz yajnimaaigyix:

“Je Dios y'ané'min huingóniñ yi' ma miich ajcxy.”

¹⁰⁻¹¹ Huenytimyhuidicájpity ma anajty mdigiigyixy, e ca' anajty jäy xycöbigaangixy, co ajcxy mdzonaanip, nimaagyix: “Yi mgajp naaxjoc huidi ti ypety ma ñich ndecy nhuinnebáamyich, yi' je' ijxpejt co Dios ajcxy xychaachytunipy. Chi nejhuigyix miich ajcxy jada co je Dios y'ané'min ti ymihuingoni.” ¹² ñich miich ajcxy nimayb co huin'it xñ co anajty yajhuaad'aty, Dios nigí

tzaachytunaangixy je jäy huidi ajcxy ca' miich ajcxy xycöbìga'ñ, ca'ydi Sodoma cajpjäy.

*Je cajp hu*idijaty ca'p ycapxymidooy

¹³ Chi Jesús yjacminañ:

—¡Miich ayoob ajcxy Corozín jäy! ¡Miich ayoob ajcxy Betsaida jäy! Co jim ma je Tiro cajp etz Sidón cajp caytuni cayjati je Dios ymijhuinma'ñ huidi ti ytunyii ti yjadyii ma miich ajcxy, jécyip icyipy ajcxy yjothuimbijtni, etz ti yajniquëxícixy icyipy miid je yhuit ñaaygixy saci nijen nicuyjam icuyjam (je' je tiy'ajt co ooy ytajcixy ymaygixy miid ypocy ycixpi). ¹⁴ Janch jadu'n yjadipy co anajty Dios yajniçödügÿ, niçi o'ctiy miich ajcxy ayo'n mbaadiyb ca'ydi jadu'n nej Tiro jäy etz Sidón jäy. ¹⁵ E miich ajcxy Capernaum jäy ajcxy, ¿nej mminaangixy mjätcixipy tzajpjoty? Hue' m'idaaccixyp miich ajcxy ma yi ayoodactuuby.

¹⁶ Je jäy ajcxy huidi miich ajcxy m'ayuc xymidoohuip, nañ xymidoohuüb yi' ajcxy iich n'ayuc. Je jäy ajcxy huidibi miich ajcxy ca' xy'ixa'ñ, nañ ca' je' ajcxy xy'ixa'ñich; e pinjaty ca' xy'ixa'ñich, nañ ni ca' yi' ix-aangixy je Dios je huidi ti xyquexyich ya naaxhuiñ.

*Chi ajcxy je nidugi'*pxmajcpi yhuimbíjtcixni

¹⁷ Chi je nidugi'pxmajcpi huidi Jesús yquejx ayuccapx-huäcxpi yhuimbijttay ajcxy janch jotcujc, yminaangixy:

—Ixti je ca'oybi ti iich ajcxy xycapxycöbìjccixy miid miich mxii.

¹⁸ Chi Jesús yminañ:

—Ti n'ixyich nej je ca'oybi yhuindzin ti ycäy, jadu'n nej jihuüy ti ycäy ti ycödigiiy tzajpcíxy, jadu'n nej tüg huidzuc. ¹⁹ Iich miich ajcxy mic'ájtin ti nmooygixy, jaydëbi ca'oybi ca' xymimadáaccixipy, tim jadu'n nipaady nej jihuüy tza'ñ

etz ca'ty myajhuäcpéjtcixy e ca' nej mjájtcixy. ²⁰ Nigi miich ajcxy jotcujc'ájtci co ajcxy mxii y'íjtci cojay jiiby tzajpjoty, ca'ydi co ajcxy ca'oybi xycapxymidoogixy.

Chi ooy Jesús yjotcugiy

²¹ Huin'it Jesús yjotcugiiy miid je Dios yjihui'ñ ymic'ajt, yminañ:

—Nyajnajxypich Dioscojuyip ma miich, Dios Teedy, tzajpjotyipi Huindzin etz je naaxhuiñybi Huindzin, co ti myüch jada mijhuinma'ñ ma yi cohuinma'ñ jäydijc, etz ti myajnejhuüy je jäy huidi ca' y'ixpícyity. Dios Teedy, jadu'n miich ti mduñ com jadu'n miich ti mjäygidacy.

²² Ndéedyich ti xyajcīdigiydäyich tüg'óciy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jëyi nDéedyich tügpajci pin xy'ijxcajpich. Ni pin ca' ijxcapy pin je' nDéedy'ájtypich, jëyi je Dios ung tügpajci huidi ijxcajp, etz jacjadyii ma je ung yajniguëxiga'ñ.

²³ Chi Jesús ni'ijxhuimbijty yi' ydiscipulos ajcxy, ahuingujc ajcxy nimay:

—Jotcujc ajcxy je jäy ajcxy huidi ijxcixp jadu'n nej miich ajcxy ti m'íjxcixy. ²⁴ Hich miich ajcxy nimayb co ooy may Dios y'ayucnajtzcaxiib etz rey ajcxy ja'ixa'ñ huidiibi miich ajcxy m'ijxpy, e ni ca' ajcxy ix; etz jamidoo'ida'ñ huidi miich ajcxy midooyb, e ni ca' ajcxy midooy.

Ijxpejt ma tüg samaritano oyjäybi

²⁵ Chi tüg jäy huidi yaj'ixpījcp Dios ñecy ytinaay'ahuiiy jot'ixy huinma'ñ'ixy Jesús, chi y'amidooy:

—Huindzin, ¿ti huaad ndunipich co hich jugy'ajtin huinixiibi nbáadibich?

²⁶ Chi Jesús y'adzooy:

—¿Ti jaybétyip ma yi Dios ñecy? ¿Nej mhuinjihuüy co mnecycapxy?

²⁷ Chi je ley huindzin y'adzooy:

—Mdzogipy mjihuĩhuipy mHuindzin Dios miid tũg'óciy m'aa mjot, miid tũg'óciy m'alma, miid tũg'óciy mmijaa, etz miid tũg'óciy mjot mhuinma'ñ, e mdzogipy yi mijin midijc jadu'n nej miich ci'm naychogyii.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzināhuip huinixii.

²⁹ E je' nañ jadu'n tim tiy ñejhuĩhua'ñ, nimay Jesús:

—¿Pin iich nmidijc'ajtpy?

³⁰ Chi Jesús y'adzooy:

—Tũg jã choñ jim Jerusalén ycidãgy anajty jim Jericó, chi oy meetzpi minaybadyii. Chi ajcxy tũg'óciy yhuit e tijaty yi' anajty ymiid pijtaayi. Chi ajcxy ooy huinhuojpy jãphuojpy huingoxy jãpcojxy, chi ajcxy ixmach jahueengi ögy, chi ajcxy ñicxni. ³¹ Tũg judío teedy yminagiyy ma je jimbi tü'aa. Co y'ijxy je tzaachjãy, chi jüyöyñajxy. ³² Nañ jadu'n yminagiyy ma je jimbi tü'aa tũg levita jãy huidi tuumb ma Dios ytijc, co jim yjãty mihuingon je tzaachjãy, co oy ixy, nañ chi jüyöyñajxy (ca' pa'ayooy). ³³ Chi tũg samaritano jãy anajty jim naxiy, co mihuingoñ je tzaachjãy, co oy ixy, huin'it ooy pa'ayogooty je tzaachjãy. ³⁴ Chi je' nimijhuãgy, chi puji e xojtzi je chaachi'au, nañ tzoiiyi chaachi'au miid aceite etz vino. Chi yaj'iyujcpety, e yajnicxy jim ma yjãttac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadyaabi tzaachjãy, jadu'n nej anajty mjacmeeñajtuñ, co iich anajty nhuimbityich huin'it nmigüedipy.” ³⁶ ¿Ma je nidugigpi jãy pin je oybi ti tuñ miid je jãy huidi anajty je meetzpi ti ymeechyii ti yajtzaachiyii?

³⁷ Chi je jäy huیدی Dios ñecy yaj'ijxp̄ijcp Jesús y'adzooy:
—Je huیدی ti yajtuñ je pa'ayo'ñ.

Chi Jesús ymīnañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yjajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huیدی anajty yxii Marta, yi' yajjättaci ma ytijc. ³⁹ Je Marta ymiid anajty tüg y'uch töxyjäybi huیدی anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiyijji co ñich naydüg yam tzach nayyajtuñyijjichi? Nima' yi María co huen xypub-étyich.

⁴¹ Chi Jesús ymīnañ:

—Marta, Marta, yi maytung miich mdzachmijottigooyb. ⁴² Tügpaic ji, huídibi ooy ycopícyip. Yi María ti yi' huin'ixy je oybi huیدی ni pin ca' ypigiiyb.

11

Jesús yaj'ixp̄ijc nej jēbi mibijctzoohuim Dios

¹ Jadu'n yjajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiiygich ajcxy tzajcapxycapxi, jadu'n nej Juan yajni'ixiiy yi' ydiscipulos ajcxy.

² Chi Jesús ymīnañ:

—Co ajcxy Dios mmibijctzohuipy, jadu'n minángixipy: Dios Teedy, miich huیدی tzajpjoty tzinaayb, huindzigiy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jäy yjot yhuinma'ñ jadu'n nej yajcuyduñ jiiyby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi iich ajcxy ndundigooyb, jadu'n nej iich ajcxy nmeecxyich huidibi ajcxy xymidundigooybich. Ca' m'a'ixiy co iich ajcxy huinma'n tigoypich. Yajnihuaatzcich ajcxy ma yi jibicpi.

⁵ Chi Jesús yjacminañ:

—Pinjaty ji ma miich ajcxy huidi tüg ymigüg miid, co ninícxipy mijcoodz e mnimähuipy: “Migüg, tun may'ajt yajpijctzoogich tugiig mdzajcaagy. ⁶ Tüg iich nmigüg ti xyñimiñich huidi tüyöyp, etz ca' nmídidyich ti nmöhuibich.” ⁷ Chi je jäy y'adzooy jiiby tigoty, yminañ: “Ca' xy'amayiyich. Ti iich ndijc n'agiinyñi, etz n'ungich yam nmíidich cijx'am; ca' njatyich nej nbidigibich etz nmöhuipy huidi mbijctzooyb.” ⁸ Hich miich nimaayb, oy ca' tzojc nipidiga'n ymöhuamy huidi pijctzou co migüg'adyii, hue' ymöhuamy jaydëbi ca'ydí yjac'amayiyii, chi yegipy tüg'óciy huidi yajmayajtpy. ⁹ Hich miich ajcxy nimaayb: Pijctzóogix, e myajmöhuipy ajcxy. Ixtaaygix, e mbaadipy ajcxy; cogapxiygix, ahuádzip ajcxy mdijc'aguu. ¹⁰ Tüg'óciy je' pin pijctzoob tijaty ma Dios, cidigihuiib; pin y'ixtaayb, ypaadipy; pin cogapxiyb, yaj'ahuatzib ytijc'aguu.

¹¹ ¿Pin ungedeedy ji ma miich ajcxy pen y'ung ypijctzoob tzajcaagy, nej mmöhuipy tüg tzaaji? ¿E pin ypijctzooyb acx, nej jëbi mmöhuipy tüg tza'ñi?

¹² ¿Pen ypijctzooyb tzeydüty, nej jëbi mmöhuipy ca'ty?

¹³ Pen miich jibicjäy ajcxy mnejhuuiyb nej oybi m'ung móoygixipy, ¿nej ca' mdijy yjánchity co mDios Teedy tzajpjotypi xymóoygixipy je Espíritu Santo, pen miich ajcxy mmibijctzohuipy?

*Yajni*bi jccixy Jesús co miidity mujcu' ymic'ajt

¹⁴ Chi Jesús anajty yajpidzimy tüg ca'oybi ma tüg jäy huidi anajty uumip. Jadu'n yjajty co je ca'oybi ypidzimy, chi je uum ycapxigy. Chi je mayjäy ooy jihuüy huinmay.

¹⁵ Nijējity jäy yminaangixy:

—Jesús mijhuinma'ñ ytumyb miid je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jäy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuüy nej je' ajcxy jot'adyii huinma'ñ'adyii, chi nimay:

—Co tüg gobierno ñaybi jc-huäcxyii, chi ñaychiptúnigixy miñ xyipy; ñayyajc'ijxigixy ñayyajtigóoyigixy; co tüg quëx jäy ñaybi jc-huäcxyii, nañ jadu'n je' ñayyajc'ijxigixy ñayyajtigóoyigixy. ¹⁸ Pen je mujcu' ajcxy ñaybi jc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich miid ndúñich je Beelzebú ymic'ajt co ñich ca'oybi nyajpidzimy.

¹⁹ Pen jadu'n yi', ¿pin je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy ci'm yajniquëx'icp co miich ajcxy mdundigooygixy mgapxtigooygixy. ²⁰ Pen ñich miid Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tüg mic'jäybi miidity maydujt, e ñaycuend'adyii yajxon, ca' je' ytigoyipy tijaty ymiid. ²² Co yjaty jadüg jäy jacmicpi ca'ydi je', chi ymimadägyii, e ypijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymiid.

²³ Pinjaty ca' xymijnicxpétyich, nmidzipich yi'. Pinjaty ca' ytuñ miid ñich co jäy nyaj'ixpicyich Dios ytiy'ajt, hue' je' ajcxy jäy yajhuinma'ñydigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim tütznaax ijxtägy co yocxa'ñ. Co ca' paty yocxtac, huin'it ymina'ñ: “Huimbidaambich ma je jäy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuädzity janch ooy jadu'n nej tüg tijc huidi janch huädz pedigity. ²⁶ Chi je ca'oybi ñicxy, e miid miñ jahuixtujc ca'oybi jacjibicpi ca'ydi je'; chi ajcxy ytigiiy ma je jäy yjot yhuinma'ñ, e chinay ajcxy jiiby; huin'it je jäy jac'o'ctiy oy yjajtni ca'ydi jadu'n nej anajty jayijp'aty.

Huidi ajcxy janch jotcújcip

²⁷ Co Jesús jadu'n anajty ymina'ñ, chi tüg töxyjäy mayjäy agujc mic yminañ:

—Jotcujc je töxyjäy huidi ti xyajpi'c'aty etz huidi xya-jyeegy.

²⁸ Chi Jesús yminañ:

—Je' jacjotcujc pinjaty Dios y'ayuc midoohuip etz cuy-duunip.

Jibicjäydijc pijctzoogixy tüg tiy'ajt mijhuinma'ñybi

²⁹ Co je mayjäy ajcxy jübigiiy, chi Jesús yminandacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuiyb ijxpejt, jëyi tügpajc Jonás y'ijxpejt yajmöhuiip. ³⁰ Com jadu'n nej je Jonás jecy'ajty ijxpejt yejcy ma je Nínive jäy, nañ jadu'n ñich, je jäy huidi tzoon tzajpjoty, nyegaamyich ijxpejt jadachambi tiempo miid jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'ñ mayjäy, etz yajpocy-cähuipy ajcxy. Ixti ma naaxhuiñybi ycogixiy jim je reina chooñ co anajty amido'idani je rey Salomón ycapxy

y'ayuc. Ji naaxhuiñ jadachambi tüg Dios ytiy'ajtmüdpí jacnigi ymijity ca'ydi Salomón anajty. ³² Co anajty Dios tiyduna'ñ yi may naaxhuiñjyä, chi je jäy ajcxy huidibi anajty cogajpíp jim Nínive pidägaangixy etz yajpocycähuaangixy jadachambi naaxhuiñjyä. Com je Nínive jäy jothuimbijt je' ajcxy co Jonás Dios y'ayucnajtzcaxiyyi. Ji jadachambi tüg Dios y'ayucnajtzcaxiyyibi jacnigi ymijity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninix

³³ Ni pin ca' yüch je jün huidi ti nögpity, ni ca' pidägy jiiby cajón pa'tci'py, jëyi janchtiy pidägy je jün ma jündicxpejt, jaydëbi co pinjaty ytiği huiipy tigoty, codicxiib je jün. ³⁴ Je jün ma miich ajcxy mninix je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninix ymiid yi' tiicxin. Pen ca' y'óyity mhuiin, nañ jadu'n ajcxy yi mninix yajpaty agootztuum. ³⁵ Cuend'ájtciy yi tiy'ajt huidi miich ajcxy miid, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codiicxy y'ity miid Dios ytiy'ajt, tüg'óciy quëxigtähua'ñ janch huädz.

*Jesús ca'p jäy*idaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy miid cayii. Co Jesús ytiçtigiiy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyhuächyii miid nii jayijpni ma anajty ca'ni ycaayñi. ³⁹ Chi je Huindzin Jesús ymíañ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjánchezy; chi jada' ma mjot mhuiinma'ñ miich ajcxy ooy m'adzocy, etz miid

ajcxy jibic-huinma'nñ; tim jadu'n nipaady nej myajhuäch ajcxy yi tasi ninicx, yi texyñinicx e chi ajcxy yajhui'mgixy jibicpi je tasioty je texyoty. ⁴⁰ ¡Miich ajcxy ca' Dios y'ayuc huinjihuüybi! ¿Ca' mnejhuüygixy co yi pin ti texyñinicx yajcojy nañ ti yajcojy texyot? ⁴¹ Tun miich ajcxy oyjäy'ájtin, huin'it janchtiy anajty ajcxy mhuädzity ma mjot mhuinma'nñ.

⁴² ¡Ay miich ayoobi ajcxy fariseojäy! Com mbidaaccixy abicy tüg picy je majcpi miid yi Dios ycixpi ixti yi tzajnimang, yi ruda, etz tüg'óciy aay ujtz. Chi jada' ca' mduñ je oyjäy'ájtin etz tiy'ájtin jadu'n nej Dios tzocy. Hue' je' oy mduñ co tijaty abicy mbidägy miid Dios ycixpi, nañ jadu'n copicy oyjäy'ájtin mdunipy etz Dios ytiy'ajt mguydunipy.

⁴³ ¡Ay miich ayoobi fariseojäy ajcxy! Co ooy m'adzójccixy je inaybejt huidi cöduum ma naymujctac, etz ooy m'adzójccixy co huen jäy ajcxy xycapxpoocxcixy oy huindzigiy mayjäy agujc.

⁴⁴ ¡Ay miich ayoobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidáacigixy oyjäy e ca' yjánchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxigy, chi jäy yöy nigix, com co ca' ñiguëxigy.

⁴⁵ Chi tüg jäy huidibi yaj'ixpijcp Dios y'ayuc ymíñañ:

—Huindzin, co jadu'n miich míña'nñ, nañ jadu'n iich ajcxy ooy jibic nayjihüüygixy.

⁴⁶ Chi Jesús ymíñañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costumbre huidi je jäy ajcxy ca' mimadäga'nñ, e ca' ajcxy mba'ayoogixy, tim jadu'n nipaady nej jihüüy tüg tzimiy ti mmooygixy jemxypi huidi ca' je jäy

ajcxy mĩmadäga'ñ, e miich ajcxy ni ca' mgĩhuäx jēda'ajty mgayajpadaangixy je tziomy.

⁴⁷ ¡Ay miich ayoob ajcxy! com myajcojcixy je ögpĩ jut ma je Dios ayucnajtzcaxĩybi naaxtigiy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuĩy nej jĩhuĩy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yĩ' ajcxy yaj'ögy Dios y'ayucnajtzcaxĩybi, e miich ajcxy myajcoj je öcpi jut ma ajcxy je' ñaaxtigĩy.

⁴⁹ Paady yĩ Dios jadu'n huinmay, e minañ: Nyajniguexipyich miich ajcxy profetas etz y'ayuccapxhuäcxpi, e miich ajcxy myaj'ögip nijējity, etz jacnaagity mbahuidijttäccixipy. ⁵⁰ Dios yajcomidohuipy jadachambi tiempo jāy ajcxy je ypocy huidi y'ap yteedy ajcxy ytuñ, com maabi naaxhuiñ chondägy, yĩ' ajcxy yaj'ögy Dios ytiy'ajtmĩdpi. ⁵¹ Janch nimaaybich miich ajcxy co Dios yajcomidohuipy jadachambi tiempo jāy ajcxy je y'ap yteedy ypocy co ajcxy yaj'o'cy Dios ytiy'ajtmĩdpi chondägy ma Abel, ixti Zacarías huidi jāy yaj'o'c ma Dios ytiyc tĩba'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpĩga'ñ Dios ytiy'ajt, ñañ ca' mdzocy co yĩ jāy ajcxy ixpĩgipy; tim jadu'n nipaady nejjuhuĩy ti mbicy je tiyc ahuaast e ca' miich ajcxy mdigĩhua'ñ, e ni mgatzojccixy co huingbi nicxy ytiyiy.

⁵³ Co Jesús anajty jadayaab ayuc yajnimaaygixy, chi je Dios y'ayuc huindzin etz yĩ fariseojäy ajcxy jotmätcooty chi yaj'amidogoty ajcxy may ayuc. ⁵⁴ Ñayñimáayigixy miñ xyipy co huen amido'ijt Jesús y'ayuc, jigix jēb páatcixipy huidi jēb miid xigixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjánchity

¹ Chi je mayjäy ooy nimujcy Jesús, janch jadu'n ñay'adijy ñay'agodiyigixy, chi Jesús nimaydacy je' ydiscípulos jayijp:

—Nigüendi miid yi fariseojäy ajcxy nej ajcxy yjäyyaj'ixpijccixy. Yajxon yi' ajcxy ycapxy ymiydägy, chi ca' cuydungixy. ² Ca' ji ti huidi ijtp ayüch nicxy ycayajnejhuïy, nañ ni ca' ji ti huidi ijtp ameech nicxy ycaniguëxigy. ³ Huen huidi ayuc miich ajcxy ameech mgapxy, yajnejhuïhuip yi'. Huen huidibi ayuc huidi ti mnayyajnimáayigixy ameech jiiby tigoty, mic yajcapxhuäcxip tijc nigíxy.

Pin jëbi huaad ndzigiyim

⁴ Chi Jesús yjacmínañ:

—Miich ajcxy nmigügtijc, ñich miich ajcxy nimaayb co ca' mdzigiyigixy yi jäy ajcxy huidibi ninícx yaj'o'cp, com ca' jac ni ti ajcxy tunipy. ⁵ ñich miich ajcxy nyajni'ixihuipy pin huaad jëbi mdzigiyigixy. Yi' janch mdzigiyigixy yi Dios huidibi jugy'ajt pijcp, e huin'it miid je' ymic'ajt jëbi quexipy m'alma ma je mij jñn. Yi' janch mdzigiyigixy yi'.

⁶ ¿Nej ca' jäy ajcxy ytoogyii migoox joon miid metz pi'cmeñ? Dios ni tüg yi' ajcxy ca' jäy digooyity. ⁷ Ixti mgöhuay ajcxy ac michoy Dios miidity. Ca' mdzigiyigixy, jactzou nigí miich ajcxy ma Dios ca'ydi pi'cjoon ajcxy.

Je pinjaty ca'p midzöduñyii Jesús mayjäyjoty

⁸ ñich miich ajcxy nimaayb co pinjaty ma miich ajcxy huidi capxpizimp mayjäyjoty co xymibícyich xymijpidägyich, ñich, je jäy huidi tzoon tzajpjoty, ngapxpizimipyich co ti ngöbicyich jadu'mbi jäy ma

Dios y'ángeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n iich yi' ca' ngöbigipyich jii by ma Dios y'ángeles ajcxy yhuinduu.

¹⁰ Tüg'óciy jäy huidi jadu'n iich, je jäy huidi tsoon tzajpjoty, xyñigapxp xyñi'ojiiybich Dios huinmecxiib. Chi jada' pinjaty nigapxp ni'ojiiyb je' Dios yjihui'ñ (je Espíritu Santo), yi' janchtiy Dios ca' yhuinmecxiyb.

¹¹ Co mmidzip ajcxy xyajni'cxip ma naymujctac, ma codungdijc, etz tungmiidpi yhuinduu, ca' mdájip mmáyip nej m'adzóogixipy, e ca' mhuinmayipy nej ajcxy m'adzohuipy. ¹² Com je Dios yjihui'ñ huin'ítty ajcxy xyajni'ixihuip nej huaad m'adzoogixy.

Naygüend'ajtigixy ca'p adzojccixy comeeñ' adii

¹³ Chi nidügti je mayjäy yminañ:

—Huindzin, nima' n'ajchich co huen yajhuäcxy miid iich huidi ndaj ndeedyich ñidungiy.

¹⁴ Chi Jesús yminañ:

—Yëydijc, ca' iich ni pin ti xypidägyich ane'mbi ma miich ajcxy etz yajhuäcxi.

¹⁵ Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeeñ'adii, com je m'alma yjugy'ajtín ca' je' nüdzoocin'adyii huidijaty miich ajcxy miid.

¹⁶ Chi ajcxy yajnimay tüg ayuc, yminañ:

—Jim anajty tüg comeeñjyäy huidibi anajty ooy mij ypidägy yajpidägy. ¹⁷ Je comeeñjyäy anajty ooy ci'm huinmay ma yjot yhuinma'ñ, yminañ: “¿Ti n'octunipich com ca' nmídidyich ma nyajni'idägibich yi tüibi y'ity?” ¹⁸ Chi yminañ jotjoty huinma'ñjoty: “Nyajpidicniibich ndzëx, e ngöjibich jacmijpi, chi tüg'óciy jii by nbidactähuibich tüibi y'ity.” ¹⁹ Co jadu'n ndunipyich, chi jëbi jotcujc

ndzinähuiwich, com ooy anajty nmíididyich pidägy yu-jcpiçy, jëbi canaag jimíjt niboocxyich etz jëbi ngay n'ügyich jotcuçj. ²⁰ Chi Dios nimay je comeeñyäjy: “Ooy jibic-huinma'ñ miich miidity. Cham coodz ich miich nibijctzohuihuaaniy yi m'alma (m'ögip), e co anajty ti m'ögy yi huidibi ti myujcpiçy, çpin yi' je'adiib?” ²¹ Jadu'n yjajty yi' ajcxy huidibi ymeeñ'idi'ñ ci'm yujcpiçp, ca' yi' ajcxy jiiby ycomeeñyity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixpiçpídiçj:

—Paady ajcxy nimaaygixy co ca' huaad mjottigooygixy ma yi mdzináayin yi mjogy'ájtín, huidi mjíicxcixipy mgáaygixipy, huidi miid mninícx mxóxcixipy. ²³ Yi jugy'ajt jacnigi tzou yi', ca'ydi yi caayin uucin, etz je mninícx jacnigi choohuity ca'ydi huit. ²⁴ Ijxcix yi joogy ni ca' ñipy, ni ca' chijccixy, ni ca miidity ytíç ni chëx, e Dios yi' ajcxy mooyipy huidi yjicxcixyp, çnej cayjacnigi miich ajcxy mdzoohuity ca'ydi joon ajcxy? ²⁵ Ca' ji ni pin ma miich ajcxy pin jadipy nej ñayjijptzomihuiib jadüg çinuux. ²⁶ Pen ca' mjajtcixy nej mdúngxixipy huidi hueen huinma'ñ, çnej co mdzachmijottigooygixy yi tzinaayin yi comeeñ'ájtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Ich miich ajcxy nimaayb, co ni je rey Salomón miid tüg'óciy ymeeñ ca' ñayxojxi jadu'n nej jada aaybijy ujtzipiy. ²⁸ Pen jadu'n Dios xoxy yi aay yi ujtz huidibi cham jajtíp ma yi tungop, e com jabom ti anajty ñiicxni, Dios xypubedipy xypudigihuiipy nigí miich ajcxy huidi hueen mibijçp. ²⁹ Ca' miich ajcxy mhuinmay'ahuidíjtcixipy ajcxy ti mgáaygixipy m'úuccixipy. ³⁰ Yi naaxhuiñyäjy ajcxy ymijottigoyb anaxy tüg'óciy caayin uucin, huit etz tijaty. Miich ajcxy huidi mijpidacp Dios, Dios Teedy

ñejhuiuïyb co copicy ajcxy miid'adipy caayin uucin etz huit tucxy. ³¹ Jayijp mijottigooygix Dios y'ayuc ytiy'ajt, chi jada' tüg'óciy huïdi ajcxy myajmayjajty mbáatcixipy yi'.

Jugy'ájtín mijpi jiiby tzajpjoty

³² Chi Jesús yjacmínaañ:

—Ca' miich ajcxy mdzigiiygixy, miich ajcxy mni-hueeñity, per mDios Teedy yega'ñ ane'mdac tzajpjoty miid miich ajcxy ycixpi. ³³ Tooccix tijaty miich ajcxy miid, nimooygix ayoobitijc. Yaj'oyiiygix meeñ'idi'ñ huïdi ca' y'amijihuïpy ni camina. Yaj'oyiiygix tüg pidägy, janch mij e janch oy, jiiby tzajpjoty huïdi ca' ycixipy ytigoyipy, ma ca' meetzpi huaad ytigïy, ni ucxyting ca' yajhuindigoyipy. ³⁴ Pen miich ajcxy miid mgomeeñ'ájtín ya naaxhuiñ, yaayi je mjot mhuinma'ñ ajcxy. Pen mdzojcpy ajcxy je oybi huïdibi Dios yegamy, nañ miid'ájticy jim jabom jabom mjot mhuinma'ñ ajcxy ma Dios.

Tzoc íjtím ni'ixi'

³⁵ Chi Jesús yjacmínaañ:

—Ni'ixiiygix mjot mhuinma'ñ jadu'n nej jihuïy mhuit myujc'ameetcixy co mdunaangixy, etz jadu'n nej jihuïy lámpara mnögpjccixy co mdzumnaxaangixy m'ahuixaangixy je huindzin. ³⁶ Ni'ixi'ijtcix jadu'n nej jäy huïdi yhuindzin ahuijxp, co anajty yhuimbity co anajty ti y'oy ma jäy ti ypicy, chi co anajty minipy ycocapxi, mic'amy myaj'ahuädzity ytijc. ³⁷ Jotcuyc ajcxy je tumbi co je yhuindzin anajty yjädy, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjädy, chi yhuit yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzin mijcoodz o moñyi, e páadip je tumbidijc ajcxy jim chumnájxcixy juugy, jotcuyc je' ajcxy

je jadu'mbi tumbidijc. ³⁹ Nejhuiygix jada co je codijc ixypy nejhuihuipy ti hora ymina'n̄ je meetzpi, chi juugy ixypy chuumnaxa'n̄, e ca' c̄iyegipy ytijc nicxy jāy tigoty ymeech. ⁴⁰ Miich ajcxy nañ jadu'n̄ ijtcixy ni'ixi', mina anajty ca' ti mhuinmaaygixy, huin'it miina'n̄ich iich, je jāy huidi tzoon tzajpjoty.

Je tumbi tudägypi etz je tumbi ca'pi ytudägyity

⁴¹ Chi Pedro Jesús nimay:

—¿Pin jada ti myajnimaaayb jada ayuc huidi ti mgapxy, iich ajcxy, o nidüg'óciy jāy?

⁴² Chi je Huindzin Jesús yminañ:

—Huidibi tumbi je' ya huidi tumb miid yhuindzin janch cixyot huinjot huidi miid yhuijy'ajt ycuyc'ajt huidi je yhuindzin mooyip ané'min ma ytijc, huidi yajnidägiiyb tumbidijc nej ypaadyii. ⁴³ Jotcuyc je tumbi co anajty je' yhuindzin yhuimbity e padiiyb ti cuyduñ jadu'n̄ nej anajty ti ñimäyii. ⁴⁴ Janch iich miich ajcxy nimäy co je tumbi huindzin yajmihui'mdähuipy jada ytumbi tüg'óciy pidägy huidi ymiid. ⁴⁵ Pen je tumbi yhuinmaayb jotjoty huinma'ñyjoty co je yhuindzin yhuäcxipni mina ymiina'n̄, chi midziptzooni jacjadyii tumbidijc ajcxy, huojpni, cojxni, nañ ytigiiyñi caayb uucp anaxy etz ymügyii. ⁴⁶ Chi je tumbi yhuindzin miinipy ma je xii hora anajty ca' jijp'ixy e ni canejhuiy anajty, e huin'it ooy tzaachytunipy yi tumbi e chi pidägipy ma je huidi ajcxy ca' ytudägyity.

⁴⁷ Je tumbi huidi nejhuiyb nej yhuindzin chójc̄in, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' ñigi yajtzaachytunip. ⁴⁸ Je tumbi huidi ca' yajxon huinjihuüy nejjihuüy yhuindzin chójc̄in, hueeni je' yajtzaachytunipy. Huenpinity huidi may yajmooyb, may yi' yajmibijctzohuiyb; etz huenpinity huidi ti mihui'my ooy, yajmibijctzohuib ñigi.

Jesús ycixpi ñaybijn-huäcxyii jäy

⁴⁹ Chi Jesús yjacmínañ:

—Hich ti nmiiñich ya naaxhuiñ co jiiñ nbidägebich. ¡Ooy njadzocyich ji ixypy ñitooyñ! ⁵⁰ Nyajnaxipyich tüg tzaachypi, e ¡ooy ndajy nmayich ixti mabaad yajcuydundäy! ⁵¹ ¿Nej miich ajcxy mdijy co ti nmiiñich ya naaxhuiñ co nyajcixipyich je tzipi? Hich miich ajcxy nimaayb co ca'. Hue' janchtiy nyajnaybjc-huäcxáanibich jäy ajcxy. ⁵² Jadachambi etz yjacnicxni xii tiempo ji migoox tüg quëxjäydic hidibi ajcxy ñaybjc-huäcxib, tugiig miid je metzpi, e metzpi miid je tugiigpi. ⁵³ Je ungedeedy tziptunip miid ymang etz je mang miid yteedy. Nañ je ungdaj tziptunip miid yñix etz je ñix miid ytaj. Nañ jadu'n je xecy tziptunip miid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi minangixy co tühuaam, e janch jadu'n yjadyii. ⁵⁵ Co ymiñ je jiiñboj, chi miich ajcxy minangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjajtcixy nej myajcapxcixy yi xii tiempo hidi ajcxy m'ixpy tzajpcixy etz ya naaxhuiñ: ¿Nej co ca' mjajtcixy nej myajcápcixipy xii tiempo ymiñ ycidägy?

Naymi'oyihui miid midzip

⁵⁷ ¿Nej co miich ajcxy ca' ci'm mnaydiyduunigixy nej ytuädgyitye je tiy'ajt? ⁵⁸ Co mnícxipy ma yi codung miid yi mmidzip jac'oy co mnayyaj'oyihuiipy miid yi mmidzip tü'am, ca'ydi miid mjädip ma yi codung, e chi je codung xyciyegipy ma je xueetz, e je xueetz xypidägip pujxtigoty. ⁵⁹ Hich miich nimaayb co ca' jiiby mbidzimipy, ixti cooni mgüejttähuiipy tüg'óciy.

13

Ooy ycopícyity nyajtigajtzim nhuinma'ñ

¹ Huin'it jäy miidmiydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huijiti ajcxy ñi'py miid iyujc ñi'py huidi je' ajcxy miid huindzigi'ñ tuuñ. ² Chi Jesús y'adzooy nimay ajcxy:

—¿Nej mdijy, ñigi anajty ypcymiidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigiigixy ma Dios, nidüg'óciy miich ajcxy mgijxtáhuip mdigoydáhuip. ⁴ E je' ajcxy je majmocxtugiigpi huidi je mjtijc jim Siloé ñigidaagootti, yaj'öci ajcxy. ¿Nej mdijy ñigi ajcxy ypcymiidity, ca'ydi nidüg'óciy je jäy huidi tzinayb jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtáhuip mdigoydáhuip miich ajcxy nidüg'óciy, jadu'n nej je' ajcxy.

Ijxpejt ma je higueri ca'pi anajty ytiim'aty

⁶ Chi Jesús yajnimay ajcxy jada ayuc:

—Tüg jäy anajty miidity higueri cojy ma y'aguemy, chi ñicxy jiiby ma y'aguemy higueri tiim ijxtaaybi, ni ca' paty. ⁷ Chi nimay je' ytumbi: “Cham midugiig jimijt miiñich ya higueri tiim ijxtayb ma jada higueri cop, ni tüg ngapaadyich. Huen yajpuxciday jada higueri cop, nej co nigoobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayijp yi naax jühuidityi, etz oc'abonijjyich. ⁹ Pen tiim'ajt ca' nyajpuxipy, pen ca' ytiim'aty jëbi nbújxigipy.”

Jesús yajtzögy pocxiiduum tüg töxyjäy jigogojpyi

¹⁰ Chi Jesús anajty yaj'ixpicy ma tüg naymujctac pocxxiiduum. ¹¹ Jim anajty tüg töxyjäy huidi anajty mimajmocxtugüig jimijt cujc mi'ijtni yjiibojpa'm, agojojy anajty yöy, ni nej anajty yca'oyiy nej ytinaaygugihuiipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjiix, e chi je' yjiix ytiy, huin'it ytiigiy Dios ojadajtpi. ¹⁴ Huin'it je naymujctac huindzin ooy yjotmäty miid co anajty Jesús jäy ti tzoyiy pocxxiiduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ semaanjoty pin yajtzoyihuam, ca' ypocxxiiduumity.

¹⁵ Chi je huindzin Jesús yminañ:

—¡Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmiguejy mhuajyuubi, etz mburro ma ypëcxtac pocxxiiduum, e myajnicxy ajcxy nii'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugüig jimijt, ¿nej ca' ypadyii nyajtzögibich pocxxiiduum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugiiygixy miid je oybi huidi Jesús ytuun.

Ijxpejt ma je mostaza pájc

¹⁸ Chi Jesús yminañ:

—¿Nej m'oc'a'ixiiygixy yi Dios y'ané'min? ¿Huidi miid n'ocyajquipxihuibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc yminañ:

—¿Huidibi miid n'ocyajquipx'ihuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytiyhuidijt miid tugiig quipxi'n harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nïdzögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügjet, jëbi ajcxy m'alma nïdzögipy, jadu'n nipaady nej jäy ajcxy ñaymic'íjxigixy co ytiġihuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixiy ytiġihuaangixy ma Dios y'ane'my e ca' ajcxy jadipy nej ytiġiigixipy. ²⁵ Co je codijc ypidigipy etz agiinyñip ytiyc, huin'it miich ajcxy pinjaty tibäy hui'm, chi jiiby tibäy miich ajcxy mminandägipy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' ñich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmïdgaaygixy ti nmïd'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “Ñich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdájcixipy mmáygixipy, myáaxcixipy mdiitzqueetcixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxxiybi jiiby ma Dios y'ane'my, e miich ajcxy tibäy anajty ti mhui'mgixy. ²⁹ Miniip yi jäy ajcxy huidibi

tzoomb ma xii ypidzimy, ma xii ycidägy, ma jayhuix-tujc ypidzimy, etz cham ma madzäcruudz ytinaay'ahuïy, chi y'ixtáaccixipy ma je caydac jiiby ma Dios y'ane'my.
³⁰ Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nicx nimaaygix yjiiibi huaax co nyajpidzimybich ca'oybi etz nyajtzoocypich jäy cham etz jabom, codugüg xii ti ndung mayiijich. ³³ Ooy ycopicyity co ñich njactüyöyibich cham, jabom etz huixtic. Com ypaadyii co Dios y'ayuccapxhuäcxpi y'ögip ajcxy jim Jerusalén.

Chi Jesús yjacminaañ:

³⁴ —¡Jerusalén jáy! ¡Jerusalén jäy! huidibi yaj'o'cp Dios y'ayucnajtzcapyiyb ajcxy, etz ycögädz ajcxy je jäy huidibi Dios ti xyajniguéjx ajcxy. Janch canaag'oc ñich miich ajcxy njahuijtzmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy.
³⁵ Chi jada' ijxcix cuenditungix, com jadachambi mgajp yhui'my najtz'ixi'. ñich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mmináangixipy: “Capxpaaty je' huidi miimb miid Huindzin'ájtin Dios ycixpi.”

14

Jesús yajtzögy tüg yëydijc quixypa'mmiidpi

¹ Chi jadu'n yjajti co tüg pocxxiüduum Jesús ytigiy ycaya'ñ anajty ma tüg fariseojäy ytijc, hue' anajty judío tungmiidpi. Chi yi judío ixpicytijc ajcxy tzach'ix'ijtcixy

Jesús, amidoo'ijtcixy Jesús y'ayuc. ²Huin'it tüg jäy huidibi ymiid anajty quixypa'm miin ma Jesús yhuinduu. ³Chi Jesús ymigapxi je' ajcxy huidibi yaj'ixpijc Dios ñecy etz yi fariseojäy ajcxy, nimay:

—¿Nej je Dios ytiy'ajt yminañ? ¿Huaad o ca' huaad chögy jäy pocxxiiduum?

⁴Chi ajcxy y'amonday. Huin'it Jesús cñixajiiy je pa'm jäy, chi yajtzoooy. ⁵Chi Jesús nimay je fariseos ajcxy:

—¿Nej miich ajcxy pen niijutcögöp ajcxy mhua-jyuubi o mburro pocxxiiduum, nej ca' mic'amy nicxy yajpidzimgixy oy y pocxxiiduumi?

⁶Chi ca' ajcxy jajty nej y'adzohuimbíjtcixipy.

Je pinjaty huodzoonyip ma je pijcpi yajnixiiduñyi

⁷Co Jesús ijxy jadu'n nej yi' ajcxy jac'oybi ññaybejt huin'ijxcixy jim ma je caybejt, chi ajcxy tüg ayuc yajnimaaayi, je tiibi anajty yajhuomiingixy:

⁸—Co miich myajhuoohuipy ma pijcpi yajnixiiduñ, ca' m'ixtägiipy ma je ññaybejt cödumbi, ca' jécyity co yajhuoomiñ huidi je' ññaaybejt ymihuaad. ⁹Chi jada' xyñimähuipy je huidibi anajty ti xyhuoomiñ: “Mo' jada' migüg jada ññaaybejt cödumbi.” Chi miich tzöydu'n miid mnicxpy ma je' ññaybejt axambi. ¹⁰Co jäy xyhuoohuipy ma je pijcin yajnixiiduñ, jim m'ixtägiip ma je axambi ññaybejt, e co yminiipy je huidibi anajty ti xyhuomiñ, chi xyñimähuipy: “Migüg, nax ma yi' ññaybejt cödumbi.” Huin'it capxpaady m'idipy ma je' ajcxy huidibi anajty ññayb ma caybejt huinduu miid miich. ¹¹Pinjaty ci'm naygömáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹²Chi Jesús nimay pinjaty huidi anajty ti yhuoomiñyii:

—Co miich mxiiduunipy ca' mhuoohuipy je jäy ajcxy huidibi ooy miid mnaymigüg'ájtigixy, ni mmidügquëx, ni

m'ajuugy m'amigüg, ni mmidijc comeeñybi, ca' jécyity co nañ jadu'n xyhuohuipy, e chi anajty jac mij yejc-huimbijty. ¹³ Co mxiidunipy, chi huohuipy ayooñitijc, tzaachijäy ajcxy, tecymätpi ajcxy, etz jäy huiintzpi. ¹⁴ Huin'it miich mjotcujc'adipy co yi' ajcxy ca' jadipy nej yejc-huimbidipy. Jiini Dios xymigüedipy co anajty yajjugypicy je tudägyipi jäy ajcxy.

Je ijxpejt ma tüg adzuu'ájt'in mijpi

¹⁵ Tüg jäy huidi anajty iñaayb miid Jesús ma caybejt huinduu co midooy nej Jesús ymíañ, chi nimay Jesús:

—Jotcujc je jäy ajcxy huidi cayip jiiiby ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'ada'ñ, chi jayijpni oy mayjäy nimay co anajty yaj'adzuu'ada'ñ. ¹⁷ Co je adzuu'ibi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgix, ti jim yajni'ixiy je caayin uucin.” ¹⁸ Chi ajcxy nidüg'óciy yminandacy: “Tun may'ajt meexcich, ca' y'oyiy nej nyajníxibich.” Chi je' jayijp jäy y'adzoy: “Ti njuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meexcich.” ¹⁹ Chi jadüg jäy ymíañ: “Ti njuyich migoox par huaj yuubi, nicxy n'oc'ijxmadza'ñich jayijp, paady ca' y'oyiy nej níxibyich, tun may'ajt meexcich.” ²⁰ Chi jadüg jäy ymíañ: “Tim chamni nbicyich, paady ca' oyiy nej níxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Nícx tzojcyi cajpoty ma yi jäy ajcxy yöygixy ñajxcixy etz ma yi mij tü, e chi huomiinipy pin mdimypaatyp ayooñitijc, yi tzaachijäy etz huiintzpi.” ²² Chi je' ytumbi ymíañ: “Huindzin, ti nduñich jadu'n nej ti xyñimäyich, etz jac

chiini iñaybejt.” ²³ Chi je huindzin nimay je' ytumbi: “Ñicx ma yi mij ñi mij tú yajmin je jäy ajcxy adzip, huen iich ndijc uch. ²⁴ Chi iich miich nimây co ni tüg yi jäy ajcxy huidi jayijp yajnimay, ca' ajcxy y'adzuu'adipy miid iich.”

Nej ooy chípity co Cristo nbanicxim

²⁵ Chi may anajty jäy ñicxy miid Jesús, chi Jesús yhuac-huimbijty, nimay ajcxy:

²⁶ —Pen ji pin xypamiñich, e ooy nigí tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy nigí tzocy yi' yjugy'ájtín, ca' iich yi' huaad ndiscípulo'adyiijich. ²⁷ Yi jäy ajcxy huidi xypamiimbich huidi iich ndiscípulo'adaanip, copicy yajnaxipy ajcxy ayo'n, jadu'n nipaady nejjihuüy ycruudz ti cabiccixy e nicxy yajcruudzpeda'ñyíi. ²⁸ Co miich ajcxy mmijtjic mgoja'ñ, chi miich ajcxy jayijp m'ixtaaccixy e m'a'ixiiygixy jadu'ñyi meeñydunaangixy, nej pen miid ajcxy huidi jébi miid myajmaaygixy je mmijtjic, o peni ca'. ²⁹ Ca' yjécyity co anajty je tjc ti yajpojtzigy, chi anajty ca' m'ocajtñi nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymina'nip: “Jadayaabi yéydijc nigoo ti yajtzondägy tjc poch, e ca' ti ocyajmaayñi.” ³¹ O huidi rey ji co chona'ñ tziptumbi miid huingbi rey, ¿ca' jayijp huinmayipy pen jébi chiptuñ miid majc mil jäy, pen je ymidzip miimb miid iipx mil jäy? ³² Ca' yjécyity co je tügpi rey jiguemni anajty miiñ, chi quexipy tüg huingapxi pijctzohuípy may'ajt ca'ydi yi tzip yjadyi. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmiid, ca' iich yi' huaad ndiscípulo'adyiíi.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy.

³⁵ Yi caan huidi ti ytigoy ytamtz'ájtín ni ca' y'oybidágnity ma je naax, ni ma je pux huidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcuejtpidijc etz pocyjäydijc nimijhuágtay ajcxy Jesús tzach'amidoo'idaani ajcxy je' y'ayuc. ² Chi ajcxy huidi ooy tzachmijpidägy judíojäy ytiy'ajt etz huidi ajcxy yaj'ixpijc Dios ñecy ameech nigapxcixy ni'ojiiygixy je Jesús, chi ajcxy ymíñañ:

—Yi Jesús pocyjäydijc ajcxy ymígüg'ajtpy, e yi' miid ycaaygixy.

³⁻⁴ Chi Jesús jadayaabi ayuc ajcxy yajnimay:

—Huidi jäy ji ma miich ajcxy pen ymiid migo'px cöbixy co ytigoy nidügti, ¿nej ca' yajhui'mipy je mada'px majmocx midaaxpi jim ma chinaaydac, chi nicxy ixtäy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcujc. ⁶ Co yajjädip ma ytiyc, chi huomucy ymígügtijc etz ymijiin ymidijc, nimáhuipy ajcxy: “Jotcugiiygix miid ñich, ti ñich ngöbixy nbaady huidi anajty ti ytigooy.” ⁷ ñich miich ajcxy nimaayb co nañ jadu'n tzajpjoty ooy jotcujc'ájtín niigi miid co tüg pocyjäy yjothuimbity, ca'ydi miid mada'px majmocx madaax tudägypi jäy huidi ca' ytundigoy.

Ijxpejt ma je meeñ huidibi tigooy

⁸ Chi Jesús yjacminañ:

—¿Huidi töxyjäy ji pen ymiid majc ymeeñ, co ytigooy tüg meeñ, nej ca' jiin nöctzohuipy, e ytiigihuipy pedigpi ixtáhuipy ymeeñ oñydägy ixti cooni paadipy? ⁹ Co paady, chi huomucy ymígügtijc etz ymijiin ymidijc, e chi

nimähuipy: “Xondaaccix miid iich, ti iich nmeen nbaty huidibi iich anajty ti nyajtigoy.” ¹⁰ Jadu'n iich miich ajcxy nimäy co nañ jadu'n Dios y'ángeles ajcxy ooy yjotcújcity co yjothuimbity tüg pocyjäy.

Ijxpejt ma je ung huidibi ymeen yajticxtay

¹¹ Nañ jadu'n Jesús yjacminañ:

—Tüg yëdyjc ymiid anajty metz ymang. ¹² Chi je jacmutzpi nimay yteedy: “Tat, mooygich yi pidägy huidi xypaatpich.” Chi je' yteedy je pidägy yajhuäcxy. ¹³ Hueeni anajty xi tzuu cujc ñicxy, co je' ymang mutzpi yajmutjctay tüg'óciy huidi yi yjé'ajtpy, chi choon ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymiid. ¹⁴ Co anajty ymeen tüg'óciy yajtunday, chi miin tüg mij yuu ma je cajp. Chi ooy je mang mutzpi caayin uucin huit meen jayajmayajtni. ¹⁵ Chi je' ninicxy tüg jäy ma je jimbi naaxjot ymidunañ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii miid je pëtztim huidi anajty idzim y'ojcpy. Chi ni pin anajty ni ti ycamöyii. ¹⁷ Co yhuinma'ñ yajmejch, chi yminañ ma yjot yhuinma'ñ: “Jim janch maytumbi ma iich ndeedy ytijc, ymiid ajcxy jicxy picy janch may'amy. Ich ya tzach'ayoob miid yuu xi. ¹⁸ Tzonaambich ya, nicxa'ñich ma iich ndeedy, nimähuibich: Tat, ti ndundigóyich miid Dios tzajpjotypi etz miid miich. ¹⁹ Cham ca' ypadyii miich mina'nip co miich xy'ung'adyijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jegüegyñi anajty ymiñ co yteedy y'ijxpaati. Chi yteedy ypa'ayogoti, e ñicxy poygy oy jipcobadiy. Chi yögminennajxy etz tzücxy. ²¹ Chi je ung yminañ: “Tat, ti ndundigooyich miid Dios tzajpjotypi etz miid miich. Cham ca' ypadyii nicxy miich mina'ñ co iich miich xy'ung'adyii.” ²² Chi je ungdeedy nimay je'

ytumbi: “Yajpidzim je huit oybi, mic'amy yajniñeniñyigix jada n'ungich, chi mooygix yi çijitiz etz yçig. ²³ Nicx yajtzoongix yi huaj mang n'icxpi, yaj'öccix, chi ngaayim n'uucim e nxiiduunim. ²⁴ Jada n'ungich jadu'n nipaady nejjiñuñy anajty ti y'ögy, e chi ti yjugypicy. Tigooy yi' anajty e ti yjädy.” Chi ajcxy ooy yjotcugiiy.

²⁵ Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' tünip jájtíp?” ²⁷ Chi je tumbi y'adzooy: “Ti yjädy m'uch, ti mdeedy yaj'ögy tüg huaj n'icxpi, co ymang ti huimbity juugy.” ²⁸ Chi je ungoob ooy yjotmäty, ca' anajty ytigihua'ñ tigoty. Huin'it je yteedy ñibidzimi, ycohuaniñyi co huen tigiy tigoty. ²⁹ Chi je' y'adzooy, nimay yteedy: “Janch micanaag jimijt iich miich miid nduñ, ni ca' ngapx-huimbityich. Ca' chambaad miich ni xycamooyich tüg pi'ccöbixy jaydeb n jotcujc'adipyich nxiidunipyich miid nmigügtijcich. ³⁰ Per co yi mmang ti yjädy huidi oy ti yajtundäy yi ymeeñ miid jibic-huinma'ñ miid jibic töxyjäydijc ajcxy, chi ti myaj'ögy huaj mang n'icxpi miid yi' ycixpi.” ³¹ Chi je ungedeedy nimay je' ymang: “Miich ung huinixi ya miid n'ity. Tüg'óciy huidi nmidich miich yi' mje'. ³² Ooy ycopicyity co nxiiduunim etz njotcugiiyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady.”

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscipulos:

—Jim anajty tügjäy comeeñybi, ymiid tüg ytumbi huidi yi' ypidägy cuend'ájtíp. Chi oy nimäyii co tüg je ytumbi nigoo anajty tzachyajtuñ je meeñ ma ycapaadyii. ² Chi je huindzin oy yajhuoyii je' ytumbi, chi nimay: “¿Nej jada co iich jadu'n nimäyijich miid miich ycixpi? Ya yi cuenti c̄moydaaygich nej ti mduñ, etz ca' iich miich n'ocjactumbi'adaanin.” ³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzima'nich ma yi ytung. Juttajii ca' njatyich, co limosna nbijctzohuipyich tzöydúmbich. ⁴ Nejhuuybich ti ndunipich jaydeb jäy ajcxy xycöbigipyich ma ajcxy ytijc.” ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñyi miich minuucxy'adyii iich nhuindzin?” ⁶ Chi je' y'adzooy: “Migo'px garafón aceite.” Chi nimay: “Matz mnecy, iña' mic'amy, e cojayi' huixchiguipxmajc.” ⁷ Chi jadüg nimay: “¿Miich jadu'ñi mminuucxy'adyii?” Chi je' y'adzooy: “Migo'px quipxi'n trigo.” Chi nimay: “Matz mnecy, cojayi' mida'px.” ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäjy huidi ca' mibicy Dios, nigí ajcxy ypëgyity miid yhuinma'n, ca'ydi yi jäy ajcxy huidi huinjihuiyb Dios ytiy'ajt.

⁹ Ich miich ajcxy yam nimaayb migüg'ájtigixy yi jäy ajcxy miid yi meeñ huidibi ca' ytimytiijyity, jigix co je meeñ anajty myajmayajtcixy ji pin miich ajcxy xycöbigip ma jugy'ajttac huinixiibi.

¹⁰ Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' mjajtcixy nej mgüend'ájtixipy yi jugy'ájtin huidibi ya naaxhuiñ yajpatp, ¿pin miich ajcxy m'ocyajmihui'mamy je jugy'ájtin je riqueza oybi janchypi? ¹² Pen ca'

mjájtcixy nej mgüend'ájtcixy tyiibi mihuí'mgixy huidi huingjäy yje'ajtpy, ¿pin miich ajcxy xymöhuip huidibi ajcxy yje'ajtpy?

¹³ Ni tüg tumbi ca' jëbi ytuñ miid metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägiy Dios etz nañ jadu'n mijpidägiy yi comeñ'ájtin.

¹⁴ Nañ jadu'n midooy jada ayuc yi fariseojäy ajcxy, com ooy anajty ajcxy meeñ adzójccixy. Chi ajcxy ooy nixiici yajxiici Jesús y'ayuc. ¹⁵ Chi Jesús yminañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjuhuüy ajcxy ooy m'oyjäyity. Dios ñejhuüydaayb co miich ajcxy miid jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ijxyp, Dios ca' yi' oy'ixy.

Je Dios ycötújcín etz je Dios y'ane'mdac

¹⁶ Chi Jesús yjacminañ:

—Je taabi je Juan anajty yjijity, jii'ajtp anajty Moisés ycötújcín etz je y'ayucnajtzcaxiiby ajcxy y'ixpíjcín. Huin'it tiempo etz ixti jadachambi jadu'n yajnajtzcaxiy je Dios y'ané'mín, e mayjäy ooy ñaybidáacigixy co ytiñhuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuipy, pero je Dios ycuýdundähuamy tüg'óciy jadu'n nej ñecy ymina'ñ. Ni tügi letra oy mabaad ymúdzity nicxy ycaya-jcuyduñ.

Jesús capxticxy nej ypöcyity co jäy ytöxyijc ixmach

¹⁸ Chi Jesús yjacminañ:

—Huenpinjäyity co ytöxyijc ixmach etz ypicy miid huingbi töxyjäy, ooy anajty mij pocy tuñ. Nañ huenpinjäyity

huidibi pijcp miid je töxyjäy huidi ñäy ti y'ixmachyii, nañ mij anajty ypcocytuñ.

Je comeeñjyäy etz je Lázaro

¹⁹ Chi Jesús yjacminañ:

—Ji anajty tüg jäy comeeñybi ñayxoyii anajty janch ooy miid oyjatypi huit, etz janch oy yca y'ügy jabom jabom. ²⁰ Nañ ji anajty tüg ayoobi jäy huidi limosna pijctzoob, hue' anajty yxii Lázaro. Lázaro jabom jabom anajty ycögnäy ma je comeeñjyäy ytiyc'aguu, janch niibu-utzp anajty ooy. ²¹ Lázaro ooy anajty jani'ixy caya'ñ je cayduc tzütztuc huidibi cáb ma je comeeñjyäy yca ybejt. Oy uc anajty ymiñ yhueyii je ñiübüz. ²² Chi jadu'n yjajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cni, e oy yajnaaxtigiyii. ²³ Chi je comeeñybi jiiby ca'oydactuuby tzaachypi anajty jihuñy, chi mij'ijxy jiguëgy je Abraham etz je Lázaro. ²⁴ Chi je comeeñybi ycapxy janch mic, yminañ: “Apteedy Abraham, ñich pa'ayoog. Tun may'ajt quex Lázaro, huen yi' ycñhuax yajxoogy miid nii etz xyajtjtzibich ndootz, co ñich ooy ayo'n nbaadyich ma jada mij jñin.” ²⁵ Chi Abraham y'adzooy: “Oc'ungich, ajihuñhui co ti mdzinäy ti mjogy'aty miid mhuit mmeen' agujc jotcujc, e yi Lázaro ooy ayo'n paty. Jadachambi Lázaro yjotcujc'aty, etz miich jiiby mbatpy tzaachypi. ²⁶ E jadügnax, ji tüg mij huoc ma ñich ajcxy etz miich ajcxy. Pen ñich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ñich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi Lázaro ma ñich ndeedy ytiyc. ²⁸ Jim ma ñich ndeedy ytiyc jim migoox miguëx nmídidyich, huen nicxy yajmiidmiydaaccixy, ca'ydi je' ajcxy nañ jadu'n ya minipy

ma jada ayoodac.” ²⁹ Chi Abraham y'adzooy: “Yi' ajcxy ymiid necy huidibi Moisés etz Dios y'ayucnajtzcaxiıybi ycojaay, huen cuydungixy.” ³⁰ Chi je comeeñybi yminañ: “Janch jadu'n apteedy Abraham. Pen nidüg yi ögpi ñicxy ma je' ajcxy, jothuimbidiş yi ajcxy.” ³¹ Chi Abraham yminañ: “Pen ca' je' ajcxy mijpidägy Moisés y'ayuc je jécıy etz hıdı ajcxy jecy'ajt Dios y'ayucnajtzcaxiıy, nañ ni ca' mişıccıxıpy pen nidüg ögpi yjugypıcy.”

17

Huidibi ooy ycodzigıjıty co n'agänájxim ma pocy

¹ Chi Jesús nimay yi' ydiscıpuslos:

—Janch tiy'ajt jadu'n co yminiş jäy ajcxy hıdı ya-jhuinma'ñyđıgoyış yi mayjäy ajcxy miid aaniı. ¡Ay yi' ay-oob ajcxy! pinjaty jäy ajcxy yajhuinma'ñyđıgoyaangixy.

² Nıgı y'óyıty co ixıpy yajyo'cxodziıyii tüg tzaa janch mijpi, e chi yajcöşibijpnaxıpy meşyoty, ca'ydı co ya-jhuinma'ñyđıgoyıpy jada jäy ajcxy huidibi ixpişcin hueeni miid ma Dios ytiy'ajt. ³ Naygüend'ájtıgıx miich ajcxy co ca' mgapxtıgóoygıxıpy.

Co m'uch xymıduđıgooyıpy, e chi mgapxhuıjış, e pen jothuimbıjt, chi mbocymeecxıpy. ⁴ Pen m'uch huıxtujc'oc xymıduđıgooy tüg xiıbi, nañ huıxtujc oc xyñimiiñ tüg xiıbi, e ymina'nıpy: “Ti njothuimbıtyıch”, huınmeecxıpy miich yi', chi jada' miich huıxtujc'oc mbocymeecxış.

Je mişıjcin ymiş'ajt

⁵ Chi je apóstoles ajcxy nimay je Huıdzın Jesús:

—Yajyeeg iich ajcxy nmışıjcin.

⁶ Chi je Huıdzın Jesús y'adzooy:

—Co ixıpy miich ajcxy mmışıcy Dios jadu'n nej tüg pi'c mostaza pajc, e mnıma' ixıpy jada paadzım quıpy:

“Nayyajpidǵii, nicx tina' mejyjoty, e xycapxymidohuip yi'.”

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymiid tüg ytumbi huidi tumb ñaaxjidzitzii o yhuaj cuend'aty, co yja'ty ma mdijc, ¿nej jěbi nimay: “Tigi', ixtäg ma mesa etz adzu'at?”

⁸ Hue' janchtiy mnimähuipy: “Yaj'oyiiyigich n'adzuu'ibi, co'amedí' mhuit, e xymooygich ngaayin n'uucin. E huin'it miich mgayipy m'ügipy.” ⁹ ¿Nej yajnaxipy je' Dioscojuyip miid co je' anajty ti tuñ huidibi yaj'ane'my? Hich minamb co ca'. ¹⁰ Nañ jadu'n miich ajcxy co ti mguydungixy tüg'óciy tiibi Dios xyaj'ane'mgixy, chi mmináangixipy: “Je' ich ajcxy je tumbi huidibi ca'p ycapxpaadyity, jěyi ti ndúngixich huidibi ich ajcxy huaad ndungixy.”

Jesús yajtzögy majc jäy jibic pützpa'mmiidpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy. ¹² Co anajty mihuingoñ tüg cajp, chi jipcoyöyiy majc jäy pützpa'mmiidpi. Chi ajcxy yhuäcxijpy jigüegyñi. ¹³ Chi ajcxy mic ycapxcoody yminaangixy:

—Huindzin Jesús, pa'ayoog ich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguëxícigix ma yi teedy ajcxy.

Chi jadu'n yjajtí, co ajcxy ñicxy, chi tüyöyjoty oy choocixy. ¹⁵ Nidügti je' ajcxy co ñay'ijxi co ti anajty chögy, chi nihuimbijty Jesús, ooy Dios jäymeç cömay janch cixyjot huiniçot. ¹⁶ Chi je' ycojxtinay'ahuüy ma Jesús ytecymijc, chi pidacpy yhuiñyjijp naaxcíxy yajnaxy Dioscojuyipy. Samaritanojyä je' anajty. ¹⁷ Chi Jesús yminañ:

—¿Nej ca' nimajc miich ajcxy huidi ti mdzoocixy? ¿Ma ajcxy je' janidaxtujcpi? ¹⁸ ¿Nej ca' pin jac yhuimbijty miiñ

jäymedza'ñ cömaya'ñ Dios, jëyi tügpajc ti yhuimbity jada samaritanojäy?

¹⁹ Chi Jesús nimay je jäy:

—Pidĭg, nicxni. Yi mmibĭjcin ti xyajtzögy.

Nej je' yminĭpy Dios y'ané'min

²⁰ Chi je fariseojäy ajcxy y'amidooy Jesús mina anajty yĭ Dios ya miñ ya naaxhuiñ y'ane'ma'ñ. Chi Jesús y'adzooy:

—Je Dios y'ané'min ca' je' yminĭpy jadu'n nej ti yaj'ixy o yajmidoy. ²¹ Ni mgamináangixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yĭ ydiscĭpulos ajcxy:

—Miim je xĭi je tiempo ma miich ajcxy anajty ooy xy-jamiid'idáangixich tüg xĭi, e ca' ĩich miich ajcxy xy'ixipy, ĩich je jäy huidi tzoon tzajpjoty. ²³ Chi jäy ajcxy yminá'nĭp: “Chaa'amy je', je Cristo”, o “Chim'amy je'.” Ca' miich ajcxy yĭ mninĭxcixipy, e ni mgabanĭxcixipy. ²⁴ Co anajty nmiñich jadügtecy ya naaxhuiñ, ĩich, je jäy huidi tzoon tzajpjoty, co ĩich anajty nmimiñ n'ané'min, jadu'n je' yjadĭpy nej huidzuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopĭcity co jayĭjp ocpáadĭbich ayo'n, e chi jada xyca'ixa'nĭbich xycatzoga'nĭbich yĭ jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadĭpy co anajty ĩich, je jäy huidi tzoon tzajpjoty, co anajty nxĭi ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytĭgĭy ma ymiĭcajoon. Chi je ayo'nduu ymiñ huidi cĭjx yaj'ögtĭgoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytĭjccoĭcixy. ²⁹ Huin'it xĭi co Lot chooni jim Sodoma, chi ycäy tzajpjoty jĭin etz huidi jindzaa miid

conhuidity ytoy, chi cajp ytigoyday. ³⁰ Jadu'n nej ayo'n yjajtí taabi chinaay Noé etz Lot ya naaxhuiñ, nañ jadu'n yjadiyib ayo'n co anajty nmiñich jadüg'oc ya naaxhuiñ, iich je jäy huidi tzoon tzajpjoty.

³¹ Je huin'it xii huin'it tiempo pin anajty iñaayb ma ytijsop, e ymiid anajty ypidägy jiiiby tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidipy ma ytijs. ³² Ajihuiyigix jadu'n nej Lot ytöxyjic ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (miid iich ycixpi), hue' je' yjugy'ajt ypaadipy chögipy.

³⁴ Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'miiyb. ³⁵ Nimetz töxyjäy anajty yjiitzcixy, tüg yajnicxiyb, etz jadüg yajhui'miiyb. ³⁶ Nimetz yëdyjc anajty ytungixy camjoty, tüg yajnicxiyb etz jadüg yajhui'miiyb.

³⁷ Chi je jäy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadiyib nej miich ti mina'ñ, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñimuga'ñ.

18

Je ijxpejt ma je ayoob itöxyjäy etz je juez

¹ Chi Jesús yajnimay ajcxy tüg ayuc huidijaty ixpijcp ma yi' co ooy ycopicyity Dios nmibijctzoohuim jabom jabom, ni ca' nmidziipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigy, etz ni jäy ajcxy anajty ca' huindzigy. ³ Nañ ma je cajp jim anajty tüg co'ögy ytöxyjäy. Je' anajty yminög

janam jadojoc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñjoty: “Oy Dios ca' ndzigiyich, ni jäy ca' nhuindzigiyich, per com jada co'ögytöxyjäy nigü xychach'amayiyich, miñ n'ocnihua'ñich, ca'ydi jadüg'oc ymiñ e xyajcixich anajty nmecxtüjcin.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibyü. ⁷ ¿Nej ca' Dios ñihuaanip yi huidibi ti huin'ixy, huidibi mibijctzoob xim tzuum? ¿Huäcxibip, nicx ca' tzojc adzooyi? ⁸ Hich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, ich, je jäy huidi tzoon tzajpjoty, ¿nej nbáadibich mibijcin ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huidi ci'm ooy ñaygö-mayyü co ooy y'oyjäyü, etz pejxy yi jacjadyübi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigüy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuüy ycapxtägy, chachmina'ñ jadu'n: “Dios Teedy, Dioscojuyip yajnaxpich com co ca' ich nbocytuñich jadu'n nej jacjadyüi jäy ypocytünngixy, ca' nmeechich, ca' njibicjäyidyich, ca' nmigapxich huingjäy ytöxyijc, ca' nbocytuñich jadu'n nej jada yajcogüejtpi.

¹² Mejtz xü n'ityich jaygay tügpi semaan. Chi huen ytim ti nmüdich ngüejtpyich ma Dios majcjaty.” ¹³ Per je yajcogüejtpi jiguem ytinay'ahuüy, ni ycapät'ixy tzajpcix, jëy ycaachtzachcoxy ymina'ñ: “Dios Teedy, pa'ayoogich, ich pocyjäyich.” ¹⁴ Hich miich ajcxy nimaayb co jada yajcogüejtpi y'idacy ma ytijc ti anajty yajhuinmecxy

ypocy, e je fariseojäy ca' yajpocyhuinmecxy. Huenpínity huidi ci'm naygömayipy, Dios yajtzöyduniib; e pinjaty ca' ñaygömayyii ci'm, Dios ycömayiib.

Jesús conucxy je pi'ctijc ajcxy

¹⁵ Chi jäy ajcxy miidmiñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy ogy undgaj.

¹⁶ Chi Jesús yaaxi ymigügtijc nimay ajcxy:

—Ixmatz, huen yi pi'ctijc xyñimiñich, ca' ajcxy mjijpcogapxiigyxy, com yi jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch iich miich ajcxy nimäy co hueñypínity huidi ca' cöbijci yi Dios y'ayuc ytiy'ajt jadu'n nej yi pi'ctijc ajcxy cöbijcy Dios y'ayuc ytiy'ajt, ca' yi' ajcxy ytiy'ajhuipy ma Dios y'ané'min.

Tüg comeñ'anäg ymiydägy miid Jesús

¹⁸ Chi tüg micjäy y'amidooy Jesús, nimay:

—Miich ogyäybi Huindzin, ¿ti huaad nduñich co iich n'alma nidzoocin paadipy?

¹⁹ Chi Jesús y'adzooy:

—¿Nej co xytijich ogyäy? Ni pin ya yca'ogyäyity, je'yi Dios tügpajc y'ogyäyity. ²⁰ Miich mnejhuiyb yi Dios ycötújcín. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

²¹ Chi je' y'adzooy:

—Ti tüg'óciy nguydundäyich jada cötújcín maabi nyecpidzimyich.

²² Co Jesús jadu'n midooy, chi nimay:

—Tigoy'ijtni ja tüg huidi ca' mduñi. Toocta' tüg'óciy tijaty miich miid, e mo' je meeñ ayoobtijc, huin'it mgomeeñ'adipy jiiby tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchípity ytigihuípy tüg comeeñyäjy ma Dios y'ané'min. ²⁵ Jac ca' chípity co ñaxipy tüg camello ma yi xu'ñ yxútity, ca'ydi co tüg comeeñyäjy ytigihuípy ma Dios y'ané'min.

²⁶ Chi je jäy ajcxy anajty tiibi ajcxy midoogixy Jesús y'ayuc, ymínaangixy:

—¿Pin jada' jébi y'alma paadipy nüdzoocin?

²⁷ Chi Jesús y'adzooy:

—Huidibi naaxhuiñyäjy ajcxy ca' jaty nej yaj'oyihuípy, Dios jébi yaj'oyiy.

²⁸ Chi Pedro ymínañ:

—Iich ajcxy ti nbidägy n'ixmajtzaaygixy, co nbanicxaangixy.

²⁹⁻³⁰ Chi Jesús y'adzooy:

—Janch iich miich ajcxy nnímaaygixy co yi jäy ajcxy huídi ytiyc ixmajtz etz ytaj yteedy, ymiguëx, etz y'ung y'anäg miid Dios y'ané'min ycixpi, ypáadipy ajcxy ya naaxhuiñ nīgi oy'ájtín, etz ypaadipy ajcxy tzajpjoty tzínaayín huídi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nímay ajcxy:

—Jadachambi tzoc jámim jím Jerusalén. Nguydunaamyich tüg'óciy jadu'n nej yi Dios y'ayucnajtzcaxhiybi ajcxy jaybejty jecy'ajty miid iich ycixpi, iich, je jäy huídi tzoón tzajpjoty. ³² Chi nyajciyega'ñiich ma je romano gobernador, xycamiñ'ixipy xycamiñpidägibich ajcxy. Xy'ójbich xyhuindzújbich xyjijptzújbich ajcxy. ³³ Xychaachytunipyich ajcxy, xyaj'ögibich ajcxy, e codugüg xii njugypigipyich jadüg'oc.

³⁴ Chi yi majmetzpi ajcxy ni jadu'ñyi ca' huinjihuiy ajcxy nej yhuimbizimy Jesús y'ayuc. Yüch anajty jada ayuc miid yi' ajcxy ycixpi, paady ca' huinjihuiy nej anajty yajniimaaygixy.

Jesús yajhuindicxigy tüg huintzpi jim Jericó

³⁵ Chi jadu'n yjajti co Jesús mihuingoñ je cajp huidi yxii Jericó, chi tüg huintzpi anajty iñäy tüba'áy pijctzoy anajty limosna. ³⁶ Co midooy mayjäy ñaxy, chi je' yajtyi:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, iich pa'ayoog.

³⁹ Je jäy ajcxy huidi anajty jayijp nicxp ooy ooy je huintzpi, nimay co huen amoñ. E je' nigü mic yminan'idich:

—David y'ap y'oc, iich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxíccich.

⁴² Chi Jesús minañ:

—Huindicxig, yi mmibíjcin ti xyajtzögy.

⁴³ Chi je huintzpi mic'amy yhuin y'ijxigy, chi panicy Jesús, chi ooy jäymejch cömay yi Dios. Cham tüg'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

19

Jesús miid Zaqueo

¹ Co Jesús ytigüy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxii Zaqueo.

Hue' je' anajty yajcogüejtpi huindzin, e comeeñ anajty.

³ Ooy yi' anajty tzach'ixa'ñ Jesús, nejhuñhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy.

⁵ Co Jesús jim ymejch, chi pä't'ijxy je Zaqueo, e nimay:

—Zaqueo, tzojc minac, com copicy co ñicxy njät-täga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús.

⁷ Co jadu'n ijxy, chi je mayjäy ajcxy nigapxy ni'ojhygixy Jesús, yminaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcujtnaxy, nyajhuimbidityich midaax jadu'ñyi.

⁹ Chi Jesús yminañ:

—Jadachambi jada jäy ma jadayaabi tijc ti y'alma ñidzögy, com co yi' nañ jadu'n Abraham y'ap'adyii y'oc'adyii. ¹⁰ ñich, je jäy huidi tzoon tzajpjoty, ti nmiñich ya naaxhuiñ co n'ixtähuibich etz nyajñidzögibich tübi anajty ytigooy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeeñyjäy anajty, ñicxy ma tüg naaxjot jiguembi, ñicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy ni-majc ytumbi, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ájtci x ji ixti cooni ñich anajty nhuimbityich.” ¹⁴ Chi je ymígogajp ajcxy

ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi yminañ: "Ca' ñich ajcxy ndzocy co jada comeeñyäjy rey'adipy ma ñich ajcxy." ¹⁵ Chi jadu'n yjajty co je comeeñyäjy yhuimbijty ti anajty yreytigy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuñhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ yminañ: "Huindzin, yi meeñ majcjadu'ñi ti nyaj'ung'atyich." ¹⁷ Chi je rey y'adzooy: "Ooy miich oy mduñ. Jadu'n nej ti mgapxycöbicy miid huidi hueeni, cham m'ane'mipy majc ciudad." ¹⁸ Chi je mimetzpi ymiñ, yminañ: "Huindzin, yi mmeñ migoox jadu'ñyi ti nyaj'ung'atyich." ¹⁹ Chi je rey nimay je mimetzpi: "Cham m'ane'mipy migoox ciudad." ²⁰⁻²¹ Chi je midugigpi ymiñ, yminañ: "Huindzin, cha je mmeñ huidi ti nmi'ityich, ti nyujpcyich ma tüg paayi. Ndzigiybich miich co miich mjäy'aty ahua'ñ, myajpidigtäy huidi ca' mjë'adyii, nañ mdzijcxy huidi ca' ti mnipy." ²² Chi je rey yminañ: "Miich jibic ti mduñ, cham ndiyduna'ñ miid mgi'm'ayuc ycixpi. Miich mnejhuiyb co nyajpidigyich huidi ca' një'adyijich, e ndzicyich huidi ca' ti nni'byich. ²³ ¿Nej co ca' ti mbiägy ñich mmeñ ma je banco, jigix co ixypy nhuimbityich, may meeñ ixypy xycidigyich miid meeñ'ung?" ²⁴ Chi je rey nimay huidi anajty ajcxy jimip: "Pijci ajcxy yi' ymeeñ, etz mooygixy yi' tiibi meeñ yaj'ung'aty majc jadu'ñyi." ²⁵ Chi je jäy ajcxy y'adzooy: "Huindzin, ymiid yi' cham majc jadu'ñyi meeñ." ²⁶ Chi je rey y'adzooy: "Ñich minaam co tüg'óciy pinjaty miid, jacyajmöhuip; e huidi ca' ti miidity, oy jamiidity yajpijctähuip huidi ymiid. ²⁷ Nañ jadu'n ajcxy je nmizipich huidi ca' anajty tzojccixy co ñich nrey'adipyich ma yi' ajcxy, yajmiingix ya,

yo'cpujxtutaaygix ma iich nhuinduu.”

Jesús ytiigiij Jerusalén

²⁸ Co Jesús jadu'n yminanday, chi choñ jím, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjajty co jím yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Níxcix ma yjiibi cajp huidi ji huingon. Co ajcxy mgajptugíhuip mbáatcixipy tüg burro mang ycoxochity, huidi ca' ni pin yaj'iñaayñi. Mgoguejtúutcixipy, etz mmimíingixipy. ³¹ Pen jím pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jím tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³ Jím anajty ajcxy je burro mang coguejtuutcixy, co ñihuindzin ñimaayi ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jím tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ miid yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügujc. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytiigiij ajcxy ooy alabanza iibi Dios ojadajtpi miid je mij huinma'ñ ycixpi co anajty ti íjxcixy huidi anajty Jesús ti tuñ. ³⁸ Chachmíanaangixy:

—¡Capxpaady je rey huidi miimb miid Huindzin Dios yxii ycixpi! ¡Jotcujc'ajt jiiby tzajpjoty etz cömáyin ma Dios!

³⁹ Huin'it nijëjity fariseojäy huïdi anajty ajcxy jiiby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Hich miich ajcxy nimaayb pen yi' ajcxy amomb, yi tzaa tigihuiip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy miid je cajpjäy ycixpi. ⁴² Chi Jesús yminañ:

—¡Pen mhuijnihuüyb ixypy miich ajcxy nej mbáatcixipy mjotcujc'ájtin jadachambi xii tiempo! Yüch jada tiy'ajt cham ity ma miich ajcxy, ca' huaad m'íjxcixy. ⁴³ Minip je xii je tiempo ma miich ajcxy je mmidzip ajcxy xyajjüdügipy mgajp miid tzaamacxy, e tziptunipy ajcxy miid miich, yajxon xyajco'adugipy ajcxy jühuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huïdi anajty jiiby ajuuyb adoocp. ⁴⁶ Chi Jesús nimay je jäy ajcxy:

—Jadu'n mina'ñ ma jaybétyity: “Hich ndijci tzajpcapxy-capxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmiidpi, etz huïdi ajcxy yaj'ixpijcp anajty Dios ñecy, etz mijjäydijc ajcxy nihuinmayiigixy co yaj'ögaangixy Jesús. ⁴⁸ Chi ajcxy ca' ni nej mihuinma'nybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcin

¹ Chi jadu'n yjajty tüg xii anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmiidpi ajcxy etz huidi ajcxy yaj'ixpijc Dios ñecy etz mijjäydijc ajcxy. ² Chi ajcxy migapxy Jesús nimay:

—Yajñimaaygich, ¿ma cötújcin ti mbaady co jäy myaj'ixpicy ya ma Dios ytijc? ¿Pin je' tibi xycötujc möy?

³ Chi Jesús y'adzooy:

—Íich nañ jadu'n nyaj'amidohuamy íich miich ajcxy tüg ayuc, e m'adzóogixip. ⁴ Co Juan (je Bautista) jäy jajñibejty, ¿pin je' cötújcin moy, je Dios tzajpjotypi o jäy ajcxy?

⁵ Chi ajcxy ytigiiy huinmay'ahuidijtpi ñayñimáayigixy miñ xyipy:

—Pen minaanim co tzajpjoty choñ je Juan ycötújcin, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶ Pen minaanim ajt co jäy cötújcin moy je Juan, chi tüg'óciy cajpjäy tzojc xycögädzim, com ymibijcipy ajcxy co yi' Juan, Dios yi' y'ayucnajtzcaxiiybi.

⁷ Chi ajcxy y'adzooy co ca' ajcxy nejhuuiygixy pin Juan ti quexyii. ⁸ Chi Jesús nimay je' ajcxy:

—Íich nañ jadu'n ca' nigapxa'ñich pin ti xycötu-jcmöyich.

Je ijxpejt ma je tumbidijc ajcxy jibicjäybi

⁹ Chi Jesús yminandacy jajñimay tüg'óciy je jäy ajcxy tüg ayuc, ymíañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy.

¹⁰ Co cosecha paty, chi quejxy tüg ytumbi ma je ytumbidijc, huen cämöyii huidibi je' anajty paatip. Chi je

ytumbidijc huinhuojpy jįjphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojoy jįj'ojy ajcxy, yajhuimbijty ajcxy, ca' ajcxy ni ti mooy. ¹² Chi midugiigpi ytumbi quejxy, nañ jadu'n ajcxy je' yajtzaachiiy etz yajhuimbijty ajcxy.

¹³ Huin'it je camuuxycam huindzin yminañ: “¿Ti ndunipyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yí' je' jada cam jėdaanip. Tzoc yaj'o'cim jigix iich ajt jada cam njė'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy miid huingbi tumbi.

Co je jäy ajcxy jadu'n midoy, chi ajcxy yminañ:

—Ni catzogipy Dios, nicxy jadu'n njajtim.

¹⁷ Chi Jesús huindixpejty je mayjäy nimay ajcxy:

—¿Ti tijamy huidi yjaybétyip ma Dios ñecy?

Jadu'n:

Je yėydijc huidi je jäy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejihuıy je tzaa oyjatypi huidibi je pojtzpidijc ajcxy ca' yajtuna'ñ, je' oy ti yhui'mni ma anajty yjaccopıcyty.

¹⁸ Pinjaty ca' cöbiga'ñ jada mij'ane'mbi, ayo'n ypadamy, tim jadu'n nipaady nej ihuıy jim ycıjxcıday ma je tzaa nıcx e tijhuıtız yjajtahuıpy; e pen je tzaa nigıdagoty, je' ajcxy janch jaam püx nicxy yjajtcıxy.

Yajnidiiygixy pen jėbi cogüėttin yajyecy o pen ca'

¹⁹ Je teedy tungmiidpi etz huidi ajcxy yaj'ixpijc Dios ñecy ooy anajty nihuinmayiigixy madzaangixy je Jesús mic'amy, co ajcxy huinjihuüy co Jesús nimiydáacigixy miid je jihuimbit ayuc, e chigiüyb anajty ajcxy je cajp jäy.

²⁰ Chi ajcxy chachhuinma'ñ'ixtaaygixy nej huaad xigixy Jesús, chi quejxy ajcxy ixx'ijtpi ma Jesús yajpaady huidi naybidaacip janch ypaat tudägyjäy; chi amidoo'ijtcixy Jesús y'ayuc huidi miid xihuaangixy, chi cüyegaangixy ma je gobernador. ²¹ Chi je ixx'ijtpi ajcxy y'amidooy Jesús nimay ajcxy:

—Huindzin, nejhuiyb iich ajcxy co miich m'ayuc ooy y'óyity, etz myaj'ixpicy yajxon, ca' huin'ixpety jäy myaj'ixpicy, etz myaj'ixpicy Dios ytiy'ajt nej jäy jébi huaad chinaaygixy. ²² ¿Nej copicy iich ajcxy migüedipy je César je romanojäy mij'ane'mbi, o ca'iji?

²³ Chi Jesús huinjihuüy yi' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich?

²⁴ Yaj'ijxcich tüg meeñ. ¿Pin y'ahuinax etz pin yxi mimb ma jada meeñ?

Chi ajcxy y'adzooy:

—Yi César.

²⁵ Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶ Ca' mimadacy ajcxy nej tzu'ijxcixy ma mayjäy yhuin-duu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

*Yajnid*iigixy je jugy'ájtin ycixpi

²⁷ Chi ñija'tti Jesús tüg saduceojäy, e yi saduceojäy ajcxy ymíañ co jäy ögy ca' y'ocjuyujcni. Chi je' yajtiy:

²⁸ —Huindzin, Moisés jaybety ma yi' ñecy, je jécyip, co tüg yéydijc ytöxyjc yajhui'my ix'ögp, e ca' ymang

ti paatcixy. Jëbi je yëydijc y'uch miidtzinäy je töxyjäy jaydëbi yaj'ung'ixip miid y'ajch ycixpi. ²⁹ Jadu'n anajty tügpicy jäy, nihuixtujc ajcxy ytügquëx'ájticy, ac yëydijc ajcxy. Je mijpi miidtzinay töxyjäy, chi ix'o'cy, e ca' ymang paty. ³⁰ Chi je mimetzpi ypijcy miid je töxyjäy, e ni ca' ajcxy ung paty. ³¹ Chi je midugiigpi ypijcy miid je töxyjäy, e jadu'n je nihuixtujcpi miidtzinay ajcxy je töxyjäy, ix'o'cy ajcxy, ni ca' ajcxy ung paty. ³² Chi nañ jadu'n je töxyjäy y'ögni. ³³ Co anajty je nihuixtujcpi jugypijccixy, ¿huidi jada' octöxijc'adhiyb je töxyjäy? Com nihuixtujc ajcxy ti töxyjic'ájtigixy.

³⁴ Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. ³⁵ Je jäy ajcxy huidibi paatip anajty chinähuij ma je tiempo huidi mimb co ögpi yjugypijccixipy, ni ca' ajcxy ypigipy, ni ca' ajcxy ñaymóoyigixipy y'ung huen pijccixy. ³⁶ Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy miid je ángeles ajcxy, e Dios yi' ajcxy ung'adhib co yjugypigipy miid jemybi jugy'ájtin. ³⁷ Janch co yi' ögpi yjugypigipy, jëbi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “Iich Abraham yDios, Isaac yDios, Jacob yDios.” ³⁸ Je ögpi ca' miidity Dios. Je jäy ajcxy huidi juugyip janchtiy ajcxy ymiid Dios, com co miid Dios ycixpi tüg'óciy jäy ajcxy ymiid yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús: —Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

*P*in je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mina'ñ co Cristo David y'ap y'oc?

⁴² David ci'm mina'ñ ma je Salmo necy:

Yi Huindzin Dios nimay ñich nHuindzin: “Iña' ya a'oy'amy ma ñich.

⁴³ Ixti cooni anajty miich mmidzip ti nmimadactäyich, jadu'n nej jihuüy ti nbidägyich yi mmidzip ma miich mdecypocxpejt.”

⁴⁴ Co David yxiimoy Cristo ñich nHuindzin, ¿nejtz yi' co y'ap'adyii y'oc'adyii?

Jesús xïy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix miid yi' escribas ajcxy ydiscípulos, co ajcxy ooy tzojccixy yhuídidaangixy miid yhuit oyjatypi, ooy ajcxy tzojccixy co huen capxpcxyii ma jäy y'amugïy, e ooy ajcxy tzojccixy yi cödumbi ññaybejt ma naymujctac, etz ooy ajcxy tzojccixy cödumbi ññaybejt ma jäy ajcxy yxiidungixy. ⁴⁷ Chi ajcxy yajcijxtayi yi co'ögytöxyjäy ypidägy, e tungixy ooy jecy tzajpcapxy-capxi ma jäy yhuinduu. Yi jadu'mbi jäy ajcxy ñigi ajcxy Dios chaachytunñyb miid ypocy ycixpi ca'ydi jacnipin.

21

Je ayoobitöxyjäy co'ögypi y'ofrenda

¹ Jiiby anajty Jesús ma Dios ytijc co ijxy comeññjäy may'amy ofrenda pidaaccixy ma meeñygaax. ² E ñañ ijxy co tüg co'ögytöxyjäy pidägy anajty metz pi'cmeñ. ³ Chi Jesús yminañ:

—Janch ñich miich ajcxy nimäy co jadyaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeññdijc ajcxy ypidacyp ma ofrenda je meñ huídi conajxp. Jadyaabi co'ögytöxyjäy ti pidägy huídi anajty ñigayamy.

Jesús yminañ co je Dios ytijc yhuindigoya'ñ

⁵ Nijëjity jäy co ytigëiy ma Dios ytijc nimiryacy ajcxy co Dios ytijc ooy chach'oy'oydúñity miid tzaa oyjatpyi, e miid tiibi jiiby vojxcixy. Chi Jesús yminañ:

⁶ —Tüg'óciy jada huidi ajcxy m'ijxpy ma Dios ytijc, minip xii tiempo mina jada nicxy yhui'my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytuniyb yjadiyb nej miich ti mminañ? ¿Ti tiy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy ymina'ñ ñaybidägáanigixy co je' ajcxy je Cristo, ymina'ñ ajcxy: “Hich je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachchiptungixy, e ñayñibidëigixy, ca' mdzigëiygixipy, com ooy ycopícyity co jada jadu'n jayijp ytuniyb yjadiyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacminañ:

—Nayñibidägëib naax cajp miid huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadiib mij'adzigi'ñ, etz ooy ijxpejt huidi quëxëigip tza-jpcíxy.

¹² Ma ca'ni anajty jadu'n jadyii, xypahuidijtcóotcixipy jäy, xymájtzcixipy, xycëyéjcxipy ma judójay ñaymujctac. Chi jäy ajcxy xypidägipy pujxtigoty, xyajnicxcixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy miid miich ajcxy com co anajty ti

xymijpidáaccixyich. ¹³ Miich ajcxy tiy'ajt myegipy miid iich nxii ycixpi. ¹⁴ Co jäy ajcxy yxihuipy ma codungdijc, ca' ni nej ajcxy mjet'adiiyb, ni ca' ajcxy mhuinmayipy nej m'adzooigixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzooigixipy, e nej xyjacxigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjixipy ma cötujctac. Nijëjity miich ajcxy m'ögipy miid co anajty ti mmijpidaaccixy iich n'ayuc. ¹⁷ Mayjäy ajcxy ca' xy'ixaanipy xychogaanipy miid co anajty ti mmijpidaaccixy iich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy miid ymidzip, huin'it ajcxy mnejhuihuipy co huington je'anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yquécicixipy ñicxcixipy ajcxy yu-ugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiinyi ma je Jerusalén cajp. ²² Je tiempo mina yjadiiyb ayo'n miid co anajty judío jäy ti ytundigooygixy, je' jada yajcuy- dundaayb jadu'n nej yjaaybétyity ma Dios ñecy. ²³ ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty miid y'ungma'xung! Ooy jadiib mij ayo'n ya naaxhuin etz tzip éjcin ma jada cajp. ²⁴ Nijëjity ajcxy y'ögipy tzipjoty, e nijëjity yajnicxip tzumy mach ma hu- ingbi cajp huingbi naax. E Jerusalén naxmihuägidyähuib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

Nejjada' yminipy je Dios y'ung

²⁵ Huin'it xii huin'it tiempo quëxgip ijxpejt ma xii po' etz ma yi madza', ya naaxhuin ooy jäy ajcxy jot-

may mi'idi'py. Je jäy ajcxy ooy chig'huipy yjihu'huipy yhuinmay'ahuididi'py ajcxy ooy, miid je meyy ycixpi co anajty chachpidi'gy chachnögy chachmina'n. ²⁶ Yi jäy ajcxy anucxi'n yajcidahuiib co anajty ajcxy ixy nej yjadyii huindu'mybi naaxhuiñ; e huidijaty mic'ajt yajpatp jibiy tzajpjoty yücxtähuipy yi'. ²⁷ Huin'it miich ajcxy xy'ixipyich, ich je jäy huidi tzoon tzajpjoty, nmiinich jocjoty miid je nmic'ajtich, nmiinich miid ich ngötújcín etz ich n'oy'ájtín mijpi. ²⁸ Co je ayo'n tiempo jadu'n yjatzondägi'py, chi mba't'ijxcixipy com huingoniñ anajty mina Dios xyñihuáangixipy xycohuáangixipy.

²⁹ Chi Jesús yajnimay ajcxy tüg ayuc, yminañ:

—Ijxcix yi higuere etz tüg'óciy quipy, ³⁰ co yhuamigy huin'it miich ajcxy nejhu'iy co ti yhuingoni mina ypottigi'yiñi. ³¹ Tim jadu'n nej miich ajcxy ijxpejt mbicy ma higuere quipy co pottiempo ytigi'yiñi, nañ jadu'n co miich ajcxy m'ixipy je ijxpejt tzajpcixy jadu'n nej yam nyajnimaa'ygixy, mnejhu'huipy ajcxy co huingónip je tiempo mina Dios y'ane'ma'n ya naaxhuiñ.

³² Janch nimaaybich miich ajcxy co jadu'n yjadiiyb ytuni'iyb jayijp, ca' anajty o'ctäy je jäy ajcxy huidibi tzinaayb jugy'ájtci'yp jadachambi xii tiempo. ³³ Yi tzajp etz naaxhuiñybi naxip tigoyip yi'. Ich n'ayuc ca' ñaxipy ytigoyipy ni camina.

³⁴ Naygüend'ájtigix miich ajcxy ca' mnijot'ájtci'xy yi jocni yi mügi, etz yi tzinaayin jugy'ájtín, jigix ca' ajcxy xynimini'py jotcömo'nyi je ayo'n xii je ayo'n tiempo.

³⁵ Timetiini minipy je ayo'n tiempo miid jäy ajcxy ycixpi huidi ya tzinaayb ma tüg'óciy naaxhuiñybi. Tim jadu'n nej tüg iyujc ayo'nbaady co timetiini yajtüxuuch. ³⁶ Ni'ixi'ijtcix, mibijctzoogix Dios, ca'ydi ayo'n ajcxy mbaatcixy huidi jadaanip, jigix jibiy myajpáatcixipy tzajpjoty ma ich nhuinduu, ich, je jäy huidi tzoon tzajpjoty.

³⁷ Xiim anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huidi yxii Olivos. ³⁸ Jabom jabom jopy jopy ñiminyii tüg'óciy cajpjäy jii by ma Dios ytijc tibäy co y'amidoo'idaani ajcxy Jesús y'ayuc.

22

Xiicyöygixy capxyöygixy nej huaad Jesús májtzcixy

¹ Huigon anajty je xii mina jäy tzajcaagy caaygixy huidi ca' ylevadura miidity, huidi jäy ytijpy pascua xii. ² Chi je teedy mijtungmiidpi etz je escribas yhuinma'ñ'ixtaaygixy nej ajcxy ocyaj'ögipy Jesús. Chigiyyb anajty ajcxy je cajpjäy.

³ Chi je mujcu' ytiigiyy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mijtungmiidpi etz tzajptijc soldado huindzin, e ycapxytuñ miid je' ajcxy nej jëbi cïyecy Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meeñ möhuangixy je Judas. ⁶ Chi Judas cöbijcy je meeñ, chi yhuinma'ñ'ixtay nej jëbi cïyegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ájtin

⁷ Chi paty je xii mina jäy cay je tzajcaagy huidi ca' ylevadura miidity com huin'it anajty ajcxy yaj'ögy cöbixy ymang pascua xiigixp. ⁸ Chi Jesús quejxy Pedro etz Juan, nimay:

—Ñicx miich ajcxy yaj'oyi' je pascua adzu'ïbi, jaydëbi ajt ngaayim.

⁹ Chi ajcxy y'amidooy:

—¿Ma mdzocy co nyaj'oyi'huibich ajcxy?

¹⁰ Chi Jesús yminañ:

—Co mdig'ihuipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjädipy ma je jäy ytijc, chi ajcxy mnimähuipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi miid ich ndiscípulotijci?” ¹² Je codijc miich ajcxy xyajni'ixihuip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiyy je pascua caayin uucin.

¹⁴ Co je hora paty, chi Jesús y'ixtacy ma je mesa miid je' ydiscípulos ajcxy. ¹⁵ Chi Jesús yminañ:

—Ti ooy nijot'atyich co nmiidgayaangixy jada pascua adzu'ibi ma ca'ni n'ögyñich. ¹⁶ Ich miich ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundähuipy je pascua xii ytiy'ajt ma Dios y'ané'min.

¹⁷ Chi Jesús conigy je ügy co Dioscojúyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸ Cham ich miich ajcxy nimäy co jadu'n nej yjacnicxa'ñ xii tiempo ca' vino nii üga'ñich ixti cooni Dios y'ané'min yminiipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nninicx'ajtpyich huidi ngiyejcpyich ma yi o'cin miid miich ajcxy mbocy ycixpi. Jada iixpejt miich ajcxy mi'idipy oy jäymech miid ich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej ñich nni'py huidi temam yogam miid miich ajcxy ycixpi.

²¹ Jadachambi yi jäy huidi xyciyegaambich ma nmidzipich, ya je' cham miid'ñäyich ma jada mesa.

²² Janch jadu'n njada'ñ n'ayoohua'ñich jadu'n nej ti nyajnigodugiyiijich. ¿Ayo'n padamy je jäy ayoob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ñich ajt huidi jadu'n tundigoyam?

Yajcapxcójcixy pin jada' jacniği ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy.

²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtjycixy co ooy oytuungixy. ²⁶ Miid miich ajcxy ca'ydi yjadú'nity. Hue' janchtiy je mijpi ma miich ajcxy huen ñaybidägyii nej jihuiy ymútzity. E je huidi nigohuajc'ajtp huen ñaybidägyii nej jihuiy je' je' je tumbi. ²⁷ ¿Pin je' jacmijip? ¿Huidi ñaybi ma mesa, o huidi ni'ixiyyb a'ixiyyb caayin uucin? Yi' je' jacmijip huidi ñaayb ma mesa. Per ñich ijtpich miid miich ajcxy jadu'n nej huidi ni'ixiyyb aa'ixiyyb caayin uucin.

²⁸ Miich ajcxy ti m'ijtcixy miid ñich ma anajty ayo'n ti nyajnaxyich. ²⁹ Paady ñich miich ajcxy tüg ané'min nmooyb, jadu'n nej ñich ndeedy ti xymöyich. ³⁰ Jaydëbi miich ajcxy mgáaygixipy m'uuccixipy ma ñich nmesa jiiby ma ñich n'ané'min e m'ñähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

*Jesús capxp*idzimy co Pedro ymina'na'ñ co ca'p Jesús icy'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jäy trigo huimbojy co yajhuätzaangixy. ³² Per ñich Dios nmibijctzooyich miid miich ycixpi, jigix miich ca'ydi mmibijcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcujc ñich nnicxa'ñich miid miich oy pujxtigótyity, etz oy ndimy'ögibich miid miich.

³⁴ Huin'it Jesús nimay Pedro:

—Ñich miich nimaayb co ca'ni anajty tzey yaxigy jabom jopy co miich miná'nip tugüig'oc co miich ca' xy'ix'adyiijich.

Huingomb hori ma Jesús y'ocyaj'ijxmadza'ñ

³⁵ Chi Jesús nimay ydiscípulos ajcxy:

—Co ñich miich ajcxy jayhuin nguejxy, ni mmoral, ni ca' mmeeydijc, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydijc etz ymorral miid, huen minicx; nañ pin ca' miidity y'espada, huen toogy yjocx huit, chi juyipy y'espada. ³⁷ ñich miich ajcxy nimaayb co copicy jada yajcuydunipy huidibi mimb jaybety miid ñich ycixpi ma Dios ñecy ma jadu'n yminañ: “Yaj'amichomujc (je Cristo) miid yi' ajcxy huidi jibicjäyip.” Tüg'óciy mimb jaybéty ma Dios ñecy miid ñich ycixpi, yajcuydunipy yi'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemaní

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuiipy ajcxy ca'ydi mdigiiygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuüy ytigiiy Dios mibijctzoob. ⁴² Chi Jesús yminañ:

—Dios Teedy, pen miich m'a'ixiiyb píjçigich jada tzaachypi, ca' iich huaad nyajnaxyich, per ca' iich huaad ngi'mdzójcin nguyduñich, miich mdzójcin huen myajcuyduñ.

⁴³ Chi ñayguëxçi tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitniñ ypidzimy janch jadu'n yi' anajty nej ni'py janch mijjaty y'ocnajtza'cxiiyñi.

⁴⁵ Co ypidigy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymigügtijc ajcxy:

—¿Ti co mdzachmaagixy? Pidicçix mibijctzoogix Dios, ca'ydi jibic tuum mdigiiygixy.

Yajnicxcixy mach je Jesús

⁴⁷ Jim Jesús anajty ymigügtijc ajcxy miidcapxy miidmiydägy, co je mayjäy oy yjäty. Jayijp anajty ymiñ je huidi anajty xiijp Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzüxca'ñ. ⁴⁸ Chi Jesús yminañ:

—Judas, ¿nej miid tüg tzücxin mgïyecy ma ymidzip, je jäy huidi tzoon tzajpjotyí?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyí yjadyí, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachïyi je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús yminañ:

—Ixmajtcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmiidpi ajcxy, yi Dios ytijc policia huindzin etz mijjäydijc:

—¿Nej co xyñimíngixyich miid pujx etz mguipyjijpxu'ñ jadu'n nej jihuïy ich tüg meetzpi? ⁵³ Jiiby ich anajty jabom jabom ma Dios ytijc, e ca' miich ajcxy ti ti mduñ miid ich. Per cham jëdu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jiguëgyjihui' anajty ypanicxyii. ⁵⁵ Jim ajcxy jin yajmijiy tibägujç chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy. ⁵⁶ Huin'it tüg pödumbi ijxy Pedro inäy ma jimba', chi huindicxpejty nimay:

—Jada yëydijc nañ ymiid anajty Jesús.

⁵⁷ Chi Pedro ca' cöbijcy, yminañ:

—Töxyjäy, ca' ich yi' n'ixy'adyii.

⁵⁸ Nañ jahueengi huin'it jadüg jäy Pedro yhuindicxpejti, ñimaayi:

—Miich, yi Jesús ajcxy anajty miid m'ity.

Chi Pedro yminañ:

—Ca' n'ichity.

⁵⁹ Ti anajty tüg hori ninaxni co oy huingbi yminandägy:
—Janch co jada yëydjic yi' anajty miid y'ity Jesús. Com
nañ galileojäy yi'.

⁶⁰ Chi Pedro yminañ:

—Ca' iich nhuinjihuïy nej miich mmina'ñ.

Capxni anajty je Pedro co tzey oy yaaxïgy. ⁶¹ Chi
je Huindzin Jesús ni'ijxhuimbijty je Pedro. Huin'it Pe-
dro jäymetzcootti je' ayuc nej anajty yHuindzin Jesús ti
ñimäyii: “Ni ca'ni anajty tzey yaaxïgy cham coodz co
miich tugiig'oc xycoyüdzibyich.” ⁶² Chi Pedro ypidzimy
tibäy, oy jii by yäxy miid tájin máyin.

Nixiiccixy yajxiiccixy yi Jesús

⁶³ Je jäy ajcxy huidi anajty Jesús cuend'ajtp, ooy ajcxy
nixiicy niyaaxy, etz nañ ooy ajcxy huingojxy jïjpcojxy.

⁶⁴ Chi ajcxy huingoxodziy, e cojxy ajcxy ma yhuiñyjïj, nimaaygixy:

—Octiygapx, ¿pin ti xycoxy?

⁶⁵ E ooy anajty miid yjibic ayuc cixy cuety nimaaygixy.

Jesús mijjuntajoty yajpaady

⁶⁶ Co yxiimiiy, chi yöymujcy yi teedy mijtungmiidpi
ajcxy, yi mijjäydjic ajcxy, etz yi escribas ajcxy, chi ajcxy
y'amidooy:

⁶⁷ —Nimaaygich ajcxy ¿nej miich je' je Cristo?

Chi Jesús y'adzooy:

—Co ixyipy nnigapxich, ca' miich ajcxy mibigipy.

⁶⁸ E pen iich miich ajcxy n'amidooyb, ca' miich ajcxy
xy'adzohuipyich, etz canan huin'it xyñajtmadzihuibich
miich ajcxy. ⁶⁹ Jadachambi e ñicxa'ñi iich, je jäy
huidi tsoon tzajpjoty, n'ixtäga'ñich a'oy'amy ma Dios
mic'ajtmiiidpi.

⁷⁰ Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co iich njëjity.

⁷¹ Chi ajcxy yminañ:

—¿Ti ajt njac-huáanim testigo? Ti ajt yam ci'm nmidoohuim nej mina'ñ.

23

Jesús ma Pilato yhuinduu

¹ Chi tüg'óciy je mayjäy ajcxy ypidígy, chi yajnicxy ajcxy Jesús ma je gobernador Pilato. ² Chi ajcxy ytigiiy xibi yminaangixy:

—Jada jäy naax cajn yaj'ixpijcp huidi ca' ytiy'ájtity. Yi' adujctáhuam co ca' huaad nmigüéjtim César, e ymina'ñ ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmiidpi ajcxy etz je mayjäy:

—Ca' iich ti pocy nbaadyich ma jadayaabi yëydijc.

⁵ Chi Jesús ymidzip nigi anajty ajcxy yminan'adiitzcixy:

—Jada Jesús naax cajn tzachyajqueec-huäcxtaayb je judíojäy miid yi' y'ayuc. Yajtzondacy Galilea, e jadachambi ya Judea jadu'n idích.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuüy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugiiy com tiiyip anajty ooy ja'ixa'ñ,

ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jayaj'amidoy, e Jesús ni tüg'aa ca' y'adzooy. ¹⁰ Jim anajty teedy mijtungmiidpi etz je escribas ajcxy, tzachnigibéjtcixy mictägy. ¹¹ Chi Herodes miid yjäy ooy nixiicy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpjici, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yi teedy mijtungmiidpi, yi cajp-tungmiidpi, etz yi naax cajp. ¹⁴ Chi ajcxy nimay:

—Ti miich ajcxy xyajnimingixyich jadayaabi yëydijc, jadu'n miich ajcxy minamb co ooy jäy yajqueec-huäcxtay. Ti iich yi' jatiyduñich ma miich ajcxy mhuindu, ca' iich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniquexyich, ni ti pocy jada Jesús ca' ti tuñ huidi huaad nyajco'ög'yich. ¹⁶ Miñ n'octzaachytuñich, jaydëbi nnajtzmazihuibich.

¹⁷ Jadu'n je gobernador anajty costumbre miidity co najtzmaziy tüg machyjäy mijxijoty. ¹⁸ Chi je mayjäy tügmucy ajcxy yminaandacy:

—¡Yaj'ög jadayaab Jesús! ¡Najtzmazzi' yi Barrabás!

¹⁹ Je Barrabás anajty pujxtigoty ti ypidägyii co anajty ti nibidigy je gobierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtzmazihua'ñ Jesús. ²¹ Chi je mayjäy janch mic yminañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato yminañ je midugiig'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtzmazihuibich.

²³ Je jäy ajcxy niği anajty yminaan'adiitczixy janch mic, co huen jajcruudzpejty. Chi ajcxy jadu'n mimadacy Jesús co chachne'mgixy je teedy tungmiidpi, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato najtzmazziy je Barrabás huidi anajty pujxtigótyip, co anajty chach jäy jajqueecuacxy, etz yjääyaj'ögy, je' huidi yi jäy ajcxy ypijctzou. Chi Pilato cäyeycy Jesús ma yi' ajcxy huen tungixy nej tzojccixy.

Jesús jajcruudzpejtä

²⁶ Chi je judíojäy ajcxy jajnicxy Jesús. Jim tü'am ajcxy minaybaati tüg jäy huidi anajty ti chooñ camjoty, huidi anajty yxi Simón, e ycogájpity anajty Cirene. Chi adzip ajcxy Simón jajquejycabiy Jesús ycruudz, e jajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjäydijc ajcxy chachyaaxcixy miid jotmay miid yi' ycixpi. ²⁸ Chi Jesús ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyaaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymíana'nipy: “Jotcujc je töxyjäy ajcxy huidi ca' y'ung ix, huidi ca' ti y'ungtzimigy, etz huidi ca' ti y'ung jajtztzcixy.” ³⁰ Chi je jäy ajcxy nimaydägipy mijtun mijcop: “Niğidagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios y'ung, niği ajcxy jacjiini ytundigoya'n miid Dios yjääy, tim jadu'n nipaady nej pin puxam tzuxy quipy nañ puxamy quipy títzpi.

³² Nañ jim anajty jajnicxcixy miid Jesús jametz pocyjäy. Tú'ciy miid Jesús anajty jaj'ögaangixy. ³³ Co ajcxy oyjäty

jim ma tüg it huidi jäy ytijpy ögpí cohuajc, chi ajcxy jim Jesús yajcruudzpejty miid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús yminañ:

—Dios Teedy, mecxi ajcxy ypocy, com ca' nejhuiygixy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjediib. ³⁵ Jim je cajpjäy anajty yhuindüxcixy, yam je tungmiidpi nixigy yajxigy Jesús, yminañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiiccixy yajxiiccixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy yminañ:

—Pen miich Rey'ajt ma yi judíojäy ajcxy, nayñihuäni ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús yminañ:

—Pen miich je' je Cristo, naygohuäni ci'm, e cohuaangich ich ajcxy nañ jadu'n.

⁴⁰ Chi je jadügpi pocyjäy oy y'adzooy, ogy ymigüg, nimay:

—¿Nej ca' miich Dios mdziggy. Ca' m'ixy co tú'ciy ti nbóycähuim? ⁴¹ Ich ajt janch paatip jadu'n, co jadu'n jada ngöbjicim tzaachypi je tiibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiiby ma m'ane'mdac.

⁴³ Chi Jesús oy y'adzooy:

—Janch ìich miich yam nimäy co cham ìich miich miid'íjtnipy ma je oybi it.

Jesús y'o'cni

⁴⁴ Co cujcxibi paty, chi oy ycoodzïy tüg'óciy naaxhuiñ ixti minacyxiini. ⁴⁵ Chi xii ca' y'oc'ani. Chi je huit oy yciitthuäcxy huidi anajty adiiydujcp je Dios y'it jiiby ma Dios ytijc. ⁴⁶ Huin'it Jesús mic ypätcapxy ymínañ:

—Dios Teedy, cham nyajcidiigiy ìich n'alma.

Co Jesús jadu'n ymínañ chi y'ögy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jäymejch yi Dios ymínañ:

—Janch co jadayaabi yëydijc anajty tudägy yjäyity.

⁴⁸ Chi je mayjäy tiibi anajty jim yöymújccixy yhuindiicxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachcójxcixy miid jotmay ycixpi. ⁴⁹ Cham tüg'óciy Jesús ymígügtijc ajcxy huidi anajty miid ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguëgy je' anajty ajcxy yhuindiicxcixy.

Yajnaaxtigïy ajcxy Jesús

⁵⁰ Jim anajty tüg yëydijc huidi anajty yxii José, hue' anajty ycocájpity Arimatea ma Judea naaxjot. Je' anajty judío mïjtungmiidpi, e je' ooy anajty chach'oyjäyity etz ytudägyjäyity. ⁵¹ Je' nañ yjijp'ijxy anajty co yminiipy je Dios y'ané'min, e ca' je' anajty jijptigiyïy miid jacnaagity mïjtungmiidpi co ajcxy yaj'ögy Jesús. ⁵² Chi José ñicxy ma Pilato oy pijctzohui Jesús ñinïcx. ⁵³ Chi yajminajcy ma cruudz, e mo'ñ miid tüg sábana, chi pidacy ma ögpi jut, ma tüg tzaahuinguetzmijc ma ca'ni anajty ni tüg ögpi jiiby yajpidägyp. ⁵⁴ Je' anajty ajcxy ni'ixiïyb a'ixiïyb je pascua xii e je' anajty tim tzondägan je pócxin xii.

⁵⁵ Chi je töxyjäydijc huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpí jut, etz je ninícx jadu'n nej jiiby yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyíy ujtz xuucpi, tzoy, etz unguento, chi amay'ajty je pocxínxíi, jadu'n nej anajty cötújcín y'ane'my.

24

Co Jesús y'ögy chi yjugypíjcy

¹ Co je semaan y'ixtígyi janch tim ticxícp je töxyjäydijc ajcxy ymiiñ ma je o'cpi jut, chi mímiiñ ajcxy ujtz xuucpi, etz tzoy huidibi anajty ti yaj'oyíygíxy. Nañ jadu'n miidjadyii töxyjäydijc miñ. ² Chi ajcxy paty je tzaa ti anajty yjidíguegyii ma je o'cpi jut'aguu. ³ Co ajcxy ytigíy jutjoty, chi ca' ajcxy paty je Huindzin Jesús ñinícx. ⁴ Chi jadu'n yjajty, jiiby anajty ajcxy jutjoty huinmaagyxy, co ñayguéxígi ma ajcxy ymíjc metz yéydijc janch adícxp anajty yhuít. ⁵ Chi ajcxy ooy chígy, chi ajcxy yhuíndactay, chi je metzpi yéydijc ymíñañ:

—¿Na'amy co m'ixtaagyxy yi jugypi ma yi tíibi y'ögy?
⁶⁻⁷ Ca' je' ya, ti je' yjugypícy. Jáyméjtzcix jadu'n nej míñañ jim Galilea, co ymíñañ:

—Ooy ycopícyty co íich, je jäy huidi tzoon tzapjoty, nyajcíyegípy pocyjäy cí'am. Yi' ajcxy xyajcru-udzpedípyích, chi njugypígyípyích codugíig xii.

⁸ Chi ajcxy oy jáymejtzcooty nej anajty Jesús ti ymíñañ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmiidmiydactay jadu'n nej anajty ti íjxcíxy ti míoogíxy miid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtígyy, je' je' anajty ajcxy: María Magdalena, Juana, etz María Jacobo ytaj, e cham

jacnaagity ymidöxyjäydijc. ¹¹ Chi Jesús ydiscípulos ca' ajcxy tim mijpidacy je töxyjäydijc ajcxy ayuc, hue' ajcxy tijy nigo y'ocapxcixy y'ocmiydaaccix, paady ca' ajcxy mibijcy.

¹² Chi Pedro ypidigy ñicxy poyigyi ma anajty Jesús ti ñaaxtigy. Chi Pedro yco'ixiyy ma je o'cpi jut, chi ijxy co ca' jiiby ni ti, jëyi Jesús yhuit abicy y'ooxnäy. Chi Pedro yhuimbijty ma ytijc jihuiyy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscípulos ajcxy ñicxy ma tüg cajp mutzpi hue' anajty yxii je cajp Emaús, hue' yjiguemyity miid Jerusalén tugi'px estadios (majmetz kilómetro). ¹⁴ Chi amiyaacip anajty ajcxy ñicxy. Ni-gapxcixy nimiyaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymiyaaccixy je nimetzpi, chi Jesús ci'm nimijhua'cy je metzpi, chi miid ñicxy ajcxy yquipxyi. ¹⁶ Oy anajty ja'ijxcixy, ca' ajcxy tuñcuend pin je' anajty. ¹⁷ Chi Jesús y'amidooy je' ajcxy:

—¿Ti miich ajcxy miydacpy ma yam mdüyöygixy? ¿Nej co mdájcixy mmáygixy?

¹⁸ Chi tüg huidi anajty yxii Cleofas y'adzooy:

—Janch tüg'óciy mayjäy nejhuidäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuïy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy yminañ:

—Jesús Nazaretpi, huidi Dios y'ayucnajtzcapxiyyip, yi' anajty mij jáncip ma yi ayuc etz huinma'ñ ma Dios yhuinduu, etz cham ma tüg'óciy naax cajp. ²⁰ Chi yi' ajcxy je teedy mijtungmiidpi etz ich ajt ndungmiidpi Jesús

yajcǐdigǐy je gobernador co huen yaj'ögyii. Chi ajcxy yajcruudzpejty. ²¹ Hue' ñich ajcxy anajty ndzach'ahuijxyp co yǐ' je' huǐdi Israeljǎy ajcxy cohuánaam ma ymidzip. Jadachambi jada' ymidugǐgxi ma jadu'n ti ytunyii ti yjadyii. ²² Cham ñich ajcxy ndöxyjǎydijc ajcxy ooy xy'adzǐgǐygyxyich. Ti y'oygixy janch ticxǐcp ma o'cpi jut. ²³ E com ca' ajcxy paaty je ñaaxnicx, chi ajcxy yhuimbijtni yminaangixy co ti ijxcixy yǐ' ángeles ajcxy, hue' je ángeles ajcxy yminañ co Jesús yjuugyity. ²⁴ Huin'it nijǐjity nmigǐgtǐjicǐch ooy ma o'cpi jut, paty ajcxy janch jadu'n nej töxyjǎydijc anajty yminaangixy. Ca' je' ajcxy ijxy Jesús.

²⁵ Chi Jesús yminañ:

—¡Miich jǎy ajcxy ooy ajcxy m'aajuuñity mjetjuuñity, ca' ajcxy ti mdzojcmibijccixy co ajcxy mjambǐgá'nǐp huǐdibi y'ayuc najtzcapxiybi ajcxy ycapxy! ²⁶ ¿Nej ca' anajty ycopícyity co je Cristo ayo'n paadip, e huin'it ytigǐhuip tzajpjoty ma yǐ' y'it oybi?

²⁷ Chi Jesús yajnimaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huǐdi Dios y'ayucnajtzcapxiybi yjaay, yajxon ajcxy yajni'ixiyday jadu'n nej yjaybétyity miid je Cristo ycixpi.

²⁸ Chi ajcxy mihuingoñ je mutz cajp ma anajty ñǐxcixy, je Jesús jadu'n ñaybidaaci jadu'n nej jǐhuǐy jacjiguem ñicxy. ²⁹ Huin'it ajcxy nimay adzip:

—Hui'm miich miid ñich ajcxy, niǐgi jada chuu'ñiy'adǐch.

Chi Jesús ytigǐy cajpjoty yhui'my miid je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg tzajcaagy conǐgy, e yajnaxy Dios cojuyip, huin'it tujc-huäcxy moy ajcxy. ³¹ Huin'it ajcxy ijxcajpy Jesús. Chi Jesús mic mǐciy yaj'ijxtigoy. ³² Chi ajcxy ñayñimaayi:

—¿Nej ca' yjánc'hity co ñch ajt ooy njihuiiyim jotjoty huinma'ñjoty co anajty ajt jim xymiidmiydacim tú'am, etz co ajt xyñajtzcapxiyim je huidi jaybety ma Dios ñecy?

³³ E tim huin'ítiy ajcxy tüb'jccixy, chi ajcxy n'íxcixni jim Jerusalén. Ni'amugi' ajcxy paty je majctügpí Jesús ydiscípulos ajcxy e jacjadyii jáy ajcxy. ³⁴ Chi ajcxy minangixy:

—Janch yí' co ti yjugypicy je Huindzin Jesús, com ti oy ñayguëxígyii ma Simón.

³⁵ Chi Cleofas nimiydacy jadu'n nej tú'ay anajty ajcxy ti ñaybátigixy miid Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxíci ma je' ydiscípulos ajcxy

³⁶ Jiiby anajty ajcxy tzachnimiydaaccixy co Jesús oy ñayguëxígyii ma je' ajcxy. Chi ytinay'ahuíy cujc'amy ma je' ajcxy, chi yminañ:

—Jotcugi' miich ajcxy.

³⁷ Chi je' ajcxy ooy ñay'adzigiyi ooy huinmaaygixy, hue' ajcxy tijy ijxmañiyb. ³⁸ Chi Jesús nimay je' ajcxy:

—¿Na'amy co mjot mhuinma'ñ ti ytigoydaaygixy? ¿Nej co m'aa'ájtigixy mjot'ájtigixy pin ñch? ³⁹ Ijxcix miich ajcxy ñch ngi' ñch ndecy, ñch jéni ñch. N'ídongich etz íjxcich ajcxy. Tüg espíritu ca' miidity chüch ni ypajc, jadu'n nej m'íjxcixy ñch nmíidity.

⁴⁰ Co Jesús jadu'n yminañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy miid co anajty ajcxy chachjotcújcity, chi Jesús ajcxy nimaayi:

—¿Miid ajcxy ti ii mgayipy?

⁴² Chi ajcxy moy Jesús acxtzäy, etz tüg jüdy serpäg.

⁴³ Chi cöbijcy, chi ycaay y'uucy jim ma je' ajcxy yhuinduu.

⁴⁴ Huin'it Jesús yminañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty miid'ijtcixy, co copicy nguy-
 dundähuibich jadu'n nej yjaybétyity ma je Moisés ñecy je
 jëcyip, etz jacjadyii Dios y'ayucnajtzcaxhiybi ñecy, etz yi
 salmo necy.

⁴⁵ Huin'it je' ajcxy yjot yhuinma'ñ ymiiñ ymejch,
 jaydëbi huiñihuiyigixipy huidi jaybétyip. ⁴⁶ Chi Jesús
 yjacminañ:

—Jadu'n jaybety y'ity ma Dios ñecy co copicy co je
 Cristo paadip ayo'n e yjugypigipy codugiig xii, maabi
 anajty y'ögy. ⁴⁷ Huen ajcxy yajcapxhuäcxy Dios ytiy'ajt
 huindu'my naaxhuiñ, chondägip Jerusalén, co ooy
 ycopicyity huen jäy ajcxy jothuimbijtcix jaydëbi ajcxy
 paadip pocyhuinmeecxin. ⁴⁸ Miich ajcxy nidiy'ajt'adipy
 tüg'óciy jadu'n nej cham ti m'ijxcixy ti mnejhuiyigixy.
⁴⁹ Jadachambi nguexipyich ma miich ajcxy je huidi
 nDeedyich ti xyaj'ahuaniyigixy. Hui'mgix ya Jerusalén
 ixti cooni ajcxy xyñidigihuiip xycödighuiip je Dios yjihui'ñ
 ymic'ajt huidi tzonam tzajpjoty.

Jesús ypa'ttigiiyñ tzajpjoty

⁵⁰ Huin'it xii Jesús miid tzoñ je' ydiscípulos ajcxy,
 chi ajcxy ycajppidzimy, ñicxy ajcxy mihuingon je Beta-
 nia. Chi Jesús xajhuäcxy yci' mibijctzoy Dios miid je
 ymügügtijc ajcxy ycixpi. ⁵¹ Chi jadu'n yjajty ma anajty
 Dios mibijctzoy miid yi' ajcxy ycixpi, chi abicy yajhui'mni
 je' ajcxy e je' ypättigiiyñi jiiby tzajpjoty. ⁵² Chi yi' ajcxy
 jim yjac-huäcxijpy Dios ojadajtcixy. Chi ajcxy yhuimbi-
 jttaayñi jim Jerusalén janch jotcujc. ⁵³ Chi ajcxy jabom
 jabom anajty ñicxcixy ma Dios ytijc chajpcapxycapxcixy,
 ojadajtcixy jäymejtzcixy yi Dios, Janch jadu'n jada. Amén.

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

